


MPO NA NINI BISO

TOZALI EBONGISELI TE?

 Ezali litomba ya koya lisusu awa na eteyelo, sima na sanza, pene na, nabanzi, pene na misato, oyo nazalaki awa te. Biséndé emoni mpasi, ná ngai pe lokola. Oh, kasi napémi sikawa, pe okomiyoka malamú mpenza mpo na kozongela mosala. Pe tozali kozela sikawa, na mposo ekoya, na mpokwa ya mokolo ya misato ezali koya, kobanda mayangani ya ko—kolamuka awa na mongombo. Pe soki ezali mokano na Nzambe, nazali na mwa . . . Nkolo alaki ngai mosala na lolenge mosusu pe ya sika. Pe soki Asepeli kosala bongo, nazali na elikia ya kobanda lo—lolenge ya mosala yango ya sika na mposo ekoya, awa na mongombo, naino.

² Na sima, nabongisi mayangani te, bobele na Australie pe na Nouvelle Zelande, na sanza ya liboso ezali koya. Na sima, Ndeko Osborn azali kobenga mpo tósala elongo moko liyangani oyo nalakaki ye awa, tóloba, eleki ntango moke, na Tulsa, kasi, na mikolo ezali koya, kasi tondimisami naino te mpo na yango.

³ Ezalaki mpenza malamú, Ndeko Jeffreys, kozua libaku ya kopesa yo mbote ya loboko awa na sima, pe lisusu koyoka mwana na yo ya mobali koyemba loyembo wana, ntango yo ozali kobeta nzenze. Ngai, tóloba, nasepelaka na yango mingi, tata ná mwana. Bino bosepelaka na yango te? “Bókóló mwana na nzela oyo asengeli kolanda.” Ya solo, Misie Guenther, o—oyebi ete ezali solo, bino mibale. “Bókóló mwana na nzela oyo asengeli kolanda, pe ntango akokóla, akotangwa na yango te.” Pe ezali ya solo. Ekoki kosalema ete ntango na ntango akoka kotangwa na yango, kasi yango ekotika ye te. Bomoni? Eko—ekozala na ye ntango nyonso. Kobókoloma ya ebandeli pe mosala nyonso oyo balakisaki ye na kokóla na ye, na ntembe te, eko—ekozala na ye ntango nyonso. Sikawa, oyo ezali . . .

⁴ Nakutanaki na Ndeko Jeffreys kuna, pe nalobaki: “Ndeko Jeffreys . . .” Nakanisaki, boyebi, nazalaka ntango nyonso na esengo ya komona bandeko bapaya nyonso oyo bayaka kotala biso awa, kasi na mpokwa ya boye, komona ndeko mopaya koyá kotala biso! Mpokwa ya boye, liboso na mayangani ya kolamuka, ezalaka mpenza mpo na bato bayaka na mongombo. Mpokwa ya boye . . . Tolingi kozua mpokwa ya lelo, lobi na ntongo, pe lobi na mpokwa, bobele mpo na koteya likolo na makambo oyo tondimaka awa na mongombo, mpo—mpo na kozóngela yango lisusu. Tondimaka makambo mosusu ya ndenge, ya kokamwa mpenza, kasi na lolenge moko to mosusu, tozuaka yango na Biblia. Emonanaka ete ezalaka mpenza kati na yango.

⁵ Sikawa, soki ndeko mopaya moko azali awa, mobali to mwasi, oyo asambelaka na ebongiseli, to—to oyo andimaka lokola biso te, pe azali awa na mpokwa oyo, tolingi bóyeba ete tosepeli mpenza koyamba bino. Bomoni, tosepeli mpenza mingi koyamba bino. Kasi sikawa, nakanisi. . . Biso toteyaka makambo mwa makasi mpenza. Na bongo, soki emonani ete ondimi yango te, ee, na ntango wana, sálá ndenge ngai nasalaka ntango naliaka gateau ya mbuma ya cerises. Ntango naliaka gateau ya mbuma ya cerises, nasepelaka nde na yango, ntango nyonso, soki nazali. . . Ntango naliaka gateau yango, soki naniati mokókólí, nabwakaka gateau yango te. Na—nabwakaka bobele mokókólí, pe nakóbaka kolia gateau. Na bongo, to ndakisa, soki ozali kolia soso. Sikawa, bino nyonso bolingaka soso, bomoni. Soki okómi na mokúwa, okotika kolia te, okoleka bobele pembeni na mokúwa yango pe okokoba kolia soso. Ee, bósala pe ndenge wana na mpokwa oyo, mpo na makambo nakoloba awa, bobele. . . soki oyoki likambo moko, loba: “Ee, ngai—ngai mpenza. . . nazali esika oyo, bazali na mwa Malakisi ya losambo oyo, na mayangani ya mikolo misato oyo. Bazali bobele kozongela makambo oyo ba—bango bandimaka, pe bazali koyekola likolo na yango.”

⁶ Pe lolenge bobele moko ya komeka kosala ete moto ándima Yango, ezali kobeta nsete makasi mpenza kino bakosengela koyeba ete likambo Yango ezali solo. Yango lolenge bobele moko ya kofandisa likambo yango. Ezali lokola moninga na ngai, Misie Wood, tozalaka na ye elongo; soki obeti nsete pe ezindi bobele na katikati, pe libaya efandi malamau te, ekoumela te, mopepe ekokweisa yango. Kasi osengeli kozindisa yango, kofandisa yango malamau. Na bongo, sikawa, soki nalobi makambo ya makasi mpenza bisika mosusu, bino bapaya baoyo bozali awa na mpokwa oyo, bóyeba ete nazali—nazali koluka kobengana bino te. Nazali bobele koluka kososolisa losambo oyo makambo tondimaka. Sikawa, baoyo nyonso basosoli malamau báloba: “Amen.” [Losambo balobi: “Amen.”—N.D.E.] Malamau. Ezali—ezali malamau. Sikawa nakosukola maboko na ngai. Na sima—na sima. . . Bazali kotia yango na bande, pe bongo na bongo, mpo, na mikolo ekoya, soki balingi koyeba mpenza makambo tondimaka, pe esika totemi, ba-bande oyo ekoloba yango. Na bongo tosalaka boye mbala na mbala, mpo bato ya sika bayaka awa, na—na sima, tokei liboso. Pe sikawa, tokokoka kozongela Malakisi nyonso ya losambo te, kasi bobele mwa ndambo nde tolingi ko—kolobela. Sikawa, kasi mokolo ya misato na mpokwa, nde tokobanda. . .

⁷ Mokolo ya mosala moko pe ya mibale, nakokende, mpo na kobondela, komilengela mpo na mosala ya kobondela mpo na babeli. Bokoki kozua ba-telephone, to nyonso oyo bolingi, mpo na kobengisa bato nyonso oyo bolingi, mpo na kolamuka ezali koya. Pe bóyebisa bango ete báyá na motema likolo-likolo te, báyá te, na koloba: “Ee, sikawa, na mpokwa ya lelo nakokende

kuna noki-noki mpo bábondela mpo na ngai. Pe lobi na mpokwa, ekozala . . .” Bósala bongo te. Bóyá koyoka mwa moke, mpo tolingi kozua ntango na biso mpo na kotalisa Liloba yango polele mpenza na lolenge ete Zabolo ázua esika ya kosala ata moke te. Bongo, soki otiki kondima na yo kokóma kino na suka na yango, na lolenge ete obandi kondima, na bongo, tika lisosoli na yo ya kati kobanda kosala, pe kondima ya Nzambe ekosunga yango. Na ntango wana okoki kozonga. Bomoni?

Mpamba te, kondima na yo ekosala eloko moko te. Lisosoli na yo ya kati esengeli kolanda kondima na yo, na sima, kondima ya Nzambe ekoya kosunga mpo na kotatola nyonso wana. Bomoni? Kasi, soki ezali kondima na yo: “Oh, iyo, nazui yango sikawa!” Sikawa lisosoli na yo ya kati, ekotelemela yango, koloba: “Nazali komituna soki likambo na ngai ekosimba?” Ekosimba te, na ntango wana. Bomoni? Na bongo tolingi ete koyagana oyo ézala mpenza ya kobikisa babeli. Pe liboso ya kokotisa moto na masolo, pe bongo na bongo, mpo na lobiko na nzoto, to mosala oyo ya sika, nalingi ete básosola mpenza ntina nini bazali koya wana. Boye, bóbosana te, bóyá kotala biso, pe tokosepela koyamba bino.

⁸ Sikawa, bómikanisela sikawa, na ntongo, tokokóba na Malakisi ya lingomba. Pe lobi na mpokwa, ndenge moko. Bongo, boyei bolamu, pe moto nyonso akoki koya. Tozalaka ntango nyonso na esengo ya komona moto nyonso. Kasi sikawa, na mpokwa oyo, ezali bobele mpo na bato ya mongombo oyo, baoyo—baoyo bakólisami na Malakisi oyo. Mpamba te, kuna na elanga, na elanga ya kopalanganisa, tozuaka bobele Malakisi mpenza ya moboko, ya kopalanganisa nsango malamau ya Makomi. Kasi awa na mongombo, tozali na makanisi na biso moko pe makambo biso moko tondimaka, lokola—lokola—lokola losambo, pe yango nde tokozongela, na mpokwa oyo.

⁹ Liboso na biso kofungola Liloba na Ye lipambolámi, tokoki kogumba mitó mpo na kobondela mwa moke.

¹⁰ Nzambe na nguya nyonso pe na makasi nyonso, Yo, liboso na mokili kobanda kobaluka zonga-zonga na atóme ya liboso, Ozalaki Nzambe. Obongwani ata moke te. Pe ntango ba-atóme ekozala lisusu te mpo na kosimba yango, pe mokili ya kosimba ekozala lisusu te, Okozala bobele Nzambe. Ozali mpo na libela, na libela. Ozali Nzambe. Ozali na ebandeli ya mikolo te, pe suka ya bomoi te. Okozala libela. Pe, Tata, lokola Ozali na suka te, pe biso tozali na suka, bongo tosengi mawa na Yo ya Bonzambe, e Nzambe, wana tososoli ete molimo na biso esengeli kosangana na Seko na Seko, longwa na binama ya ntango oyo, kino na Seko na seko. Yango wana, Nkolo, tozali awa mpo na koyeba malamau lobiko na biso, mpo na koyeba lolenge tozali, kokokana na Liloba na Yo, pe koyeba esika tokómi na makambo tozali kobikela. Bomoi tozali kobika ezali nde kosepelisa Yo? Molimo na biso ezali kotatola Molimo na Yo? Pe malakisi na biso ezali

kotatola Biblia oyo? Pe, Tata, tika ete tómitala malamú moko pe mosusu, malamú mpenza, na mayangani misato mizali koya. Kokisa yango, Nkolo.

¹¹ Pambola mokengeli awa, basungi, bayangeli misolo, pe bandimi nyonso, bato oyo bayaka na losambo oyo. Kobanda mikolo na ngai ya liboso awa, Nkolo, ezali na bato mingi, bato mingi oyo, nayebi ata ba-nkombo na bango te, to bisika baútaka, kasi nandimi solo ete Yo oyebi makambo na bango nyonso. Pe tozali awa mpo na ntina bobele moko yango, na mpokwa oyo, Nkolo, ya kosangana zonga-zonga na Liloba ekomámi. Pesa biso Molimo Mosantu na bomoi na biso, mpo tókoka kofanda na kimia, pe na kosókema, pe na kobanga Nzambe, mpo na kotála bomoi na biso malamú kokokana na Liloba na Ye. Kokisa yango, Nkolo.

¹² Pe kati na ndako oyo, na mpokwa oyo, Nkolo, ezali na bandeko na ngai ya bindimeli ndenge na ndenge, ya—ya lingomba. Pe, Nkolo, nazongisi matondi mingi ndenge bayei awa mpo na kosangana elongo. Ntango mosusu tokoki kozanga koyokana na makambo mikemike ya Malakisi. Kasi mpo na likambo monene ya motuya, tozali bandeko oyo basangani mpo na etumba. Na bongo, e Nzambe, tika ete élendisa bo—bandeko na biso, pe . . . pe bikanganeli ya ngolu ya bolingo na Nzambe éfúluka likolo na biso. Sikawa, lokola tososoli, Nkolo, ete mosala oyo eleki monene mpo na moto moko, mpamba te makambo tozali koyekola, na mpokwa oyo, ezali suka ya milimo ya bato oyo bassengeli kokende na Seko na Seko. Na bongo, tobondeli Molimo Mosantu kokota sémba kati na Liloba, mpo na kotálisa biso Yango pe kolimbolela biso Yango na lolengé na Ye moko, makambo oyo Ye alingi biso koyeba. Kokisa yango, Nkolo. Pe ntango mikolo misato . . . ntango mayangani yango ekosila, tika ete tóbandela mobembo lokola lingomba oyo ezui makasi, lokola etonga esangani elongo, mpo na kosangisa mitema na biso pe ba-mposa na biso, elongo ná bandeko na biso ya Bokonzi na Nzambe, pe tókoba kokende liboso koleka.

¹³ Nalingi kotóndo Yo, Nkolo, awa, na miso ya lingomba pe—pe ya bato bazali awa, ndenge Opesaki ngai mpóso mingi ya kopema malamú. Nazali komiyoka malamú mpenza na mpokwa oyo, mpo na Bozali na Yo pe lipamboli na Yo. E Nzambe, tobondeli mpo na ndeko mobali oyo, ndeko na biso oyo azali kosala mobembo, kuna na bikólo oyo ya molili pe ya mpasi, epai bomoi na ye moko ekomi na likama. E Nkolo, pambola Ndeko na biso Jeffreys ntango akokende, ná mwana na ye ya mobali, ná mwasi na ye, pe pesa ye mbuma mingi. Tika ete ápasola nzela na molili kino Pole ya Nsango Malamú ekongenga pe ekopalangana. Yoka biso, Tata, mpo tosengi yango na Nkombo ya Nkolo Yesu, Mwana na Yo. Amen.

¹⁴ Sikawa, na mpokwa oyo, nakotánga na Biblia moke na ngai ya Scofield. Nauti kokokisa mibu ntuku mibale na mitano, kala

mingi te. Pe nazali naino na makoki ya kotánga yango, ekómi na londende mingi. Na bongo, nakómi kolata manéti ya kotángela, ntango nayekolaka, pe nakotala ndenge ekosala na mpokwa oyo, ezali mbala na ngai ya liboso.

Sikawa, nazali na mitó ya mateya, lokola oyo, ya: “Lingomba esengeli. . .” Oh, makambo ebele, soki tokoki koyekola yango. Moko na yango ezali: “Mpo na nini tobengami Lingomba? Mpo na nini tozali ebongiseli te? Mpo na nini—mpo na nini tondimaka kobatelama ya Seko mpo na molimo ya mondimi? Mpo na nini tokweisaka basi batei? Mpo na nini tozindisaka moto na mai na ntango ya libatisi? Lingomba ekoleka nde na Monióko?” Pe mingi na mitó ya mateya yango wana, nabanzi nazali na yango zomi na mitano to zomi na mwambe, mpo na ba-mpókwa oyo ekoya.

¹⁵ Boye, na mpokwa oyo, nakanisi kobanda, liboso, emonani ete Nkolo atii na motema na ngai motó ya liteya oyo, ya . . . *Mpo Na Nini Biso Tozali Ebongiseli Te?* Ntina oyo. . . Sikawa, toboyi bato mosusu te, oyo bazali ebongiseli. Toboyi bango te, kasi nalingi kolimbola ntina nini biso tosanganaka na ebongiseli moko te. Natiamaki maboko mpo na mosala na lingomba moko moke ya Baptiste, ndenge boyebi. Lingomba Baptiste ezali ebongiseli te, ezalaki bongo te, kino kala mingi te awa, pe sikawa ebandi kokóma mpenza ebongiseli lokola ba-mosusu na bango. Kasi, ntina biso tokokómá ebongiseli ata moke te. . .

¹⁶ Sikawa, tozali na molongo moko. Tozali na molongo moko, toyebani awa na—na bakonzi-ya-mboka, lokola bato bazali na molongo, etonga na bato oyo bazali na molongo, elongo, mpo na kokumbamela Klisto, kasi tozali ebongiseli te. Moto moko te akozala na bokonzi likolo na biso, bomoni. Ezali ebongiseli te. Ezali—ezali bobele molongo moko, bondeko kati na bandimi Baklisto. Bato bayaka na losambo awa. Pe oyo ekómi losambo na bango, soki balingi koya awa, ntango nyonso bazali na bomoi.

¹⁷ Bakoki koya awa pe koboya kondima makambo nyonso biso toteyaka. Ezali na yango mpenza mabe te. Ntango nyonso, lokola ozali Moklisto, ozali na bondeko, pe tokopesana loboko, ndenge moko pe na bato mosusu. Bomoni? Soki nalobi ete nandimaka libatisi ya kozindisa moto na mai, pe yo ondimateka oyo ya komwangisa mai, pe okangami na yango, tosengeli kozala bobele ndenge tosengelaki kozala soki tozalaki kondima ndenge moko. Ntango mosusu tokoki komona makambo ndenge moko te. Kasi lokola ozali ndeko mobali to ndeko mwasi Moklisto, toyambi bino mpenza malamú, bomoni, bino nyonso.

¹⁸ Na bongo, tozali na ebongiseli moko te, mpo ngai nandimaka ete ebongiseli ekabolaka bandeko. Bamosusu balobaka: “Ee, tozali na ntina ya kolamuka wana te. Ezali kolamuka ya ba-Methodiste.” “Ee, ezali ya ba-Baptiste. Tozali na . . . Biso tozali ba-Methodiste. Tozali na ntina na yango te.” Ndeko, soki Klisto azali kati na yango, tozali—tozali na ntina na yango. Tosengeli

kotia . . . Nzo—Nzoto na Klisto nde ezali—ezali konyokwama. Pe nakómi komona yango na bikólo mingi lelo, ndenge tozali na . . . Sikawa, Klisto asálá ebongiseli ya lingomba ata moke te, ata mokolo moko te. Sikawa, ya solo mpenza.

¹⁹ Bongo, sikawa, nakosenga bino, mpo na lobi na mpokwa, soki olingi koyeba likambo moko, lokola makambo ya histoire oyo nakolobela, to likambo mosusu. Nazali na ntango ya kosilisa liteya mobimba te, soki te, nakokoka kobanda liteya mosusu te, mpo tokoki kolekisa ba-mpóso bobele likolo na liteya moko wana. Kasi soki olingi koyeba esika yango, to eloko mosusu, túná ngai, pe tia yango awa, likolo na—likolo na eteyelo, pe nakoyanola yango mpo na yo.

²⁰ Sikawa, ebongiseli ya kala koleka, pe lingomba ya ebongiseli ya liboso oyo esalemaki, ezali lingomba Katoliko. Pe ekómaki ebongiseli mibú nkama misato na ndambo sima na liwa ya ntóma ya suka. Ezali ya solo. Ekomami na búku ya Batata ya ebandeli ya Nicée, pe ekomami na makomi ya Josephe, pe, oh, ebele na ba—ba-historien minene. Bomoni? Pe mpo na—na . . . bileko nyonso ya lingomba, kino liwa ya ntóma ya suka, pe mibú nkama misato sima na bantóma, lingomba ya ebongiseli ezalaki ata moko te. Pe ba-Katoliko nde bazalaki ebongiseli ya liboso ya lingomba.

²¹ Pe mangomba ya ba-Protestant ezali bibongiseli oyo ebimaki na ebongiseli. Mbongwana ya liboso oyo eyaki, ezalaki Luther; sima ya Luther, Zwingli ayaki, sima ya Zwingli, Calvin ayaki, pe ekobaki bobele bongo. Kino na Kolamuka ya Wesley, pe ekobaki bobele bongo, kino na Alexandre Campbell, John Smith, ná bamosusu, bomoni, ekobaki bongo. Pe koningana ya suka, oyo tozali komona lelo, ezali bindimeli ndenge na ndenge ya eleko ya ba-Pantekotiste.

²² Nandimaka ete Nzambe nde asalaka na eleko moko na moko. Kasi bosílá komona ete, ntango nyonso lingomba moko ekweyaka, pe bobele ntango ekómaka ebongiseli, wana nde ebandaka kokweya? Pe soki esili kokweya, Nzambe atelemisaka lingomba yango lisusu te. Ebebaka nye mbala moko. Sikawa, bino . . . Soki bolingi koyeba histoire na yango, to—tokoki kopesa bino yango, ete—ete lingomba ata moko te, ata moko te, na histoire ya mangomba, ebongiseli ata moko te oyo ekwéyá pe ételema lisusu. Ba-Baptiste, ba-Methodiste, ba-Presbiterien, ba-Luterien, to banani, ntango bakweyaki, esilaki mpo na bango. Sikawa, ezali solo. Sikawa, likambo oyo, na—nauti koyebisa bino, bóлата sikawa ba-kazáka na bino, mpo tokofandisa likambo yango malamú. Bomoni? Esalémá ata mbala moko te. Ntango moto abimi ye moko, pe akómisi lingomba ebongiseli, ekobanda nde wana.

²³ Nzambe asalaka na moto moko moko, na ebongiseli te. Ata na eleko moko te Nzambe asálá na ebongiseli. Asalaka ntango

nyonso na moto moko. Na Kondimana ya Kala, Azalaki kosala na moto moko. Na Kondimana ya Sika, asalaki na moto moko. Na bileko nyonso, Asalaka ntango nyonso na moto moko, kasi na bibongiseli te. Boye, yango wana, soki Nzambe azali kati na ebongiseli te, ntina nini mpo na ngai kosangana na eloko lokola ebongiseli? Sikawa, nazali kolobela bato oyo bazalaka na ebongiseli yango te, nazali kolobela ebongiseli yango moko, mpo bato na Nzambe bazali kati na bibongiseli nyonso wana.

²⁴ Sikawa, Nzambe atikakaka ata moke te likambo moko kosalema soki Apesi likebisi mpo na likambo yango te. Nandimi te ete likambo moko ezali oyo . . .

²⁵ Ndakisa, tozalaka na makambo oyo esalemaka na mangomba, lokola tozalaki na yango kala mingi te, na ntina na makila, mafuta, pe bongo na bongo. Pe boyebi mokanda ya “Molingami Ndeko Branham”, pe bongo na bongo. Kasi ntina oyo natelemelaki yango, ezali mpo ete ekomami na Liloba te. Pe yango nde ntina natelemelaka bibongiseli, ezali mpo ekomami na Liloba te. Esengeli kozala na eloko moko tosengeli kotia moboko ya kondima na biso. Pe soki tokoki kotia moboko likolo na ebongiseli te, tosengeli kotia moboko yango likolo na Liloba ya Nzambe. Mpo ete, moboko Yango ezali bobele moko, ezali Liloba na Nzambe.

²⁶ Na bongo, soki Liloba na Nzambe elobeli ebongiseli te, kasi etelemeli ebongiseli, na bongo, tosengeli koloba kokokana na Liloba. Ata episkopo to moto nani alobi likambo, to moto nani akanisi likambo, ata moto malamau alobi likambo, ata eloko nini elobi, soki likambo yango elongobani na Liloba na Nzambe te, yango ezali lokuta. Bomoni? Esengeli kozala, Liloba esengeli kozala eloko ya suka. Liloba na Nzambe esengeli kozala amen ya suka.

²⁷ Sikawa bómikanisela, nalobi te ete moto ya ebongiseli azali Moklisto te (bososoli yango.) Ezali na milimo ya motuya nkóto ntúku na ntúku kati na bibongiseli nyonso wana, oyo bazali bana na Nzambe. Kasi kokabola bango pe kotiela bango ndelo, natelemelaka yango. Pe Liloba na Nzambe etelemeli yango.

²⁸ Pe nandimaka ete momesano ata moko te oyo ezali na ekólo lelo, momesano ata moko te oyo esilá kozala na ekólo, oyo Liloba na Nzambe esakolaki te ete ekosalema. Nandimaka ete Liloba na Nzambe ekokisaka bosenga nyonso oyo tozali na yango, awa na Liloba. Kobanda na . . . ebandeli na biso kino suka, ekomami awa na Liloba na Nzambe. Na bongo, na—nandimaka ete soki ezali kati na Liloba na Nzambe, boye tosengeli ko . . . Esakolaka liboso. Pe Liloba na Nzambe ezali likebisi.

²⁹ Sikawa, batángaka Liloba na Nzambe lokola batángaka zulunále te. Batángaka Liloba na Nzambe na nzela ya Molimo Mosantu, bomoni, mpo Molimo Mosantu Yango moko elobaka na nzela ya Klisto. Klisto atóndoki Nzambe ndenge Abombáki

makambo oyo na miso ya bato na bwanya pe ya mayele, pe amonisaki yango na bana mike baoyo balingi koyekola. Boye, bomoni, nzela ya koyekola yango na kelasi ezali te, nzela ya kokomisa yango ebongiseli ezali te. Nzela ya kotambola sémba ezali bobele moko, ezali, kokambama na Molimo na Nzambe. Pe makambo yo obikelaki esengeli kolongobana na Liloba oyo. Bomoni? Na ntango wana nde ozui yango. Bomoni?

³⁰ Ezali lokola ntango tokokóta na bozindo na yango na miníti mke, tozali kosala elongo na bato oyo bazali—bazali. . . Bamosusu bazali ba-Calviniste ya matata, bamosusu bazali ba-Arminien ya matata, pe—pe bindimeli ndenge na ndenge. Sikawa, ezalaka ntango nyonso, ata okati yango mike-mike ndenge nini, ezalaka na ngámbo mibale. Ya solo mpenza. Pe bango nyonso mibale bawelanaka. Kasi, likambo ezali ete, Solo ya likambo ezali wapi? Tokokóma nde wana, esika tokanisi ete, na ngolu na Nzambe, tokotalisa bino Solo na yango. Sikawa, tózua bobele. . . pe ezali wana esika nakomáki ndambo ya malakisi ya mangomba yango.

³¹ Sikawa, bófungola ba-Biblia na bino, mpo na miníti moke, bino nyonso. Pe tófungola na Emoniseli, mokapo ya 1; to, mpo na kobanda, Emoniseli, mokapo ya 17. Tóbanda kotánga mpo na koyeba esika mangomba yango ebandáki, pe eloko—eloko nini ebandisaki yango. Sikawa, Biblia ekebisaka makambo nyonso. Ekebisi eleko oyo tozali—tozali kobika na yango. Sikawa, Emoniseli, mokapo ya 17, nalómbo bino. Nalobaki ya 13, nalingaki koloba yango te, ezali na. . . Yango pe, tokomona yango sima na ntango moke, ezali lisakoli ya Etats-Unis. Kasi bóyoka na bokebi sikawa.

Pe moko na banje nsambo, oyo bazalaki na Mbeki nsambo ayaki kosolola na ngai. . . Yaka awa; pe nakotalisa. . . yo ekateli ya mwasi ya ndumba monene oyo afandi likolo na mai mingi:

³² Sikawa, bómikanisela, ezali lokola libombami. Sikawa, mwasi ya ndumba oyo, sikawa, soki tokopesa malakisi oyo, bosengeli liboso koyeba ndimbola ya bilembo oyo. Sikawa, *mwasi*, na Biblia, atalisaka “lingomba”. Bato boni bayebi yango, ete tozali Mwasi na libala? Lingomba ezali Mwasi na libala.

³³ “Yaka awa, pe nakolakisa yo ekateli.” Na bongo, ekozala na ekateli moko likolo na mwasi ya ndumba monene, mwasi ya mbindo oyo afandi likolo na mai mingi. Bongo, *mwasi* atalisaka “lingomba”, pe *mai* etalisaka “bato”. Sikawa, soki botali malamu, bótala pe molongo ya 15 ntango bozali wana, molongo ya 15, mokapo yango moko.

Pe alobaki na ngai, Mai oyo omonaki, epai mwasi wana ya ndumba afandi, ezali bato, . . . mingi, . . . mabota, pe minoko. Bomoni?

³⁴ Sikawa, lingomba monene yango, mwasi monene, sikawa bóbosana te, azali mwasi ya bomoi mabe. Bongo soki mwasi azali kotalisa lingomba, (pe Lingomba ya Klisto ezali Mwasi na libala), boye mwasi oyo azali mosantu te. Na bongo, esengeli kozala mwasi na libala ya maloba, oyo azangi bosantu. Bomoni? Bongo, asali nini? “Afandi likolo,” to kozala *likolo*, elingi koloba, “kozala na bokonzi likolo na mai mingi.” Na elobeli mosusu, azali na nguya kati na bikólo, minoko pe mabota nyonso. Azali moto monene, mwasi yango.

Sikawa, oyo bakonzi ya mokili basali na ye pité. . .

³⁵ “Mpamba te bakonzi ya mokili basali na ye pité,” bato ya mbongo, bato minene. Ndenge nini okoki kosala, ndenge nini mokonzi akoki kosala pité na lingomba? Ezali pité ya molimo. Ya molimo! Pité ezali nini? Ezali, ee, ezali lokola mwasi oyo azangi bosembo epai na mobali na ye. Azali kobika na mobali mosusu, na ntango azali na mobali na ye. Pe lingomba yango, na bongo, azali—azali koloba ete azali Mwasi na libala ya Klisto, na ntango azali kosala pité na bakonzi ya mokili, na bomoi na ye ya mbindo, misala na ye ya mbindo. Oh, Ezali na bozindo pe Ezali na motuya. Nalingaka mpenza Liloba mingi. Sikawa bótala.

. . . oyo bakonzi ya mokili basali na ye pité, pe bafándi na mokili balángwe vinyo ya pité na ye.

³⁶ “Vinyo” na ye, ezali makambo ye azalaki kokabola, mpiko na ye, “Biso nde Lingomba! Biso nde tozali na yango.” Bomoni? Sikawa, bómitalisela yango naino na makanisi na bino. Malamu. “Bongo, amem- . . .”

³⁷ Sikawa, mwanje alobaki na Yoane: “Nakolakisa yo ekateli oyo ekokómela lingomba monene oyo.” Sikawa bótala malamumu.

Bongo amemaki ngai na molimo kino na biliki: pe namonaki mwasi moko afandi likolo na nyama ya motane, . . .

³⁸ *Ngóla*, kati na Biblia, etalisaka “bokonzi”. Langi ya *ngóla* elingi koloba “motane”. Pe *nyama* etalisaka “nguya”.

Bomonaki yango, nyama yango abimaki na mai na mbu, ezalaki na Emoniseli 13. Pe ntango bomoni nyama komata longwa na mai na mbu, elingi koloba ete nguya yango ezalaki kokonza kati na bato.

Kasi na Emoniseli 13, ntango mwana mpate amataki, autaki na mabelé, bato bazalaki te, Etats-Unis. Kasi na sima, azalaki na maséké mibale ya mike, nguya ya bato pe ya lingomba. Na sima, bapesaki ye nguya, pe akómaki koloba lokola Dalagona azalaki koloba liboso na ye. Boye, bosengeli kokoma yango malamumu, tolingi kokota na monioko ya basámbeli na makambo yango moko oyo basalaki, na eleko ya Roma ya bapakano, eleki mibu ebele, mpamba te ezali YANGO ELOBI NKOLO.

Sikawa bótala yango malamú. “Afandi likolo na nyama, nguya.”

³⁹ Bomonaki Rebeka? Ntango Eliezer amonaki ye, ezalaki na ntango ya mpokwa, pe apesaki main a kaméla. Mpamba te, Eliezer alobaki: “Elenge mwasi oyo akoya, pe akopesa mai na kaméla oyo, akozala . . . pe akopesa ngai mai ya komela, akozala mwasi oyo Oponi, Nkolo, mpo na kozala mwasi na libala ya mosali na Yo, Isaka.” Pe wana azalaki naino kosambela, Rebeka ayaki, atókaki mai pe apesaki ye mai ya komela, apesaki pe mai na kaméla. Bótala, kaméla azalaki nyama. Pe nyama yango moko oyo ye apesaki mai, nde ememaki ye epai na mwasi na ye ya libala, Isaka.

⁴⁰ Pe, lelo, nguya ya Molimo Mosantu, oyo Lingomba ezali kopesa mai pe kokumbamela, yango nde Eloko ekomema Yango longwa na mabelé, mpo na kokutana na Mwasi na libala. Ya solo, Isaka azalaki libanda na elanga, na mpokwa. Tokokutana na Nkolo kuna na Nkembo te. Baefese, mokapo ya 5, elobi ete tokokutana na Ye na mipepe. Oh, yango esalaka ete ba-Methodiste bákoka kogánga. Bókanisa naino! Bomoni? Nkolo . . .

Isaka abimaki na ndako ya tata na ye, pe azalaki na elanga, ntango amonaki Rebeka koya likolo na kaméla. Pe mwasi alingaki mobali, bobele ntango amonaki ye, pe akitaki na kaméla nokinoki pe akimaki mbangu mpo na kokutana na ye. Ya solo. Kuna nde esika tokokutana na Nkolo. Pe bobele kaméla oyo apesaki mai, nde ememaki ye epai na mobali na ye.

Pe bobele Nguya oyo Lingomba ekumbamelaka, oyo mokili ebengaka bilandálanda, oyo Lingomba ekumbamelaka, ezali Nguya yango moko oyo ekonetola Lingomba na mipepe, “Mpo na kokutana na Nkolo na mipepe.” Molimo Mosantu! Bomoni? Ezali na . . .

Pe, bótala, Rebeka azalaki mongondo.

⁴¹ Pe mwasi oyo tozali kolobela awa, azali mwasi ndumba. Sikawa, bososoli sikawa ndimbola ya nguya? Ngu—nguya, ndimbola na yango, nyama. Azalaki likolo na motane. Sikawa, ekozala nyama ya lolenge nini? *Motane*, ezali nguya ya “bozui”. Sikawa, ekozala lingomba ya lolenge nini? Azali lingomba ya bozui, azali lingomba monene, azali lingomba ya nguya, pe abendaka ebele na bato mpenza. Pe bakonzi ya mokili basali na ye pité ya molimo, elingi koloba, bato minene ya mokili. Sikawa, tokomona nani ye azali, sima na miníti moke, pe tokoyeba makambo ya bibongiseli yango.

Pe mwasi yango alataki elamba ya motane (lokola mokonzi), . . . alataki elamba ya balangi ya motane-bulé pe motane makasi, . . . akémbisi nzoto na wólo pe mabanga ya talo . . . paúni, na loboko na ye, asimbi kopo ya wólo etóndá na bosoto pe mbindo ya pité na ye;

42 Asimbaki nini na loboko na ye? Malakisi na ye, makambo oyo alakisaka na bato: “Tozali Lingomba. Tozali *boye*.” Pe asali ete bakonzi ya mokili bálángwa elongo na ye, ndenge wana. “Tozali *boye*. Tozali nguya monene! Tozali koyangela bikólo nyonso. Tozali lingomba ya monene koleka. Bóya, bómela ya biso. . . Tala, sopá mwa ndambo. Yo mela yango. Yo mela yango.” Yango mpenza, bomoni. Pe na loboko na ye, asimbaki kopo. Bótala.

Pe mwasi yango alataki elamba ya balangi ya motane-bulé pe motane makasi, . . . akémbisi nzoto na wólo pe mabanga ya talo pe paúni, na loboko na ye, asimbi kopo ya wólo etónda na bosoto pe mbindo ya pité na ye:

43 Sikawa, baninga, tozali kotánga zulunále ya mokolo na mokolo te. Tozali kotánga Liloba na Nzambe lipambolami ya Seko. Likolo na nse nyonso ekoleka, kasi Liloba yango ekotikala. Ya solo.

Pe na elo- . . . na ye, nkombo moko ekomámá, kútu, nkombo ekomámá, LIBOMBAMI, BABILONE MONENE, MAMA YA BANA BASI YA NDUMBA, MBINDO YA MOKILI.

44 Sikawa, eleki ntango moke, nandimi te ete ezalaki na losambo awa, kasi nateyaki liteya oyo, *Likomi Likolo Na Etutú*, pe natalisaki ngámbo ya histoire ya Babilone. Sikawa, mimesano nyonso oyo esílá koya, kosambela nyonso pe mimesano nyonso oyo ezali na mokili lelo, ebandaki na Genese. Sikawa, soki ozui búku ya *Babilone Mibale* ya Hislop, soki olandeli yango na histoire, to ba-búku mosusu ya malamú wana, okoki ata komona mimesano nyonso oyo olingi. Nakozongisa bino kuna sima na miníti moke, mpo na basi batei, bomoni, pe nakotalisa bino epai yango ebandaki, na ebandeli, bomoni, kuna na Genese. Pe mpo na makambo ndenge na ndenge oyo, ndenge ebandaki na Genese. *Genese* elingi koloba “ebandeli”. Bato boni bayebi ete ezali ya solo? *Genese* ezali ebandeli. Na bongo, eloko nyonso oyo ezalaka, esengeli kozala na ebandeli.

45 Soki natali nzete. . . Nazalaki na zamba eleki sanza misato, to mibale. Namoni nzete, nasepeli na kitoko na yango. Namoni yango, ekwei; mosusu ebótami na esika yango, bomoi ezali kokoba. Pe nabandi kokanisa likambo yango. Kasi esika moko ezali, nzete yango ezalaki na ebandeli. Esengeli kozala na ebandeli. Pe lolenge bobele moko mpo ébéngama nzete, to kozala nzete ya chéne, to nzete ya hétre, to nzete ya peuplier, to ya mbíla, to nini, Mayele moko ya monene koleka esengelaki kozala sima na yango. To, soki nzete ezali bobele moko, soki ezali nzete ya chéne, mokili mobimba elingaki kotónda bobele na ba-nzete ya chéne. Kasi Eloko moko, ya monene, Mayele ya monene mpenza, esengelaki kotia yango na molongo.

Nkombo na Ye Mosantu épambolama! Ye Nde atíá sanza ná minzoto zonga-zonga na moi. Atíá biloko nyonso na molongo.

Pe Akotia Lingomba na Ye na molongo. Ekokende bobele na ngámbo oyo Ye alingi yango kokende; esti, westi, nordi, to sudi, to oyo Ye azali. Soki tokoki kobimisa makanisi ya bibongiseli na milimo na biso pe komibwaka mobimba na Kalvari. Akotia yango na molongo, soki tokoki bobele kozala na botosi lokola ba-nzete ná bikelamu na Ye mosusu. Bomóná naino te sanza koloba: “Na mpokwa ya lelo, nakongenga te. Minzoto mosusu kati na bino bóngenga esika na ngai.” Kasi biso, oh, tozali ndenge mosusu, bomoni.

⁴⁶ Sikawa, Babilone, bótala ndenge Babilone emonanaki. Emonani na ebandeli ya Biblia. Emonani katikati ya Biblia. Pe emonani na suka ya Biblia. Sikawa, likambo moko ezali. Sikawa, ebandaki na Nimrod. Nimrod nde atongaki Babilone na Lubwaku ya Shinear, oyo ezuami katikati ya Ebale ya Tigre ná Efrate. Pe Efrate eleki kati na yango. Pe—pe ba-nzela nyonso, kati na ekólo yango, ezalaki kokende sémba kino na Babilone. Pe bikuke na yango nyonso ezalaki na monene ya métre ntuku motoba, bikuke yango esalemaki na motáko. Pe soki okoti na engumba ya Babilone, balabala nyonso ezalaki kokende sémba kino na ngwende.

⁴⁷ Sikawa, okoki kokende na Roma lelo, pe nzela nyonso ekendaka sémba kino na Roma. Pe ngondo Maria moko ya moke atelemi na matákanelo nyonso, epai nzela ebaluki, amemi bebé Klisto na maboko, azali kotalisa ngámbo ya Roma. Bomoni? Emonani na ebandeli ya Biblia; emonani katikati ya Biblia; pe yango oyo na suka ya Biblia.

Sikawa, nalingi kokoba kotánga, mpo na miníti moke, mpo bózua moboko ya likambo oyo. Bomoni? Malamu. “Pe namonaki mwasi yango”, sikawa bótala malamau, “lingomba.” Soki bomoni *mwasi*, bokanisa “lingomba”. Bomoni?

...namonaki mwasi yango alámngwe makila ya basantu, . . .

⁴⁸ Sikawa, liloba oyo *mosantu* euti wapi? Liloba oyo *mosantu* euti na “oyo akómisami mosantu”, to “oyo asantisami”, akómisami mosantu. Malamu.

...namonaki ye alámngwe makila ya basantu, . . .

⁴⁹ Sikawa, soki mwasi yango azali lingomba, anyokolaki basantu. Pe azali lingomba oyo eleki monene. Azali na bokonzi na mokili mobimba. Azali likolo na mai mingi. Pe azali. . . Bakonzi ya mokili bazali kosala na ye pité. Ee, ezali nani? Ezali mwa libombami. Sikawa, Molimo ako . . . Boyebi, lingomba esengeli kozala na makabo ya molimo libwa; bwanya epai na moko, mosusu mpo na kososola, mosusu mpo na lobiko na nzoto, pe mosusu mpo na *bongo na bongo*.

...pe makila ya batatoli ya Yesu: . . .

50 Ezali lokola bazalaki kotalela mpenza makambo Yesu alobaki te. Bazalaki nde kotalela makambo lingomba ezalaki koloba. Ya solo. Pe ezali pe malamau.

...pe ntango namonaki ye, nakamwaki mingi mpenza.

51 “Nakamwaki mingi mpenza. Na...Ezalaki li—li—likambo ya kokamwa mpo na ye, nakamwaki ndenge a...” Sikawa, nakomitia na esika ya Yoane mpo na komeka kofungola yango mwa moke, bomoni. Yoane alobaki: “Afandi wana. Azali komibenga lingomba ya Baklisto. Akoki kozua mbongo nyonso ya mokili. Bakonzi ya mokili bazali na makolo na ye. Azali mozui, pe alati elamba ya balangi ebetaka miso, kasi ndenge nini akoki kolangwa na ba-martyrs ya Yesu? Ndenge nini akoki konyokola basantu? Ndenge nini akoki koboma ba-martyrs ya Klisto? Sikawa azali komibenga Moklisto, lingomba ya Baklisto.” Sikawa bótala malamau.

Pe mwanje yango alobaki na ngai, Mpo na nini okamwe? Nakoyebisa yo libombami ya mwasi yango, pe ya nyama oyo ememi ye, pe oyo ezalaki na...mitó nsambo pe maséké zomi.

52 Sikawa, oyo ezali litangi ya pete mpenza. Bósosola yango. Ekozala mpenza pete.

Nyama oyo omonaki ezalaki, kasi ezali te; pe ekokita...ekobima na libulu mozindo, pe ekokende na libebi: pe bato oyo bafandi na mokili bakokamwa, baoyo bankombo na bango ekomamaki na búku na bomoi longwa na ebandeli ya mokili te, ntango bamoni... ntango ba—ntango batalaki nyama oyo azalaki, oyo azali te, kasi azali.

53 Sikawa, likambo oyo esengeli kosala mpasi sikawa, na bongo, yango oyo. Alobaki, sikawa bótala malamau, ete: “Ntango bato nyonso,” bobele ndambo ya bato te, kasi, “bato nyonso oyo bafandi na mokili bakokamwa.” Bango nyonso bakokamwa. Mokili mobimba ekokamwa mwasi yango. Bobele etonga moko nde ekokamwa yango te, ezali baoyo ba-nkombo na bango ekomamá na Búku na Bomoi ya Mwana Mpate.

54 Sikawa, malamau nákota na bozindo ya likambo yango sikawa, mpo tolingi kolobela yango na miníti moke. Bomoni? Ba-nkombo na bango ekomamaki na Búku na Bomoi ya Mwana Mpate ntango nini? Longwa na mayangani ya kolamuka ya suka oyo bakendeki? Na mpokwa oyo bakendeki na etumbelo? Na mpokwa oyo bakotaki na lingomba? Nazali koluka kozokisa bino te. Kasi, nazali koyebisa bino, Biblia elobi: “Ba-nkombo na bango ekomamaki na Búku na Bomoi ya Mwana Mpate longwa na ebandeli ya mokili.” Bongo mpenza! Ntango Nzambe, na ebandeli, amonaki ete Akotinda Mwana na Ye, pe Akozua esika ya mosumuki, ntango Makila ya Mwana na Nzambe esopanaki.

Biblia elobi ete Makila na Ye esopanaki liboso na kozalisama ya mokili. Bato boni bayebi ete Biblia elobi bongo, ete “Makila ya Klisto esopanaki liboso ya kozalisama ya mokili”? Ntango Makila yango esopanaki, enama nyonso ya Nzoto, ba-nkombo na bango ekomamaki na Makila, na Búku na Bomoi ya Mwana Mpate, na kozalisama ya mokili. Eloko nini ebangisaka bino boye? Oh, ndeko! Yango efungoli bikuke, boye te?

⁵⁵ Ee, sikawa, tótánga oyo elandi, mpo tómona soki oyo ekomami ezali ya solo. Bomoni? “Pe mwanje yango alobaki na ngai: ‘Mpo na nini . . .’” Nakanisi ezali molongo ya 8: “Pe nyama oyo omonaki . . .” Malamu. Ezali yango.

Nyama oyo omonaki ezali, kasi ezali te; pe ekobima na libulu mozindo, . . .

Sikawa, tokozonga wana, kasi nalingi kozua oyo mosusu, mpo tokolobela yango.

. . .pe ekokende na libebi: pe bato oyo bafandi na mokili bakokamwa, baoyo bankombo na bango ekomamaki na búku na bomoi longwa na ebandeli ya mokili te, . . .

⁵⁶ “Bato mingi na mokili”, na elobeli mosusu, “bakopengwisama,” mpamba te, apengwisaki bango. Pe etonga bobele moko nde epengwisamaki te, ezali baoyo nkombo na bango ekomamaki na Búku na Bomoi longwa na kozalisama ya mokili. Tokolobela yango sima na mwa ntango.

⁵⁷ Sikawa bótala mwasi yango, lingomba, azalaki “*Libombami, Babilone*”. Tomoni ye komonana na nzela ya Nimrod. Mwango ya Nimrod ezalaki nini? Nimrod atongaki engumba moko pe asalaki ete bingumba mosusu nyonso ébanda kofuta mpáko na engumba yango. Tokoki komona likambo ya ndenge wana lelo? Lelo, esika ya ndenge wana ezali? Lingomba moko ezali, oyo ezali na bokonzi likolo na bikólo nyonso ya mokili? Ezali mpenza. Lelo, esika moko ezali, oyo efutisaka bikólo nyonso mpáko epai na yango? Esika moko yango ezali?

Tókoba kotánga oyo etikali, mwa moke, mpo bósosola mobimba na yango. Malamu.

. . .oyo bamonaki nyama oyo azalaki, . . .azali te, kasi azali.

Awa nde esengeli kozala na makanisi oyo ezali na bwanya.

⁵⁸ Sikawa, bato boni bayebi ete bwanya ezali moko na makabo ya Molimo? Sikawa, Azali koloba na etonga oyo wapi, boye? Esengeli kozala ete Azali kolobela etonga oyo ezali na ma—makabo ya Molimo kosala kati na Losambo yango.

. . .awa nde esengeli kozala na makanisi oyo ezali na bwanya.

⁵⁹ Sikawa, bótelema wana, bokomona ete ezali na kati ya bileko nyonso ya lingomba. Azali kotalisa, Molimo Mosantu azali koloba yango polele, ete makabo yango ekosala na ntango ya suka. Sikawa, tozali na makabo ya kobikisa nzoto, ezali kosala. Oh, ezali—ezali kotambola malamamu. Ee, ndeko, makabo mosusu pe ezali. Wana ezali bobele moko na yango. Oyo wana ezali bobele eloko ya moke mpenza. Ee, likabo ya monene koleka yango na mosika, yango oyo awa. Eloko nini eleki malamamu, likabo ya Molimo Mosantu ya bwanya, ya kosangisa Liloba na Nzambe pe kotalisa Lingomba esika tokómi, to bobele kobikisama na nzoto ya moto? Bisó nyonso tolingaka kozala na nzoto kolongonu. Kasi, nakosepela mingi na kolongonu ya molimo na ngai kolongonu ya nzoto na ngai, ntango nyonso. Oh! la la!

Bóyoka Molimo Mosantu koloba na nzela na Yoane, na esanga ya Patamo, alobaki: “Awa nde esengeli kozala na bwanya. Áyoka Likambo oyo.” Sikawa, tozali kotalisa likambo moko awa. “Awa nde . . .”

Awa nde esengeli kozala na makanisi oyo ezali na bwanya. Mitó wana nsambo ezali ngomba nsambo, epai mwasi yango afandi.

⁶⁰ Engumba ezali bobele moko, oyo ngai nayebi, na mokili . . . Bingumba ezali mibale, oyo ngai nayebi, oyo ezali na ngomba nsambo to koleka kati na yango. Cincinnati ezali moko na yango, kuna nde epai lisolo ya Cincinnati eútá. Ezali ya mama mbua ya zamba, boyebi, oyo . . . pe bongo na bongo. Kasi ezali na yango koleka nsambo. Kasi ata lingomba moko ezali na bokonzi likolo na Cincinnati te.

Esika ezali bobele moko na mokili mobimba, oyo ezali na lingomba oyo efandi likolo na ngomba nsambo, oyo ezali na bokonzi likolo na mokili mobimba. Sikawa, nauti kuna. Makambo wana nyonso.

Pe kuna nde namonaki esika elobami: “Awa nde makanisi ya bwanya.” Emoniseli 13. “Moto oyo azali na bwanya átanga motángo ya nyama yango, mpamba te ezali motángo ya moto.” Ya boto ebele te, ya etonga ya bato te, kasi ya moto “moko”. “Pe motángo na ye ezali nkama motoba na ntuku motoba na motoba.”

⁶¹ Nasila koyoka mbala mingi bato koloba likolo na ngwende ya pápa wa Roma, ekomáma: “VICARIVS FILII DEI.” Nazalaki komituna mingi soki ezali ya solo. Tiá mokolóto, pe bóngola yango na mituya, na mituya ya ba-Roma, mpo óyeba soki ezali bongo. Ezali mpenza ya solo. Nazalaki mpenza pene na motóle misato ya pápa *boye*, ezalaki na kati ya talatála: “Bokonzi likolo na lifelo, lóla pe epóngelo.” Bomoni? Na bongo, makambo yango, nauti kuna, nauti na Roma pe nayebi ete ezali solo. Sikawa toyebi ete yango elimboli ye.

Pe bótala bakonzi nsambo: mitano basilá kokwea (baoyo bazaláká na eleko wana), moko azali (ezali oyo asengelaki koya, elingi koloba Kaisala), pe mosusu ayei naino te (elingi koloba Herode, oyo azalaki na nkanza); . . .

62 Sikawa, bótala malamumu. Bótala ndenge ebongi be.

. . . pe ntango akoya, asengeli kouwela ntango moke.

63 Moto moko ayebi soki bokonzi ya Herode eumelaki ntango boni? Sanza motoba. Abendaki mama na ye na mabelé, akangisaki ye na yenda ya mpunda. Atumbaki engumba; pe alobaki ete Baklisto nde basalaki yango. Pe azalaki kobeta nzenze likolo na ngomba, ntango bazalaki. . . ntango bazalaki kotumba engumba. Sanza mo—motoba. Pe, bomoni: “Pe nyama yango. . .” Sikawa bótala malamumu, bótala ndenge azalaki moto na nkanza. Bomoni? Sikawa bótala malamumu.

Pe nyama oyo ezalaki, pe ezali te, ata. . . ezali ya mwambe, pe ezali ya nsambo (azali na lolenge ya oyo ya nsambo), pe ezali kokende na libebi.

64 Moto nyonso ayebi soki libebi elingi koloba nini: ezali “lifelo”. Pe bótala epai autaki: na “lifelo”. Ezali nini? Libulu mozindo. Malakisi ya lingomba Katoliko ezali na moboko te. Malakisi ya lingomba Katoliko ezali na Biblia te. Malakisi ya lingomba Katoliko ezuami na Biblia te, ata moke te. Bango moko pe bayebi yango. Sángó azalaki kuna, elenge sánzó oyo awa na paroisse Sacré-Coeur ayaki kuna. Alobaki: “Oh, ye. . .” Nazalaki kosolola na ye likambo ya libatisi ya Mary Elisabeth Frazier. Alobaki: “Oh, obatisaki ye ndenge lingomba Katoliko ya ebandeli ezalaki kobatisa.”

Nalobaki: “Na eleko nini?”

Alobaki: “Na Biblia, Biblia na yo.”

65 Nalobaki: “Lingomba Katoliko ezaláká kobatisa ndenge wana nde? Yango nde malakisi ya lingomba Katoliko?”

“Iyo.”

66 Nalobaki: “Lokola lingomba Katoliko ekosaka te, mpo na nini ebongwani mingi boye?” Bomoni?

67 Alobaki: “Ee, omoni, bino nyonso bondimaka Biblia. Biso, tondimaka lingomba.” Bomoni? “Oyo Biblia elobi, biso tolandaka yango te. Tolandaka nde oyo lingomba elobi.” Ya solo mpenza. Soki mokolo moko bobendani mpo na likambo yango, meká naino, omoni. Balandaka oyo Biblia elobi te; bazali na ntina na yango te. Balandaka nde oyo lingomba elobi. Bomoni?

68 Kasi biso tolandaka oyo lingomba elobi te. Tondimaka oyo Nzambe alobi. Amen. Mpamba te na Biblia, ekomámá: “Tika ete liloba ya moto nyonso ézala lokuta, pe oyo ya Ngai ézala Solo.” Yango wana biso tozali ebongiseli te.

⁶⁹ Sikawa bótala malamumu. Bóyoka likambo oyo mwa moke. “Bakonzi mitano oyo bazalaki, basílá kokwea, bakonzi mitano.” Soki olingi likambo ya histoire oyo elobeli yango, nakolakisa yo yango. “Moko azali, pe moko akoya.”

Sikawa bótala malamumu, “nyama”. Sikawa, nyama yango azalaki mokonzi te. Azalaki “oyo azali, azali lisusu te; azali lisusu, pe azali lisusu te; azali lisusu, pe azali lisusu te.” Ezali nini? Bokitani ya ba-pápa, bokonzi moko, nyama moko nde azali kokonza. Na ntango wana nde Roma ya bapakano ebongwanaki pe ekómaki Roma ya ba-pápa. Roma ya bapakano ebongwanaki, na sima ekómaki bo-pápa, elingi koloba, bazuaki pápa na esika ya mokonzi, pe pápa azali mokonzi ya molimo. Yango wana azalaka na motóle, mokonzi ya molimo, oyo amibengi mokitani ya Yesu Klisto. Yango mpenza. Sikawa bótala.

⁷⁰ Tokotalisa polele malakisi yango ya ba-Katoliko, mpo na komonisa bino ndenge efungolaki nzela pe ekotaki kati na mangomba Protestant, bomoni, ndenge azali naino, eteni ya monene mpenza, na kati ya lingomba Protestant. Ekeseni mpenza na Biblia, ekeseni na yango na mobimba. Sikawa: “Nyama oyo azalaki, oyo azali lisusu te.” Sikawa bómikanisela: “Baoyo nyonso bafandi na mokili bakopengwisama, baoyo nkombo na bango ekomamaki te longwa na ebandeli ya mokili.” Tótala naino.

Pe nyama oyo ezalaki, pe ezali te, (molongo ya 11) kasi ezali ya mwambe, pe . . . ya nsambo, pe ezali kokende na libebi. (Akokoba kino akokóma na mabúlú mozindo, na suka ya nzela.)

Pe maséké zomi oyo omonaki ezali bakonzi zomi, . . .

Sikawa bótala malamumu awa. Soki olingi komona likambo moko ya kokamwisa, tala malamumu likambo oyo.

Ezali bakonzi zomi, oyo bazui naino bokonzi te; kasi bazali kozua bokonzi lokola bakonzi mpo na ngonga moko elongo na nyama.

⁷¹ Bazali bakonzi oyo balátísá bango mitóle te; bazali bakonzi-na-nko. Bomoni, balátísá bango mitóle te, kasi bazali kozua bokonzi lokola bakonzi, ngonga moko, na nse na bokonzi ya nyama. Wana ezali bobele na mwa ntango ya molili oyo tozali kobika na yango sikawa, nde bakonzi-na-nko bazali koya. Bomoni? “Bazali kozua bokonzi lokola bakonzi, ngonga moko elongo na nyama.” Sikawa, malamumu.

Bango bazali na likanisi bobele moko, pe bakopesa bokonzi pe nguya na bango na nyama.

Bango bakobunda etumba na Mwana Mpate, pe Mwana Mpate akolonga bango: (nkembo!) mpamba te azali Nkolo na nkolo, pe Mokonzi na bakonzi: pe baoyo

bazali elongo na ye babengami, baponami, pe bato na bosembo.

⁷² Ekokaki kozala malamú mpo na ngai koteya liteya moko sikawa likolo na yango: “Baponami, liboso na kozalisama na mokili, baoyo bazali sembo na mbéla na bango.” Aleluya! Ezali bongó. “Babengami baponami pe bato na sembo.” *Pe* ezali likangisi, bomoni: “Baponami pe bato na sembo.” Bakolongá ye. Ata bakokóma monene ndenge nini.

⁷³ *Pe* lisangana monene oyo ya communisme, communism oyo tozali na yango lelo, bómitungisa na ntina na yango te. Ezali mpenza esalelo na maboko ya Nzambe. Nakoki kotalisa yango polele na nzela na Biblia oyo. Akonyokola mwasi yango mpo na martyr moko moko oyo asílá koboma. Iyo, misie. Bótala malamú, bakonzi nyonso oyo bakoyokana, pe bakoyina mwasi yango. *Pe* communisme ekopanzana na ekólo mobimba, na mokili mobimba. Ee, esengeli kozala lisangana ya Nzambe, mpo na kopesa ye etúmbu. Olobi: “Zela naino, Ndeko Branham. Communisme, lisangana ya Nzambe?” Ya solo, na ntembe te, ezali lisanga ya Nzambe. Biblia elobi bongó. Kasi ezali kokota mpo na kosakola kosambisama likolo na bayini na Nzambe pe babúki mibeko na ndenge ya nsóni. Eloko nini etikali na mokili oyo? Tozui nini? Tala, mokolo mosusu. . .

⁷⁴ Nakotelema naino mwa moke na liteya na ngai, soki nakokoka. Nazalaki kotánga eteni ya Makomi oyo elobi ete mwana makángo akokota na eyanganelo ya Yawe te kati na mabota zomi na minei. Bato boni bayebi yango? Ezali ya solo, Dutelonome 23; mwana makángo. Soki mwasi azuami na zamba, elingi koloba mosika na kobatelama ya mobali, pe mobali moko azui mwasi yango na makasi, mobali yango akosengela kobala ye. Ata akómi mwasi ya ndumba, asengeli kobika elongo na mwasi yango kino liwa na ye. *Pe* soki mwasi yango abali ye, pe alobi ete azali mongondo, pe azali na ye bongó te, bakoki koboma ye mpo na yango. *Pe* soki mobali ná mwasi oyo babaláná baboti mwana makángo, mwana yango akokota na eyanganelo ya Yawe te, kino na libota ya zomi na minei. *Pe* mibu ntuku minei ezali libota moko. Ekozala mibu nkama minei liboso lisumu yango ébima na Yisalaele.

⁷⁵ Nzambe ayinaka lisumu! Ndenge nini okoki koniata Makila Mosantu ya Nkolo Yesu, bobele mpo osambelaka na ebongiseli moko, okanisi ete okokota? Osengeli kokokisa makambo oyo Nzambe asengi, soki te, okokota ata moke te. Ya solo. Kozala mosungi, motei, to nani, ezali na ntina moko te. Osengeli kokokisa bosenga ya Nzambe.

⁷⁶ Mabota zomi na minei. Moto oyo azalaki kotiela ngai ntembe mpo na yango azali awa sikawa. Alobaki: “Sikawa, ndenge nini tokoyeba moto oyo akobikisama?”

77 Nalobaki: “Na esika wana nde osengeli kozala Calviniste ya malamumu.” Nkombo na yo ekomamaki na Búku yango liboso na kozalisama ya mokili. Nzambe andimaka molongo ya makila wana. Oyo wana etali nde Ye. Bomoni?

“Kasi nini yango . . .”

78 Boyoka. Bino bilenge, lelo, nayebi te soki bosambelaka na losambo oyo, to soki bouti wapi, bino bilenge mibali pe bilenge basi. Bozali kososola: makambo oyo bosalaka, soki libota mosusu ekoya sima, bana na bino bakosambisama mpo na makambo bino bozali kosala? Bozali na limemia pe na nsóni te? Bino bilenge basi oyo bobimaka na mwa ba-kupe ná biloko wana, boyebi, ekolanda mwana na yo ya mwasi. Oyebi ete nkóko na yo ya mwasi azalaki na mo—mobulu, pe ete mama na yo azalaki mobíni monene, yango wana yo olongolaka bilamba na miso ya bato ntango obinaka lelo? Ya solo. Bana na yo bakozala ndenge nini? Iyo, misie. Nzambe alobaki ete akopesa etumbu ya lisumu na nko ya baboti epai na bana pe bana na bango, kino na libota ya misato pe ya minei.

79 Pe ozali kososola, ndeko na ngai ya mobali, ete ntango nyonso osalaka makambo ya malamumu, ekolanda bana na yo?

80 Bótala awa, tózua Baebele, mokapo ya 7. Biblia elobi ete ntango—ntango Melekisedeke akutanaki na Abraham, wana autaki kolónka mokonzi, apambolaki ye, pe Elobami sikawa: “Levi . . .” Azali kolobela likambo ya kofuta moko na zomi. Elobaki: “Yawe apesaki na Levi etinda ya kozua moko na zomi kouta na bandeko na ye.” Pe Levi, oyo azalaki kozua moko na zomi, afutaki moko na zomi, mpamba te azalaki naino na mokongo ya Abraham ntango akutanaki na Melekisedeke. Pe Abraham azalaki tata ya nkoko na ye. Abraham abotaki Isaka, Isaka abotaki Yakobo, Yakobo abotaki Levi; Levi, tata, nkóko, tata ya nkóko. Pe wana Levi azalaki na mokongo ya Abraham, Biblia elobi ete afutaki moko na zomi epai na Melchisedek. Aleluya!

81 Bótika moto moko te kolobela bino ete lisangana moko ya mokili oyo ekoki kopekisa likálo monene ya Nzambe. Yango ezali kokoba kokende liboso! Ebongisamaki bongo kuna na ebandeli. Molimo mabe ata moko te, ata milimo mabe nyonso ekoki kopekisa mwango na Ye te.

82 Sikawa, Biblia elobi te ete afutaki yango “na elilingi.” Biblia elobi: “Afutaki moko na zomi”, ntango azalaki na mokongo ya tata ya nkóko na ye. Nkembo! Wana nde Nkolo na ngai. Oh, Ayebaki yango, ata, liboso ya kozalisama ya mokili. Ayebaki makambo nyonso. Pe kati na Abraham, afutaki moko na zomi.

83 Pe ndeko mwasi, ndeko mobali, ndenge nini okoki kotambola boye, bato bazali kobika pe kotambola na basi ya mibali mosusu, pe basi bazali koboma mabala, mpo na kobika bomoi oyo bozali kobika, bokanisi ete libota oyo ekolanda ekozala ndenge

nini? Likambo nde yango oyo. Etikali bobele bana makángo, oyo babotami na bosoto, bipola ya mpamba. Pe etikali bobele likambo moko mpo na yango, ezali nde eleko ya ba-atóme oyo tozali kobika kati na yango. Ya solo mpenza. Tokómi na ntango ya suka.

⁸⁴ Na ntongo ya lelo, kuna na ba-ngomba ya Kentucky, elenge mobali moko azali kuna, okoki kopusana métre misato pene na ye te, asalaka potopóto ya sukali ya sorgó. Ntango mosusu ayebi bokeseni kati na loboko ya mobali ná ya mwasi te. Ntango ayokaki... Nakotaki esika oyo epekisámá kokota. Nayebaki esika nazalaki te. Nazuamaki na kati ya mabwaku ya mike-mike. Nazalaki kokende kuna mpo na bokila ya biséndé. Pe ntango nafandaki kuna, nabandaki kosolola na ye. Pe mwana mobali yango alobaki ete alingaki kokende mosala ya sodá. Pe mbala moko, tokómaki kosolola makambo ya Nkolo, pe ye alobaki: “Motei, ondimi te ete tokómi na ntango ya suka?” Mosika, kuna na ba-ngomba.

⁸⁵ Nalobaki: “Ya solo, ezali bongo. Ya solo, mwana, tokómi na ntango ya suka.”

⁸⁶ Tokómi wana. Ezali ntango oyo tozali kobika kati na yango, ndeko. Tokómi wana. Bozali komona te ndenge bamama ya kala, ná bamama, ndenge bazalaki kobika, pe bankóko ya mibali ná ya basi? Bozali komona ndenge papa ná mama babikaki te? Ezali kokamwisa te, ndenge tokómi na bipola lelo. Ezali kokamwisa te, okoki koteya makasi ata ndenge nini, bakolata kaka bakupe, pe bakobwakela yo nsoi na elongi. Bakomela makaya pe bakobwakela yo milinga, bakoloba: “Kolanda makambo na biso te.” Mpo na nini? Mpo baútá na ekólo yango. Nalingi kokóma wana, mbala moko: *Momboto Na Nyoka*. Tokomona epai azali kokota, tokomona mpo na nini basalaka bongo. Bazali bana ya Zabolo longwa na kozalisama ya mokili. Ya solo. Pe totikali na eloko mosusu te, na bongo, kosambisama nde eloko bobele moko oyo etikali. Tokoki kozua eloko mosusu te, bobele kosambisama. Nzambe akobeta yango mobimba. Pe bato nde basali yango bango moko. Nzambe nde akánaki te ete ékóma boye, kasi Ayebaki ete ekokóma boye. Yango wana Alobaki ete “Akopengwisa baoyo nyonso bafandi na mokili, longola bobele baoyo nkombo na bango etiámá na Búku na Bomoi ya Mwana Mpate liboso ete mokili ézalisama”.

⁸⁷ Tótala yango malamu. Tótánga mwa mosika sikawa. Bongo, sikawa, nakanisi tokómi na oyo ya 12.

Pe maséké zomi oyo omonaki ezali bakonzi zomi, oyo bazui naino bokonzi te; kasi bazali kozua bokonzi lokola bakonzi mpo na ngonga moko elongo na nyama.

Bango bakozala na likanisi bobele moko, pe bakopesa bokonzi pe nguwa na bango na nyama.

Bango bakobunda etumba na Mwana Mpate, pe Mwana Mpate akolonga bango: mpamba te azali Nkolo na nkolo, pe Mokonzi na bakonzi: pe baoyo bazali elongo na ye ba—babengami, baponami, pe bato na bosembo.

Pe alobaki na ngai, Mai oyo omonaki, epai mwasi ya ndumba afandi, ezali bato, . . . mingi, . . . mabota, pe minoko.

. . . maséké zomi oyo omonaki, ná nyama, ekoyina mwasi ya ndumba, . . .

⁸⁸ Bótala yango sikawa, “maséké zomi” yango, ba-bokonzi zomi yango. Bomoni, wana nde makambo nyonso epesami, ndenge bakonzi-na-nko bazalaka. Botala nzela oyo bakonzi-na-nko balandaka. Balandaka nzela nini? Bó—bótangela ngai mokonzi na-nko bobele moko, oyo alandaka nzela ya communisme te. Bomoni? Pe (bakosala nini?) bakoyina “mwasi ya ndumba” yango, mwasi, lingomba. Kasi likambo nini? Bótala eloko oyo ekosala yango.

. . . ekoyina mwasi wana ya ndumba pe ekobebisa ye, ekolia misuni na ye pe ekozikisa ye na móto.

⁸⁹ Bakopanza mpenza eloko yango, ya solo mpenza, bobele ndenge natelemi awa. Soki tozalaki mpenza na ntango ya kolobela likambo ya lingomba yango, pe kolandela yango kati na Makomi, esika Elobami, etangami: “Bakonzi nyonso ya mokili, pe bakúmbi masuwa nyonso, pe bango nyonso, bakolela, mpo Babilone monene ebebisami na ngonga moko mpamba.” Na ngonga bobele moko, ntango na ye ekokaki! Pe, oh, Elobi: “Bósepela, bino basantu, pe bino nyonso basakoli ya búle, mpamba te Nzambe apesi ye etúmbu mpo na makila ya basantu pe ya bandeko na bino nyonso.” Bomoni, ya solo. Na ntembe te, communisme ezali mpenza esalelo na maboko ya Nzambe. Bobele ndenge Mokonzi Nebukadenezare azalaki esalelo na maboko na Ye, ntango ayaki komema Bayuda na boumbu, mpo batangwaki! . . . ? . . .

⁹⁰ Lisumu ekoki kokoba kobebisa, momboto ya bayengebene bakoki kozala wana; pe momboto yango ekokoba kobeba, kobeba, kobeba, kino, sima na mwa ntango, ekozala lisusu te. Ekokóma na esika moko oyo, lokola bamama ná bapapa na bango, ná baoyo babikaki bongo liboso na biso, na lolenge wana, kino eloko moko te etikali na biso. Pe boyebi likambo Yesu alobaki? Ete soki Ayeisi mikolo mokuse te, mosuni ata moko te elingaki kobika.

⁹¹ Bomoni? Bomoni mpo na nini tozali na bango? Nazali kotalisa bino mabe te. Lokola Arthur Godfrey ná bamosusu, boyebi, bomoni, ná Elvis Presley, ná—ná koningisa lokéto, basalopéte, ná suki kino na kingo, ná bizaleli nyonso ya ndenge wana epai na bilenge. Euti wapi? Ezali nini? [Ndeko Branham abeti eteyelo mbala zomi na moko.—N.D.E.] Ezali mpo euti na

etonga ya bana makango oyo babikaki liboso. Eloko moko etikali te! Oh, batelemaka pe bayembaka: “Nzambe na ngai, pene na Yo”, lokola Ernie mobúki nkúnde, ná bamosusu nyonso, ndenge wana, bayembaka loyembo moko boye, pe bongo na bongo, ndenge wana. Ndeko, oyebi? Oyo wana ezali mpenza bokosi. Iyo, misie.

⁹² Moto oyo alandaka rock-and-roll, boogie-woogie ná makambo ya ndenge wana azali na esika na eteyelo oyo te. Azali na mosala ata moke te sima na eteyelo awa. Oyo ezali mpo na bonganga, babengámi ya Nzambe. Batei oyo babengámi na Nzambe nde bazali na esika sima na eteyelo awa. Esika oyo ezali mpo na bato ya ndenge wana te. Yango nde likambo ya lelo: bakomisi lingomba bobele lokola lisanga ya moziki. Lisanga ya moziki ezali mabe te, soki olingi kosala yango, etali yo. Kasi tika náyebisa yo, bokeseni ezali monene, komeka. . . kati na lisanga ya moziki pe lingomba. Iyo, misie. Soki olingi kosala makambo oyo basalaka na lisanga ya moziki, kosala ba-féti ya ndenge na ndenge pe bongo na bongo, etali yo. Kasi, ndeko, lingomba esengeli kokómbolama longwa na eteyelo kino na eteni ya nse. Ya solo. Nalingi koloba te kokómbola ya kotia maninisa ya sika pe bongo na bongo. Nalingi koloba kolamuka ya lolenge ya kala, oyo etindami na Nzambe, oyo ekobwaka biloko wana ngámbo na ngámbo. Iyo, misie. Ezali lokola kopelisa mwinda, mwinda ya lotilíki, likolo na ba-mpese oyo bazingeli eteni ya pómme. Iyo, misie, bakopalangana ntango mwinda epeli.

⁹³ Sikawa bótala malamú: “Bango bazali na likanisi bobele moko, pe bakopesa nguya na bango.” Nakómi na nse na yango sikawa. “Maséké zomi.” Iyo, sikawa.

Mpo Nzambe atii yango na mitema na bango mpo na kokokisa likanisi na ye (ebandi), pe mpo na kokokisa likanisi na bango bobele moko ya kopesa nyama babokonzi na bango, kino ntango maloba na Nzambe ekokokisama.

Sikawa, pe mwasi oyo omonaki azali engumba monene, oyo ezali na bokonzi likolo na bakonzi nyonso ya mokili.

⁹⁴ Sikawa, ntina ya kotia mai na monoko ezali te, toyebi ete ezali bokitani ya ba-Katoliko. Ntina ezali te mpo moto. . . Na—nandimaka yango na makasi nyonso ndenge nandimaka ete nasilá kozwa Molimo Mosantu. Nandimaka yango mpenza ndenge nandimaka ete nazali Moklisto ndenge natelemi awa lelo, ete bokitani wana ya ba-Katoliko nde—nde. . . Engumba ya Vatican nde—nde engumba oyo efandi likolo na ngomba nsambo. Bokitani ya lingomba nde nyama oyo azalaki, pe azali lisusu te. Ye nde Babilone. Nyonso wana etalisami malamú mpenza, polele mpenza, na Makomi mobimba. Ezali lingomba Katoliko.

95 Sikawa, likambo oyo ekosala bino mpasi, yango oyo. Olobi: “Ee, ozali kobeta ngai te, Ndeko Branham.” Kasi nakotuna bino bobele likambo moko. Tózonga sikawa na molongo ya 5.

Pe . . . moko ekomámá na motó na ye, LIBOMBAMI, BABILONE MONENE, MAMA YA BOSOTO . . . MAMA YA BASI YA NDUMBA PE YA BOSOTO YA MOKILI.

96 Azalaki nini? Mwasi ya n-d-u-m-b-a. Pe azalaki m-a-m-a. Nini? M-a-m-a. Abotaki eloko moko. Azali mama ya bana mibali? Ya bana basi ya pité! Mwasi ya pité azali nini? Ndenge moko na—na mwasi ya ndumba: mwasi ya bomoi mabe. Eloko nini epesi ye bomoi mabe? Malakisi na ye. Azalaki komibenga lingomba ya ba-Klisto, kasi azalaki kokabola biyámbweli ya bato. Pe awa alobi ete azalaki na . . . Soki ye azalaki ebongiseli ya liboso, na bongo emonani ete bibongiseli mosusu eutaki na ye. Ye nde azalaki mama ya basi ya pité. Boye te? Mama ya basi ya pité. Na bongo, akokaki kozala mama ya bana mibali te. Akokaki kozala mama . . . Asengelaki kozala mama ya basi. Pe, soki bazalaki basi, bazalaki mangomba. Sikawa tótala naino. Eloko nini ebimaki na . . .

97 Ebongiseli ya liboso ezalaki nini? Lingomba Katoliko. Ebongiseli ya mibale ezalaki nini? Luther. Ebongiseli ya misato ezalaki nini? Zwingli. Yango ebimisaki nini? Calvin. Na sima ba-Anglican bayaki, pe sima na ba-Anglican, ba-Methodiste bayaki. Ba-Methodiste, ba-Methodiste babotaki nini? Alexandre Campbell autaki kuna. Uta na Alexandre Campbell, John Smith abimaki. Uta . . . Alexandre Campbell, ye, ezalaki lingomba ya Baklisto; na sima, elandanaki minei to mitano, lingomba ya Klisto ná masangá mosusu ya mike-mike oyo ebimaki kuna. Na sima, lingomba Baptiste eyaki, bitápe ya mike-mike ebele ebimaki uta na yango. Pe uta na lingomba Methodiste . . . uta na lingomba Methodiste, liboso, ba-Methodiste Wesleyen bayaki, na sima, bakabwanaki mbala minei to mitano. Na sima, ba-Methodiste ya lolenge mosusu bayaki, na sima bakabwanaki lisusu, pe ba-Methodistes Libre bayaki. Na—na sima, ba-Nazareen babimaki. Pe longwa na ba-Nazareen kino na ba-Pelerin de la Sainteté, sima na ba-Pelerin de la Sainteté, bakobaki. Masangá ya mike-mike ezalaki kobima ndenge wana, ezalaki kokoba kobima, ekobaki longwa na ma—masangá ya mike moko na moko wana. Pe bango nyonso basalaki nini? Nyonso wana ekómaki lingomba Pantekotiste.

98 Bongo lingomba Pantekotiste esalaki nini? Kaka ndenge mama na bango asalaki, bazongaki sima pe bamisalelaki mabongisi. Pe ekómaki nini? E—ebongiseli. Soki okoti na lingomba moko, eloko ya liboso: “Malakisi na yo ezali nini?” Oh, bakoluka koyeba makambo na yo nyonso mpenza, bomoni, mpo báyeba oyo yo ozali, oyo yo ondimaka. Pe soki okokani na bango mpenza te, ndeko, babengani yo na mbala moko. Ya solo.

⁹⁹ Pe kokanisa te ete lokola olobi ete ozali Pantekotiste nde obatelami. Ndeko, ba-Pantekotiste mingi bakozala libanda na nzela, ndenge moko na baoyo bazali kati na nzela, nandimi mpenza bongo. Bomoni?

¹⁰⁰ Sikawa, bibongiseli nyonso wana, elingaki kozala malamumu soki batikaki bobele lipamboli ya Pantekote kosala, kozanga kokómisa yango ebongiseli, soki babatelaki bondeko pe batikaki Molimo Mosantu kokabola. Molimo Mosantu akabolaka. Mokolo moko, Anania ná Safira bayaki, balobaki makambo *boye na boye*; pe Molimo Mosantu alobaki: “Mpo na nini bokosaki?”

¹⁰¹ Kasi biso tolobaka: “Tala, oyo wana nde Ndeko Jones, komeka koloba mabe na ye te, ye nde apesaka mbongo mingi koleka na lingomba. Nayebi ete azali na Molimo Mosantu; nayókáki ye koloba minoko na sika, pe namónáki ye kogánga na Molimo.” Etali yango ata moke te, ezali bobele lokola kosopa nkúnde likolo na lopo ya ngombe, oyo ekaúká. Bomoni? Ezali na ntina ata moke te. Nzambe nde akataka likambo. Ye moto akánaka soki ezali bongo to te. Ezali mpenza bongo. “Kasi biso tokómi kotalela ebongiseli na biso. Ee, tobenganaki ye epai ya—ya ba-Assemblée, bongo ba-Unitaire balokoti ye.” Ba-Unitaire bayambi mwa moke, na sima babangani ye. Mpamba te, bayambi ye kuna, pe ba-Jésus Seul balokoti ye. Ba-Jésus Seul bayambi ye mwa moke, na sima, eloko oyo eyambi ye na sima ezali nde lingomba ya Nzambe, bango nde bayambi ye. Lingomba ya Nzambe ya Lisakoli balokoti ye, na sima lisangá ya Tomlinson bazui ye. Oh! la la! Ndeko, eloko nini lisusu ekoya na sima! Nyonso wana epai na ba-Pantekotiste, kolamuka ya suka. Pe sikawa, bakómi na Móto ya Bulé, pe bakómi na basambeli ya mafuta, ná—ná ya makila na elongi. Pe, oh, mawa, nayebi te esika bakómi sikawa.

¹⁰² Likambo bobele moko, ezali ete esílí kopola na mobimba. Boyebi ete Biblia elobaki ete ekopola? Boyebi ete—ete Biblia elobeli eleko oyo, ete ekoya, oyo ata bamésá ya Nkolo ekotóna na bisánzi? Pe elobami: “Nakoki koteya malakisi epai na nani? Nakoki komisosolisa epai na nani? Mpo ezali mobeke sima na mobeke, sima na mobeke, molongó sima na molongó.” Akoteya Malakisi epai na nani? Baoyo balongolami na mabéle ya mama. Bomoni?

¹⁰³ Sikawa, mwasi ata moko te—ata moko te, mwasi oyo abébá mpenza na engumba oyo ata moko te akoki kozanga kobota mwana mwasi mongondo. Sikawa, azali mongondo ntango abotami, pe akoki kotambola malamumu. Kasi soki okebi te, lokola mama na ye azalaki ndenge wana, mwana mwasi yango, libwa likolo na zomi, akozala mpenza na bizaleli ya mama na ye. Sikawa, boyebi ete ezali ya solo. Mama oyo azali kokamba ndako ya kindumba akoki kobota mwana mwasi. Na mibu zomi na motoba, akoki kozala péto pe malamumu lokola felele ya lísi,

kasi bobele soki átikali ndenge wana. Kasi, likambo ezali ete, akobaluka pe akolanda bizaleli ya mama na ye.

¹⁰⁴ Sikawa, lingomba Katoliko ezalaki mwasi ya ndumba ya liboso, ya kala, oyo ayaki, ná malakisi oyo ye moko amisalelaki, makambo ya kisoloka, pe Biblia elobi: “Autaki na libulu mozindo pe akozonga na libebi.” Biblia nde elobi bongo. Sikawa, soki bateyi yango, ezali lokuta. Ezali lokuta, kokokana na Liloba na Nzambe. Na sima, lingomba Methodiste eyaki, ebotamaki na ye, elenge mwasi kitoko, kasi asalaki nini? Abalukaki pe asalaki makambo yango moko oyo mama na ye asalaka. Atikaka bandimi ya losambo na ye kolata ba-kupé. Atikaka bango komela makaya. Atikaka bango kosala bisalela, pe kosala makambo ndenge baling. Balobelaka bango ata eloko moke te. Mwa mokengeli na bango, oyo akalingáma malamumu te, azali wana, sima na eteyelo, azali kobanga kozanga lifúti na ye mokolo moko, to sani ya mapa ya mike.

¹⁰⁵ Yoka, ndeko, ezali malamumu koleka mpo na ngai koteya Nsango Malamumu, pe kolia lipa ya kokauka pe komela mai ya mpamba, kasi koloba bobele Solo. Ata bandimi nyonso ya losambo na ngai batelemi pe babimi, nakoyebisa bango bobele Solo. Iyo, ezali bongo.

¹⁰⁶ Likambo nini? Oh, yango nde eleisaka ye. “Ee, boyebi, nazali mokengeli ya losambo monene koleka na engumba oyo.” Bino ba-Baptiste ná ba-Methodiste, bozali koyoka mosakoli ya lokuta. Sikawa, ezali makasi, kasi eloko nyonso oyo eteyaka makambo kokesana na Biblia oyo ezali mosakoli ya lokuta. Ata bangengisi yango ndenge nini, ezali lisakoli ya lokuta. Ya solo.

¹⁰⁷ “Oh, makambo nyonso ezali malamumu, lokola nkombo na yo ekomámá na buku.” Nkombo na yo ekoki na yango kokomama na ba-buku zomi na mibale. Soki ekomami na Buku ya Bomoi te, obungi! Okoki kozala moto malamumu mpenza, okoki kozala sémbó, peto pe na bomoto mpenza, ekozala na ntina ata moke te.

¹⁰⁸ Esau alekaki Yakobo mbala mibale, na kozala na bomoto, azalaki kobatela papa na ye oyo miso na ye esilaki kokufa pe nyonso wana. Kasi Yakobo azalaki mwa mokosi moko oyo azalaki ntango nyonso pembeni na mama na ye, mwana mobali lokola mwasi. Kasi Nzambe alobaki: “Nalingi Yakobo pe naboi Esau,” liboso na bana yango mibale kobotana. Baroma 8 elobi bongo. Ezali mpenza ya solo.

¹⁰⁹ Nzambe ayebi eloko nini ezali kati na moto. Pe, Ayebi eloko nini ezali kati na lingomba. Tozali kobika na Lipa ya Bomoi, Lipa ya Liloba na Nzambe. Sikawa, yango wana tozali ebongiseli te.

¹¹⁰ Sikawa, nalingi kopesa bino lisusu moke. . . Nalingi kopesa bino ndakisa moke nakomaki awa. “Monene. . .” Sikawa, na Emoniseli, na 19:2. Nakomaki likambo moko awa. Nalingi kotala pe komona nini yango ezali sikawa.

Mpo ekateli na yo ezali solo pe sembo; mpo apesi etumbu na mwasi ya ndumba monene, oyo abebisaki mokili na pité na ye, pe azongiseli loboko na ye mabe mpo na makila ya baombo na ye. (Wana nde suka ya lingomba Katoliko.)

¹¹¹ Sikawa, tolingi lisusu komonisa bino polele awa lisusu, ete ebongiseli—ete ebongiseli, etalisami lisusu awa, na Makomi, ete. . . Biblia elobeli ebongiseli ata moke te. Bibongiseli euti na lingomba Katoliko. Yango nde mama ya liboso ya bibongiseli, bongo ebongiseli moko na moko eyaki moko sima na mosusu. Sikawa, likambo oyo ekoswa mwa moke. Ekokoba koswa moke-moke wana tozali kokoba, bomoni. Kasi na—nalingi komonisa bino ete bibongiseli ebótamaki pe etiamaki na Nzambe te. Ebandisámáki na Zabolo.

¹¹² Lingomba na Nzambe ezali. . . Tokabwáni te, biso nyonso tozali nzoto moko; moko na elikya pe malakisi, moko na bolingo. Yango nde Lingomba na Nzambe ya bomoi. Ata ndenge nini, makambo yango nini, elongo tozali moko! Ya solo. Ata azali Methodiste to Baptiste, ndeko, soki abotámi mbala mibale pe atondisámi na Molimo Mosantu, azali ndeko na ngai. Totambola elongo loboko na loboko. Ya solo. Iyo, misie. Ezali na bokeseni ata moke te.

¹¹³ Mose. Mbala mingi natalaka zinga zinga pe elobamaka: “Oyebi etonga ya bilandálanda ya ba-Pantekotiste wana, Ndeko Branham, okendaka koluka nini na bato ya ndenge wana?” Boyebi nini? Mose atalaki bana ya Yisalaele. Atalaki bango longwa na lininisa moko oyo Fálo azalaki kotala. Fálo amonaki bango lokola etonga ya bapoti-potopóto, kasi Mose amonaki bango lokola baponami ya Nzambe. Ayebaki ete bazalaki na elaka. Mpo na nini? Ayebaki yango na nzela na Liloba. Pe na kondima. . . Abelemaki na ngwende mpo na kokóma Fálo, kozala na mokili mobimba na nse ya makolo na ye; ekofanda ye wana, bakosopela ye vinyo na monoko, pe basi kitoko bazali kopepa ye, lokola mokonzi monene, to mokonzi-na-nko, to mokonzi ya mokili, elenge Mose, na mibu ntuku minei, azalaki na yango na loboko na ye. Atalaki etonga yango ya bapoti-potopóto, kasi ayebaki ete azalaki moko na bango. Aleluya! Ezali bongo. Ayebaki ete azali moko na bango. Pe aponaki bobele na kondima!

¹¹⁴ Moto nyonso asengeli kopona. Bosengeli kopona. Bokopona sikawa. Bokopona na ntongo. Bokopona lobi na mpokwa, soki bozali na bomoi. Na ntango moko, bosengeli kopona. Ndeko, ngai nasílá kopona eleki ntango molai. Biblia ezalaki dictionnaire na ngai. Biblia oyo ezalaki Buku na ngai ya Bomoi. Biblia oyo ezalaki Liloba na Nzambe. Nazali kobika na nzela ya Biblia. Natelemi ngwi na nzela na Biblia oyo.

115 Yango wana, Mose atalaki bana ya Yisalaele. Pe asukaki te koloba: “Oh, bazali bato malamu. Naboi bango te. Oh, te, nakoki koloba mabe na bango ata moke te.” Bato mingi basalaka nde bongo lelo. “Oh, ba-Pantekotiste wana ná bato oyo bazali na Molimo Mosantu, ná bato oyo bandimaka lobiko na nzoto kouta na Nzambe, oh, ngai na—na—naboi yango te.” Kasi Mose azalaki bongo te. Asundolaki Ezipito mpo na kokóma moko na bango. Akendeki kati na bandeko na ye. Azalaki moko na bango.

116 Ndeko, nzela wana nde ngai nazali kolanda. Nakotambola elongo na etonga moke ya batiolámi ya Nkolo, ata bazala ndenge nini. Bazali na elaka, pe namoni ba-nkombo na bango kati na Buku ya Bomoï ya Mwana Mpate. Bazali bandeko na ngai. Ya solo. Poná pe zua ngámbo na bango. Bázala na solo to na libunga, zalá bobele wana. Soki bazali na libunga, sungá bango kozonga na solo. Ya solo. Okosunga bango ata moke te soki onyokoli bango. Bomonï, meká kobimisa bango na mabe.

117 Charlie, ndenge balobelaki Ndeko Allen, na ntina na móto oyo bango. . . makila na maboko. Nalobaki: “Ata mbala moko te, ata mbala moko te, nazángá komemia A. A. Allen.” Nalobaki: “Soki nakokaki koteya lokola A. A. Allen, nalingaki ata kosala mayangani ya lobiko na nzoto te.” Sikawa, koboya kondima ete makila na maboko ezali ndanga ya Molimo Mosantu, wana nakondima yango te. Kasi mpo na bondeko, azali ndeko na ngai. Kati na etumba, tokosimbana simbisi elongo. Ya solo. Soki azali na libunga, nakomeka kosunga ye. Pe soki ye azali na libunga te, soki ngai nazali na libuga, nalingi ete ásunga ngai. Pe ndenge wana nde—nde tokokende liboso. Sikawa bótala malamau awa.

. . . azalaki *LIBOMBAMI, BABILONE. . . MAMA YA BASI YA NDUMBA. . .*

118 Sikawa, bozali komona ndenge lingomba lelo, baninga, bozali komona ndenge mangomba oyo ya lelo bakómi kobika ndenge balingi? “Nyonso ebongi be, bokende se liboso”, ngulu azali kolia ngulu, bazali kokeba na yango te. “Ee, kosala bongo ezali mabe te. Ee, ezali koluka kozala lokola bato ya kala.” Sikawa bótala malakisi na bango. Sikawa nalingi. . . Sikawa bótala malamau. Ezali nde momesano na bango. Bomonï, eleki mibu mingi te, bobele lingomba Katoliko nde ezalaki kopesa nzela ya kokende na cinéma? Lingomba Methodiste bakokaki kokanisa likambo ya bongo te. Bibongiseli nyonso wana: “Te! Oyo wana ezali misala ya Zabolo.” Namitunaka likambo nini esalemaki? Iyo, misie.

119 Pe boyebi, bokamata ndakisa, bilenge basi ya Katoliko, bakómaki kolata mwa. . . (Sikawa, bamosusu kati na bino, baoyo bakóli lokola ngai. . . bakómaki kolata mwa bilamba oyo ekómaka likolo na mabólóngó. Moto yango, nakanisi, azali na lífelo, na mpokwa oyo. Nayebi te. Nazali zúzi na ye te. Kasi ntango ayembaki mwa loyembo ya bosoto wana ya

liboso, oyo elekaki na radio, kozanga kopekisama na bato na mibeko, “Bólinga yango, bilenge basi, bólinga yango; bókitisa yango pe bólakisa mabólóngó na bino ya kitoko.” Bato boni bamikaniseli yango, ntango ebimaki mbala ya liboso, eleki mibú? Eloko mabe ya liboso balekisaki ezalaki yango. Ya solo. Bongo ntango bazuaki moto wana ya Texas, babimisaki basi libanda pe basalelaki bango bilamba ya nse mpo na kokomisa bango lolenge ekokanaki na bango te, ná makambo ya ndenge wana, pe batikaki bango ndenge wana. Bongo sikawa, esali nini? Ekobaki kokoba mabe na mabe. Ezali molimo.

¹²⁰ Moto moko azalaki kosolola na ngai, mokolo moko. Alobaki: “Nayebi te soki nakosala nini. Nazali na mwana mobali ya malamau pe ya sembo, kasi mwana yango akómi kozua eloko nyonso ezali kokweya na maboko na ye.”

Nalobaki: “Mpo na nini?”

“Akómi moninga ya moyibi moko.”

¹²¹ Soki otámboli na moyibi, yo moko pe okokóma moyibi. Mobange mama na ngai ya Kentucky, azaláká koloba: “Soki olali elongo na mbwa oyo azali na nsili, okolamuka pe ná nsili.” Soki ozwi mwa—mwasi mabe, pe, otiki elenge mwasi. . . pe otii ye elongo na e—elenge mobali ya malamau, mbala moko akokóma mabe lokola mwana mbwa. To mobali mabe ná mwasi malamau. Okoyebana na nzela na baninga na yo. Bókabwana! “Bimá kati na bango,” Biblia elobi, “bókabwana!” Ya solo.

¹²² Soki bibongiseli na bango ezongi na libebi ya boye, lokola kotika bandimi na bango. . .Ee, mokolo moko awa, na losambo moko Baptiste moko monene pe ya kitoko, basengelaki kobimisa bato. Moto yango akokaki koteya bobele miniti ntuku mibale, mpo mokengeli asengelaki komela likaya. Losambo mobimba babimaki libanda. Bango nyonso na molongó, na libanda, bazalaki komela makaya, na sima bazongaki na kati, mokengeli ná bato nyonso. Nakendeki na lingomba ya ba-Congregationaliste, mobali moko atelemaki wana, alataki monkóto ya molai, atelemaki wana, alobaki, ayékamaki na eteyelo *boye*, azalaki koteya likolo na félele oyo amonaki na ngomba. Yango nde liteya mobimba, na sima, abimaki libanda. Pe misapi na ye ekómaki motane ngwa mpo na mólinga ya makaya. Iyo. Pe abandaki kolobela basi, na mibali baoyo balingaki kobeta. . .Lisano yango nini bato ya mboka Allemagne, babetaka, oyo ba—bakabolaka ba-kálati, boyebi? Ezalaki na. . .Oh, nakanisaki nakomikanisela yango. Belóte, balingaki kobeta lisano ya belóte. Nakanisi ezali bongo. Iyo, ezali kuna nde basalaka yango. Ezali lisano basalaka na bakálati. Lisano ya belóte, na eteni ya ndako ya nse! Mawa mingi! Kuna nde esika moboko na yango ezali. Bokamwa te! Ezali nini? Basalaka bongo, na sima bakómi kotelemela lingomba Katoliko na mongongo makasi ntango bakendeke na

bisika ya Rotary mpo na kobeta loterí. Ee, bino ba-Protestant, bozali bobele na mbindo lokola bango, bongo bokoloba nini mpo na yango? Nzungu ekoki koloba na mbilika te ete ezali na “bosoto”. Ata moke te. Bozali kosala bongo, na sima bolobi: “Ee, ngai nazali Presbiterien. Ngai nazali Methodiste.” Ozali eloko te soki naino obotami mbala mibale te. Ya solo. Pe ntango bosalaka bongo, boyebaka. Eloko moko kati na bino eyebisaka bino ete makambo wana ezali mabe, ntango wana nde bokolonga yango, na ntembe ata moke te. Boyebi ete ezali Solo. Na ntembe te. Iyo, misie. Bolandaka makambo ya ndenge wana. Mpo na nini?

. . . *MAMA YA BASI YA NDUMBA* . . .

¹²³ Moko na mikolo oyo, mama mobange wana akoloba: “Boyebi? Sima na manso, molingami, biso nyonso tozali kaka ndenge moko.” Pe boyebi likambo nini ekosalama na sima? Lisanga ya Mangomba bakosangana bango nyonso elongo ndenge bazali lelo. Pe boyebi eloko nini ekokómela etonga moke lokola oyo? Bokofuta mpo na yango, bandeko. Ezali mpenza solo.

¹²⁴ Kasi bómitungisa te, Mwana Mpate akolonga ye. Mpo ete Azali Nkolo na nkolo, pe Mokonzi na bakonzi, pe Nzambe akokamba Lingomba na Ye, ebongiseli nde te. Akosopa Mafuta ya wólo ya Molimo Mosantu likolo na Lingomba yango. Ndeko, Móto ekokita longwa na Likolo, bilembo pe bikamwa oyo bomoná naino te liboso, ekosalema. Iyo, misie. “Kobánga te, etonga moke, Tata na bino aseveli kopesa bino Bokonzi.” Iyo, misie. “Ye oyo akoyika mpiko kino na suka!” Yango mpenza. Bókoba kotambola na nzela. Mitó na bino étala bobele na Kalvari. Biblia oyo ezali solo. Bómitungisa te.

¹²⁵ Sikawa bóতা malamú. Ezali na moko na mimesano oyo bazali na yango. Moko na bizaleli oyo bazali na yango. Tokoki pe kobakisa. Na mbala moko, emikotisaki na mangomba Protestant. Na sima, basi ya Katoliko bakómaki ko. . . Ee, kolata ba-kupé ya mokuse ezalaki na yango mabe te, ntango nyonso bakendeke na losambo pe balátaka litambala moke na motó. Lolenge moko ya mimesano: “Kolia mosuni mokolo ya mitano te.” Pe, oh, likambo ya kolata litambala na motó mpo na kokota na losambo bozui yango wapi? Nalingi bólakisa ngai Likomi yango. Ezali lisakoli ya lokuta. Ekomami wapi ete na losambo, osengeli kolata ekoti na losambo? Ntango olati ekoti na motó na yo, ozali koyokisa Klisto nsóni, ya solo; nazali kolobela nde mibali. Bino basi, bozali na ezipeli, kasi nabeti ntembe na moto nyonso akoki kotalisa ngai esika ezali ekoti to litambala. Ezali suki na bino! Kasi bokati yango nyonso. Sikawa, bolobi nini mpo na yango? Oh, balobaka: “Ezali makambo ya kala.” Soki ezali bongo, ezali Biblia! Pe Liloba na Nzambe nde ezali solo.

¹²⁶ Eleki ntango molai te, nazalaki kolobela mwasi oyo asukolaki makolo ya Yesu, pe asalelaki suki na ye, boyebi, mpo—mpo na kopangusa yango. Nalobaki: “Nzela bobele moko mpo

mwasi akoka kosala yango, ezali ete átelema motó na nse mpo suki na ye ékoka kosukola makolo na Ye, kopangusa yango.” Ya solo. Oh, ezali, ezali nsóni, komona lolenge . . . Bótala, na ntango ya malili makasi, bango bazali kotámbola ná mwa elamba ya moke ndenge wana, mpo na kotálisa nzoto na bango polele.

127 Sikawa bokoloba: “Mpo na nini otelemelaka basi?” Esengeli mpenza kotelemela bino.

128 Bongo bino mibali oyo botikaka basi na bino kosala bongo, ndeko, na—nayebi te nini nasengeli kokanisa mpo na bino. Sikawa, ezali solo.

129 Bongo bino bakengeli, nandimi te ete bozali awa. Kasi soki bomoni moto yango, bóyebisa ye áyá, bóyebisa ye, áyá komona ngai. Bomoni? Soki azali lisusu na limemia te mpo na Klisto mpo na kotika losambo na ye kosala makambo wana kozanga . . . Sikawa ye . . . Bakoki kosala yango kuna, sima na ye, kasi soki ayebisi bango eloko moko te, alongobani kozala mosali ya Yesu Klisto te. Ezali mpenza ya solo. Alongobani kozala mosali ya Klisto te. Mosali ya Klisto asengeli kobanga te, soki esengeli kobundela Biblia. Ya solo. Kasi, ata bongo, bango wana, bazali kokoba kokende kosala yango.

130 Na sima, noki-noki, ba-Protestant basengelaki kosala ndenge moko. Bino ba-Methodiste ya malamú, bino ba-Baptiste, pe bino ba-Presbiterien, to ba-Nazareen, ba-Pelerin ya Bosantu, pe bino nyonso. Ndenge moko, bomikotisasi na makambo yango, bokeseni ezali ata moke te. Yango mpenza: “Mama ya basi ndumba.” Ebongiseli na bino: “Lokola babandaki yango na quartier general, bokeseni ezalaki nini?” Bomoni? Ekosala bokeseni monene mpenza. Ebandaki na Quartier General oyo *wana* ata moke te. Ntango mosusu ebandaki na quartier general na bino awa na nse, kasi Oyo ya Likolo te. Ezali kotala esika yo outi. Ya solo.

131 Sikawa, nandimi te ete tozali na ntango ya kolobela likambo mosusu oyo, ntango mosusu ekozala malamú koleka kobómba yango mpo na lobi na ntango. Malamú, tózua likambo ya mokuse oyo. Awa, tozalaka na “libatisi na mai”. Tozalaka pe na “kobongisama liboso”, pe, oh, makambo mingi. Na bongo, tózua bobele likambo oyo, likambo moke oyo, likambo mokuse oyo, ya “basi batei”, tólobela yango.

132 Sikawa, sikawa, mwasi motei, naboi koyokisa yo mpasi na motema, kasi nalingi koyebisa yo likambo moko. Ozali na eteni moko te ya Likomi, ata moko te na Biblia. Iyo, nayebi epai bolobelaka, pe nasílá koyoka yango nyonso, iyo: “Pe bana na bino ya mibali pe ya basi bakosakola.” Sikawa, soki mokengeli na bino ayebi te ndimbola ya liloba oyo “kosakola”, a—ayebi eloko moko te. Azali mpenza na mosala moko te na eteyelo, ezali ye komeka kokomisa yo kozala motei. Bomoni? Mpo ete

likambo yango, na ntembe te, ekweisami longwa na Genese kino na Emoniseli. Sikawa, nakoyebisa bino yango, bomoni.

¹³³ Sikawa nalingi ete bózua elongo na ngai Timoté ya Liboso 2:11. Bózua yango pe tokoyeba yango sikawa, pe tokolobela yango lisusu awa, likambo na bino ya Misala 2. Iyo. Pe bóyoka malamú—malamu nini Likomi elingi koloba awa na likambo yango.

¹³⁴ Sikawa, moto moko akobaki koloba: “Ee, Ndeko Branham, ozali mobange oyo ayinaka basi.” Ngai nayinaka basi te. Nazali. . . Naboyaka komona basi oyo balukaka kozua esika na bango te.

Bobósani Howard Shipyard te, awa, moko na bisika oyo efúlúkí koleka, oyo basalaka masúwa, na Ebale ya Ohio? Mokonzi na yango azali mwasi. Bótala likambo nini esalemaki.

Bapesi basi makoki ya ko-voter. Bótala eloko nini esalemaki.

¹³⁵ Nakoyebisa bino likambo moko. Nalobelaka bobele basi te. Nalingi ete mibali bósosola ete bino pe bozuami kati na likambo yango. Kasi nakoyebisa yo likambo moko, ndeko. Ekólo oyo ezali ekólo ya mwasi. Nakotalisa bino yango na nzela ya Likomi, na nyonso oyo bokolinga ete étalisama. Yango oyo. Eloko nini ezali likolo na mosolo na biso? Mwasi. Azuami wapi? Awa na Emoniseli, bomoni ye. Motángo na ye ezali pe zomi na misato, biloko nyonso oyo abandísá: minzoto zomi na misato, minkoloto zomi na misato, ba-colonie zomi na misato. Zomi na misato, nyonso ezalaki zomi na misato, na ebandeli. Azuami na mokapo ya 13 ya Emoniseli. Mwasi: zomi na misato!

¹³⁶ Pe na 1933, ntango Nkolo. . . Ntango tozaláká koyangana awa, na esika Lingomba na Klisto ezali lelo, oyo ezaláká eyanganelo ya ba-Francis-macons, emononeli ya Nkolo eyelaki ngai kuna pe elobaki ete “Allemagne ekotelema pe ekotonga Etutú ya Maginot”. Bato mingi kati na bino bazali komikanisela yango. “Pe bakobátama kati na yango, pe ba-American bakobétama makasi esika wana, na etutú yango. Elobamaki ete likambo yango ekosalema, elobamaki mpo na Roosevelt ná bamosusu, ete akoponama kokamba mpo na mbala ya minei.” Ekokisamaki mpenza ndenge wana. “Pe elobaki ete mítuka ekokóba kozua lolenge ya líki, na lolenge ete na mikolo ya suka ekokóma mpenza lokola líki.” Pe nalobaki: “Na ntango moko, mítuka yango ekotámbwisa na yenda te. Eloko mosusu nde ekotámbwisa yango.” Ezali mítuka oyo bakómi kosala sikawa, oyo mokúmbi na yango azali mosika, mpo na kobatelama. Ya solo. Bokokoka kokota na engumba te. . . Na ntango wana, na esika ya kilometre ntuku misato na ngonga, okosuka bobele na ntuku misato. Okoki kotúta mótuka mosusu te, mpo mokúmbi na yango azali mosika. Bomoni, ezali koyá ndenge wana, pe sikawa esalemi. Pe nalobaki: “Bómikanisela, na ntango wana, liboso na ntango na suka kokoma, liboso na ntango na suka kokoma,

mwasi moko . . . Sikawa, bino banso bókoma likambo oyo. Mwasi moko ya nguya monene akoya, akozala to Mokonzi-ya-mboka, to mokonzi-ya-nko, to mwasi moko ya nguya monene awa na Etats-Unis. Pe ekokwea na nse mingi, mpo na makambo ya basi. Sikawa, bómikanisela ete ezali YANGO ELOBI NKOLO.” Bomoni?

¹³⁷ Ezali na libunga. Pe epesi nzela na nini? Bóyoka. Bózala bato ya molimo. Tika . . . Bófungola matoi. Bótala. Mpo na nini ezali bongo? Mpo na kobongisela lingomba Katoliko nzela ya kokóta. Bomoni? Bokúmbamelaka ba-vedéte ya cinéma ná makambo mosusu ya ndenge na ndenge. Bozali komikanisela liteya nateyaki? Margie, obosani yango te, eleki mibu mingi, na—na ntina na kokonzama ya Etats-Unis, mpo na kokweisa bokonzi ya Amerika. Pe nalobaki ete ayaki na Paris, sima na biso kobikisa bango kuna, na basi, vinyo ná makambo ya nsóni. Na sima, ayaki kokita na Hollywood. Sikawa, na esika na biso kokende kozua elateli na Paris, bango nde bakómi koya kozua elateli awa. Esalaki nini? Ekómi . . . Tozalaki kopekisa bana na biso kokende na cinéma, kasi akotaki na television, akobaki pe abebisaki makambo nyonso, abebisaki yango mpenza. Pe tala esika tokómi lelo: bana basi pe bana mibali nyonso, bango nyonso bakómi lokola basani ya television. Ezali nini? Ezali kobongisa nzela. Banninga, mwasi ya bomoi mabe moko akoki kotinda bato mingi na lifelo koleka bikalá nyonso ya lotoko bokoki kosangisa na engumba. Ya solo. Bótala ndenge azali kotambola na balabala pene na kozala bolumbu, mobali nyonso, ata nani, soki azali mobali na nzoto kolongonu, soki atali mwasi asengeli koyoka eloko moko kati na ye. Tala, bóloba sémbó. Ata . . .

¹³⁸ Nasilá kozua Molimo Mosantu eleki mibu ebele. Okoki kotala mwasi oyo azali pene na bolumbu te . . . Na—natiá ekulusu ya moke na mótuka na ngai, bato mingi kati na bino bamóná yango. Moto moko alobaki na ngai: “Ozali mo-Katoliko?” Esika nini ekulusu ekómá elembo ya ba-Katoliko? Ekulusu elingi koloba “Moklisto”.

¹³⁹ Ba-Santu Cecile ná bamosusu wana, yango nde ezali elembo ya bo-Katoliko. Bisó tondimaka makambo ya ndenge wana te. Tondimelaka Klisto. Bango basambelaka bato ndenge na ndenge oyo bakufa. Ezali mosánda ya likolo ya kisolóka. Ezali mpenza yango, kosambela bakufi. Eloko ya boye ezalaka te, te.

¹⁴⁰ Natunaki sángo yango. Nalobaki: “Mpo na nini, kasi, soki . . . Petelo azalaki pápa ya liboso?”

Alobaki: “Ezali bongo.”

¹⁴¹ Nalobaki: “Kasi mpo na nini Petelo alobaki: ‘Molobeli mosusu azali te kati na Nzambe ná bato, bobele Yesu Klisto Moto?’ Pe bino bozali na basi bakufa nkoto mitano, ná biloko mosusu, oyo bokómisa balobeli. Sikawa, likambo nini

esalemaki?" Yango mpenza. Bazali na eyano mpo na yango te. Ya solo.

¹⁴² Sikawa malakisi na bango mosusu, malakisi na bango ya lokuta, etonga ya basakoli ya lokuta ya ba-Protestant bayaki pe bazalaki koteya yango, pe bino ba-Protestant bozali komela yango. Ezali mpenza ya solo. Bibongiseli, ba-lolenge ya mabátisi, mibeko ndenge na ndenge ná bikelákela nyonso oyo bosalaka, ezali na yango ata moke te na Likomi. Makomi etelemeli yango, ata bongo bozali kotosa yango. Ezali ya solo.

¹⁴³ Sikawa báyoka likambo oyo, mpo na basi batei. Malamu. Timoté ya Liboso, nalingi kozua Timoté ya Liboso 2:11. Sikawa báyoka oyo Yango elobi awa.

Tika ete mwasi áyekola na kimia pe na botosi nyonso.

Nazali kopesa mwasi nzela ya koteya te, to ya kozala na bokonzi likolo na mobali, kasi áfanda kimia.

¹⁴⁴ Ngai moto nakomaki yango awa te. Kasi nazali na mokumba ya koyebisa bino ete ekomami awa. Bomoni? Bomoni?

Basi báyekola na kimia pe na botosi nyonso. (Soki osilá kokende na lingomba Ortodóxe pe kotala bango malamumu, bomoni. Bomoni?)

Nazali kopesa mwasi nzela ya koteya te, to ya kozala na bokonzi (kozala mokengeli, mosungi, to nani ndenge wana) *likolo na mobali, bomoni, kozala na bokonzi likolo na mobali kasi áfanda kimia.*

Mpo Adama asalemaki liboso, pe Eva na sima.

¹⁴⁵ Boyebaki yango? Sikawa báyoka, bino basi. Bino basi Baklisto ya malamumu, ya sembo, bozali eloko ya malamumu koleka oyo Nzambe akokaki kopesa na mobali, soki te, Alingaki kopesa ye eloko mosusu. Iyo, misie. Bomoni? Mwasi azalaki ata na kokela ya ebandeli te. Mwasi azali eloko oyo Nzambe akelaki te. Azali eloko oyo eutaki na mobali. Nzambe asalaki mobali, mbala moko mobali pe mwasi. Pe Akabolaki bango. Pe sima na mobali kobika na mokili, kopesa nkombo na ba-nyama pe kobika awa ntango molai, Alongolaki mokúwa moko na mopanzi ya Adama, lokola eloko euti na mosusu, pe Asalaki na yango mwasi. "Adama asalemaki liboso, Eva na sima." Sikawa, bótala malamumu.

Lisusu, Adama apengwisamaki te, kasi mwasi, ntango apengwisamaki, abukaki mobeko.

¹⁴⁶ Nzambe azuaki mobali. Zabolo azuaki mwasi. Bótala likambo yango na miso, oyo ezali kosalema lelo. Bótala Lingomba ya solosolo ya Nzambe, ekoloba: "Yesu!" Motemeli-na-klisto akoloba: "Maria!" Bótala milimo yango malamumu. Bomoni? Bango wana. "Maria losako, mama wa Nzambe, abenísi yo yambo ya basi banso, sambela mpo ya biso basumuki, sikawa pe o ntango ya liwa lya biso. Amen. Maria, sambela!" Oh, mawa!

Bomoni, yango mpenza, “mwasi”, eloko ya Zabolo. Klisto, eloko ya kokumbamela, pe bobele Moko! Yango mpenza. Yango mpenza.

¹⁴⁷ “Adama asalemaki liboso, Eva na sima.” Adama apengwisamaki te. Bongo ndenge nini bokoki kozala na mokengeli to mosungi ya mwasi? Adama moto apengwisamaki te, kasi mwasi moto apengwisamaki. Ye mpenza. Akanisaki te ete azalaki na libunga, kasi azalaki na libunga. “Mwasi, ntango apengwisamaki, abukaki mobeko.” Mpo na ye, mbala nyonso ku—kundá—ebembe elekaka na balabala, ezali mpo na mwasi. Mbala nyonso bebé moko agangaka, ezali mpo na mwasi. Mbala nyonso moto akufaka, ezali mpo na mwasi. Suki nyonso ya pembe, ezali mpo na mwasi. Nyonso, kufa, ezali mpo na mwasi. Eloko nyonso ya mabe, ezali mpo na mwasi. Bongo bátia ye mokonzi ya lingomba, mokengeli, oh, ntango mosusu episkopo. Nsóni na ye.

¹⁴⁸ Sikawa, nakomema bino na eteni mosusu, na ntango moke. Bomoni? Sikawa tózua Bakolinti ya Liboso 14:32, mpo na komona likambo Polo alobi awa, na sima tokozua lisusu biteni mosusu, na ntango moke. Kasi tolingi koumisa bino ntango molai koleka te, mpo soki bolembi mingi, lobi na ntongo, bokokoka lisusu koya te. Malamu. Nalingi kotánga. Bato boni bandimi ete Polo azalaki molakisi oyo apemelami? Sikawa, bómikanisela, Polo moto akomelaki pe Timoté likambo oyo. Bomoni? Na bongo, tózua Bakolinti ya Liboso 14:32. Sikawa tóbanda awa, tóbanda kotánga awa, 14:34, nakanisi.

Basi báfanda kimia na ba-losambo: . . .

¹⁴⁹ Boyoki eloko alobi?

Basi báfanda kimia na ba-losambo: mpo bapesi bango nzela ya koloba te; kasi basengeli kozala na botosi, . . .

¹⁵⁰ Bakomi likambo moko pembeni na lokasa mpo na yango? Soki bakomi, tánga yango mpo na komona soki ekozala Genese 3:16 te. Ntango Nzambe alobaki na Eva ete, lokola ayokaki nyoka esika ya mobali na ye, mobali akokonza ye na bomoi na ye mobimba. Ndenge nini mwasi akoki koya pe kokonza mobali, kokóma mokengeli to mosungi, wana Biblia elobi ete asengeli “kotosa”, ndenge ezalaki na ebandeli? Ntango A. . . Nzambe—Nzambe akoki kobongwana te. Bokoki kosala te ete Liloba éloba eloko moko *awa*, bongo éloba eloko mosusu *kuna*. Ekosala bongo te. Ezali likambo moko ntango nyonso.

¹⁵¹ Na bongo, na ebandeli, ezali nde kuna, liboso ya kosilisa likambo oyo, soki nazui libaku malamumu, nalingi kosembola likambo yango ya *Libala Pe Koboma Libala* mpo na bino. Nasálá yango naino te na losambo oyo. Kasi bótala boyokani mibale oyo malamumu. Moko elobi ete mwasi akoki kobala; mosusu elobi ete bakoki kobala te; pe oyo alobi *boye* na *boye* to *boye*. Bózela moke,

pe bokomona oyo Biblia elobi, ntango tokokóma wana. Bomoni? Malamu. Sikawa, bótala malamau awa.

Basi báfanda kimia na ba-losambo: . . . bapesi bango nzela ya koloba te; kasi basengeli kozala na botosi, ndenge mibeko pe elobi.

¹⁵² Bongo, na Kondimana ya Kala, bazalaki na ndingisa ya koloba te, mpo ete Polo alobaki awa ete bazalaki na yango te. Ezali solo? “Basi na bino báfanda kimia. Ezali botosi.” Sikawa, soki botángi eteni oyo ekomami pembeni na lokasa, ekozongisa bino na Genese 3:16. Bomoni? Malamu. “Na nse, lokola na ntango ya mobeko.”

Soki ba . . . koyeba likambo, ya bango . . . bátuna— bátuna mibali na bango . . . na ndako; mpo ezali nsóni mpo na mwasi áloba na ndakonzambe.

Nini? . . .

¹⁵³ Sikawa bótala elembo ya motuna wana na moko na moko na ba-Biblia na bino mpo na “Nini?” Eloko nini esalaki ete Polo áloba bongo pe ásala bongo? Sikawa, soki bokoki kozua mikanda oyo Bakolinti bakomelaki Polo. Sikawa, bokoki komona yango na bibliothèque nyonso ya malamau, bomoni, makambo Bakolinti bakomelaki Polo. Bakomaki pe bayebisaki ye makambo basi oyo babongwanaki . . . Bazalaki na—na nzambe moko ya mwasi kuna, na nkombo ya “Diane”. Azalaki pe nzambe ya Efese. Bakolinti bazalaki kokumbamela ye, mpo ezalaki kokumbamela ya bapakano. Pe mokolo moko bamonaki libanga moko na elanga, ezalaki na lolenge ya mwasi. Balobaki: “Nzambe azali mwasi, pe akitiseli biso elilingi na ye.” Pe tempelo na bango ezalaki kitoko koleka tempelo ya Salomo, ndenge ba-historien balobaka. Oh, etongamaki mobimba na libanga ya marbre oyo batii biteni ya wolo, kasi tempelo ya Salomo etongamaki na mabaya ya cédre oyo batii biteni ya wolo. Bomoni? Elekaki yango na kitoko. Na bongo, soki Nzambe azalaki mwa—mwasi, ee, na ntembe te, akokaki kozala na banganganzambe ya basi. Na ntembe te, soki Nzambe azali mwasi, boye ezali mabe te kozala mwasi motei. Kasi, Nzambe azali Mobali. Biblia elobi ete Azali Mobali, pe Azali Mobali. Bomoni? Pe soki Nzambe azalaki Mobali, na bongo esengelaki kozala mibali.

Sikawa, bótala awa: “Nini?”

¹⁵⁴ Sikawa, banganganzambe-basi mosusu, ntango babongwanaki longwa na bopakano kino na Boklisto, bakanisaki ete bakokaki kobatela mosala na bango ya batei, kokoba na yango na ngámbo oyo. Soki kuna bazalaki koteya Diane, eyei bango na ngámbo oyo bakoteya Klisto.

¹⁵⁵ Alobaki: “Nini? Liloba na Nzambe eutaki nde epai na . . .” Boyoka naino Likambo oyo. Ndeko, ndenge nini batei bakoki kosala bongo? Molongo ya 36.

Nini? Liloba na Nzambe eutaki nde epai na bino? to eyaki bobele epai na bino?

Soki moto akanisi ete azali mosakoli, to soki azali na molimo (esengeli ata kozala mosakoli te; bobele moto ya makanisi ya molimo), ándima ete makambo oyo nakomeli bino ezali mitíndo ya Nkolo. (Bondimi yango?)

Kasi soki te, soki moto atioli yango, botika ye átiola.

¹⁵⁶ Sikawa, nakoki koloba yango polele koleka te. Bomoni? Alobaki: “Soki moto azali na molimo, to mosakoli, ándima ete likambo oyo nakomi awa ezali Mitíndo ya Nkolo.” Kasi, alobaki: “Soki a—soki akotiola yango, bótika ye átiola.” Bomoni, likambo se moko bokoki kosala. Soki balingi kokoba na yango, bótika bango kokoba, mpamba te, amonaki yango kobanda wana.

¹⁵⁷ Mwasi moko ayebisaki ngai, alobaki: “Oh, Polo azalaki bobele moyini ya basi.”

¹⁵⁸ Azalaki moyini ya basi te. Boyebi, Polo azalaki ntóma, mpo na Lingomba ya Mabota. Bótala awa. Boyebaki ete Polo. . . Bato boni bandimi ete yango nde Polo ateyaki? Yango nde oyo a—alobaki awa? Pe Polo alobaki. . .

¹⁵⁹ Bokoloba: “Ee, zela moke, Ndeko Branham. Zela moke! Sikawa, episkopo na biso alobaka ete ezali mabe te. Mokengeli mokonzi ya ba-Assemblée alobaka ete ezali mabe te. Episkopo ya ba-Unitaire alobaka ete ezali mabe te.”

¹⁶⁰ Makambo bango balobaka etali ngai te. Ezali lokuta! Pe nayebisaki bino ete tokofandisa yango malamau. Pe basakoli ya lokuta balobaka bongo. Mpo Biblia elobi: “Soki moto akanisi ete azali na molimo, to mosakoli, ándima ete oyo nalobi ezali Mitíndo ya Nkolo.” Pe soki molimo na ye etatoli Liloba yango te, mpo na kobanda, azali mosakoli ya lokuta. Malamau mpo na ngai kozala moyini ya basi esika ya kozala molingi ya basi, mpo na kopesa nzela na makambo ya ndenge wana, mpo na kondima makambo ya ndenge wana na Lingomba ya Nzambe, makambo oyo ekeseni na mibeko ya Nzambe. Pe Polo alobaki. . . Bózua Bagalatia 1:8. Polo alobaki: “Soki Mwanje ya Likolo atei nsango mosusu kokesene na oyo ngai nateyaki bino, álakelama mabe.” Sikawa, bokosala na Yango nini?

¹⁶¹ Sikawa bokoloba: “Bolobi nini esika Ekomami: ‘Bana na bino ya mibali pe ya basi bakosakola’, na Jowéle, pe—pe esika Petelo atángaki na Mokolo ya Pentecote?” Ezali mpenza ya solo.

¹⁶² Boyebaki ete, na Kondimana ya Kala, nzela bobele moko, ezali pe nzela bobele moko sikawa, mpo na moto kokota na boyokani, na nzela na, na nzela ya Abraham, ye moto apesamelaki elaka, pe e—elembo ya elaka ezalaki na nzela ya kokatama ngenga. Bato boni bayebi yango? Yango nde ezalaki litatoli ya Nzambe.

163 Lokola ndeko moko ya Baptiste alobaki: “Ndeko Branham, ee, biso ba-Baptiste tozuaki Molimo Mosantu.”

Nalobaki: “Bozuaki yango ntango nini?”

Alobaki: “Na ngonga oyo tondimaki.”

164 Nalobaki: “Polo alobaki: ‘Bozuaki Molimo Mosantu sima na bino kondima?’” Bomoni? Nalobaki: “Sikawa, bino ba-Baptiste, bóya kozua Yango, mpo tósolola ná bino na ntina na kobatelama ya Seko.” Nalobaki: “Kasi, ee, bozuaka Yango wapi ndenge wana?” Bomoni?

165 Alobaki: “Bozuaki Yango *sima* na bino kondima?” Bazalaki bandimi, bazalaki kogánga, kosepela pe makambo nyonso mosusu. Bazuaki naino Molimo Mosantu te. Polo alobaki ete bazalaki na yango te. Bomoni? “Bozuaki Molimo Mosantu sima na bino kondima?”

Balobaki: “Toyebi te soki Molimo Mosantu ezalaka.”

Alobaki: “Bongo bobatisamaki ndenge nini?”

166 Balobaki: “Tobatisamaki.” Kasi, ezalaki na libunga, bomoni. Bongo asengelaki kobatisama lisusu. Malamu.

167 Sikawa, bótala likambo oyo malamu, basi batei oyo, ntango bayaki, bakanisaki ete bakosalela bokonzi na bango. Kasi kosala bongo, Nzambe apesi yango nzela ata moke te. Pe tika . . . wana tozali kolobela likambo yango, ya basi, bomoni. Sikawa, mpo na yango, alobaki: “Soki moto moko kati na bino azali na molimo, to mosakoli, ándima ete likambo oyo nakomi ezali Mitíndo ya Nkolo. Kasi soki atioli yango, bótika ye átiola.” Yango wana . . . mongombo oyo endimaka te pe ebúlisaka basi batei te, basi basungi te, to epesaka pe te mwasi mosala moko kati na losambo oyo, ezali mpo Likomi oyo ezali awa pe ezali polele.

168 Sikawa, Biblia mpenza elobi: “Bana na bino ya mibali pe ya basi bakosakola.” Sikawa, liloba oyo *kosakola* elingi koloba nini? Bóluka ndimbola na yango. Ezali “koloba likambo, na nse ya mpemela,” to “koloba likambo liboso”. Ezali liloba moko na ndimbola ebele.

169 Ezali lokola kobulisama elingi koloba “kopetolama, pe kotiyama pembeni mpo na mosala”. Bomoni? To, ezali liloba na ndimbola ebele, elingi koloba makambo ebele, ndenge tozali na ndakisa ebele awa, na Ngelesa.

170 Ndakisa, tózua liloba oyo “board” [na Ngelesa—N.D.T.]. Ee, *board* elingi koloba nini? Bokoloba: “Ee, alingi koloba ete afutaki *mbongo* na ye [na Ngelesa: board].” “Te, bongo te. Alingaki koloba ete *atobolaki* [na Ngelesa: bored] lidusú.” “Te, bongo te. Alingaki koloba *atungisaki* [na Ngelesa: bored] ye.” To, bomoni, liloba se moko, osengeli koyeba likambo ozali kolobela. Bomoni?

171 Ezali pe bongo mpo na liloba oyo ezali na ndimbola ebele oyo, epai elobami: “Bana na bino ya mibali pe ya basi bakosakola.” Sikawa, nzela moko mpo Nzambe. . .

172 Mo-Baptiste wana alobaki: “Ee, biso tozuaki Molimo Mosantu.” Nalobaki. . . “Kaka ntango tondimaki yango.” Nalobaki. . . Sikawa, bomoni, alobaki: “Nzambe apesaki Abraham. . .” Alobaki: “Abraham andimelaki Nzambe.” Alobaki yango ndenge wana. Alobaki: “Abraham andimelaki Nzambe, pe atángamaki moyengebene.” Bato boni bayebi ete ezali solo? Sikawa, bótala ndenge—ndenge Satana akoki kokotisa yango na bopete kati na ndeko. Bomoni, ezali mpenza pete. Sikawa, yango ezali Makomi.

173 Ndeko, yoka: awa na eteyelo, osengeli kopakolama liboso ya komata awa. Osengeli kokota na esika ya nkukú mpo na kobondela. Bato balobaka: “Mpo na nini okendaka kotala bato te?” Ndeko, soki olingi koteya bato to kopesa bango malakisi, ezali malamumu koleka mpo na yo kozala yo moko, ná Nzambe, mpo na ntango moke, liboso na yo komata na eteyelo. Ya solo, bomoni, mpo Satana azali na mayele mabe, mayele mabe mpenza.

174 Bongo, alobaki, bótala malamumu, alobaki: “Abraham andimelaki Nzambe, pe atángamaki moyengebene.” Ya solo. Alobaki: “Bongo, Abraham, eloko mosusu nini akokaki kosala libanda na kondima?”

Nalobaki: “Yango nde nyonso akokaki kosala.”

175 Alobaki: “Yo, to moto mosusu, okoki lisusu kosala nini koleka, libanda na kondima?”

176 Nalobaki: “Yango nde nyonso tokoki kosala. Kasi tala, ndeko, na sima Nzambe azongisaki bondeko, to andimaki kondima ya Abraham. Apesaki ye elembeteli, elembo ya kokatama ngenga, lokola elembeteli ya boyokani. Bomoni? Apesaki ye. Alobaki: ‘Sikawa, Abraham, Nakondima kondima na yo, boye Nakopesa yo elembo sikawa mpo na kotalisa ete Nayambi yo.’”

177 Bongo, Akataki Abraham ngenga, pe ezalaki elembeteli ya boyokani. Pe sikawa, lelo. . . Sikawa, mwasi akokaki kozala kati ya boyokani yango te; bobele mwasi ya libala. Bóluka yango: bakokaki kokata mwasi ngenga te; na bongo, basi basengelaki kokota, mpo, ye ná mobali na ye bazali moko. Bazali lisusu mibale te; bakómi moko. Bato boni bayebi yango? Makomi elobi yango. Na bongo, ntango babali ye, a—akómi moko. Bókoba kotala pe awa, na Timoté, elobami ndenge moko, elobami: “Mwasi akobikisama na nzela na kobota bana, soki akoumela na kondima pe na bosantu esika moko ná makanisi malamumu.”

178 Sikawa, kasi, bongo, kokatama ngenga ya Kondimana ya Kala ezalaki na mosuni; kasi na Kondimana ya Sika oyo, Jowele alobaki: “Nakosopa Molimo na Ngai likolo na bato nyonso, pe bana na bino ya mibale pe ya basi bakosakola.” Sikawa, liloba

oyo *kosakola* elingi koloba te koteya. *Kosakola* elingi koloba, to “koloba likambo moto abikeli, na nse ya mpamela” to “koloba likambo elingi kosalema”. Pe toyebi ete basakoli ya basi bazalaki na Kondimana ya Kala. Bakokaki ata moke te koloba kati na ndako, koloba kati na losambo, kati na eyanganelo, lokola motei. Kasi ye, Anna, pe mingi na bango kati na tempelo, bazalaki basakoli, pe bazalaki. . . Miriami azalaki mosakoli, to eloko moko ndenge wana. Molimo ezalaki likolo na ye, ya solo, kasi azalaki na ba-ndelo, esika na ye. Basi bakoki kozala basakoli lelo, na ntembe te; kasi batei te, pe bongo na bongo, awa, na etumbelo. Soki bosali yango, bozali—bozali kosala ete Biblia émitelemela. Biblia ekoki koloba likambo moko *awa* te, bongo éloba likambo mosusu *kuna*. Esengeli koloba ndenge moko ntango nyonso, soki te, Ezali Liloba na Nzambe te. Bomoni? Na bongo: “Bana na bino ya mibali pe ya basi bakosakola,” elingi koloba, to “bakoloba liboso” to “bakotatola”. Sikawa, bóluka ndimbola na yango, pe bózua dictionnaire ya Biblia mpo na komona soki ezali bongo te. “Bana na bino ya mibali pe ya basi bakosakola.”

¹⁷⁹ Sikawa, Biblia elobeli pe mwasi moko oyo amibengaki, to alobaki ete azali. . . Ezali mpo na lingomba Katoliko, pe mpo na. . . ná likambo oyo tokolobela sikawa. Tózua Buku ya—ya Emoniseli, pe tozua pembeni na—na mokapo ya 2, molongo ya 20, wana tozali pembeni na yango, mpo bókoka kotala malamau awa, pe komona ndenge makambo yango ezali mpenza ya zabelo, makambo tolobi na mikolo oyo ya suka, yango ezali kosalema, ndenge nini. . . nani mwasi yango akozala. Bóbosana te, lingomba Katoliko ezali mwasi. Touti kotánga yango, boye te? Sikawa, boyoka likambo oyo, ndenge Elobami. Emoniseli 2:20: “Sikawa nazui. . .” Azali koloba na lingomba oyo ya Twatila, bomoni: “Sikawa nazui. . .” Ezali lingomba ya moyen âge, oyo elekaki na Bileko ya Molili.

Sikawa, nazui yo mabe na likambo oyo: opesi nzela na mwasi yango Yezabele, oyo amibengaka mosakoli, pe azali koteya pe. . . kozimbisa basali na ngai mpo básala pité, pe bália biloko oyo epesami mbeka na bikeko. (Bomoni?)

¹⁸⁰ Sikawa, soki botali malamau, bótala bileko ya lingomba oyo malamau; na sima tokosilisa. Na bongo, na ntongo, tokolobela makambo oyo mosusu. Bótala malamau. Na. . . Soki totali bi—bitemelo na mwinda nsambo ya wolo ya mongombo ya Bayuda, na kati, ezalaki na mápa ya kolakisa ná biloko mosusu, ezalaki na bitemelo na mwinda nsambo ya wolo. Bino nyonso boyebi yango. Bomoni? Ezali na bileko ya lingomba nsambo. Ezali kolobela bileko nsambo ya lingomba, pole moko. Sikawa, soki botali malamau na Emoniseli 1, tomoni Yesu ateleme na kati ya bileko nsambo ya lingomba, bitemelo na mwinda nsambo ya wolo, ntango abalukaki, amonaki Moto moko lokola Mwana na

moto, atelemi, alati ndenge elobami wana. Mwasi na libala nde atalisamaki wana, kati na bitemelo na mwinda.

¹⁸¹ Sikawa, na Kondimana na Kala, bazalaki kozua . . . mwinda moko, pe bapelisi yango, bazui mwinda mosusu pe bapelisi yango uta na oyo wana, bapelisi uta oyo wana, moko pe mosusu, ndenge wana, kino bapelisáki bitemeli na minda nsambo nyonso.

¹⁸² Soki botali malamumu, na ebandeli, ntango Nzambe abandaki kosala na Bayuda, balekaki na eleko na bango ya wolo. Na sima, eleko ya molili koleka ya kosala ná Bayuda, oyo Nzambe azalaki na yango na Bayuda, ezalaki na ntango ya bokonzi ya Akaba. Pe soki botali malamumu, wana bozali kotánga bileko ya lingomba yango, Azongeli yango lisusu. Sikawa, Alobaki: “Makambo mosusu esalemaki”, pe alobaki . . . Sikawa, na kati ya Eleko ya Molili yango, mibu nkóto moko na nkama mitano, to na eleko ya Akaba naino, ná Bayuda. Eleko ya molili koleka oyo balekaki na yango, ezali ntango Akaba abalaki Yezabele, pe amemaki losambo ya bikeko na Yisalaele, pe asalaki ete libota moyimba bákumbamela Akaba . . . bákumbamela nzambe ya Yezabele. Bóbosana te, bazuaki, batongaki bikeko, pe babukaki bitumbelo ya Nzambe. Bongo Elisa agángaki, ete atikalaki “bobebe ye moko”, kasi Nzambe azalaki na bato nkóto nsambo baoyo bafukamelaki Baala soko moke te. Bobósani yango te? Ezali elilingi ya Lingomba liponami oyo ezali kobima. Bomoni yango? Bomoni ndenge ezali?

¹⁸³ Sikawa, na lingomba yango, soki botali lingomba ya liboso malamumu, lingomba ya liboso, lingomba ya Efese, ezalaki lingomba monene. Alobaki: “Bozali naino na pole.” Pe soki botali malamumu, lingomba moko na moko, pole ezalaki kokita, kokita, kokita kino na Twatila. Na sima, mibu nkóto moko na nkama mitano. Na sima, ekómaki na ngámbo mosusu: “Pe ozali bobele na pole ya moke. Kembisa oyo ozali na yango, soki te, mwinda na yo ekolongolama.” Na sima, eleko ya lingomba ya Filadelfia eyaki, na sima, eleko ya lingomba ya Laodikia.

¹⁸⁴ Sikawa, likambo ya kitoko yango oyo. Oh! la la! Nalingaka mpenza yango, Ndeko Smith. Bomoni, bóyoka. Sikawa, na eleko ya lingomba oyo, ndenge tomonaki yango . . . Sikawa bótala yango malamumu. Eleko ya lingomba ya liboso ezalaki ya Efese, eleko ya lingomba ya Efese. Sikawa, na eleko ya lingomba moko na moko, kino na mibu nkóto moko na nkama mitano wana, soki botali malamumu . . . Bótánga yango na mpokwa, ntango bokozonga na ndako, soki bozui ntango, to lobi na ntongo-ntongo, liboso ya koya na losambo, bótánga mokapo ya 1, ya 2, pe ya 3 ya Emoniseli. Bokomona ete, mpo na eleko ya lingomba moko na moko, Alobaki: “Ozali na makasi moke, pe owángani Nkombo na Ngai te”, kino ntango Akómaki na mibu nkóto moko na nkama mitano ya Twatila, Eleko ya Molili. Na sima, Ayei na ngámbo mosusu koloba:

...ozali na *nkombo ete ozali na bomoi*, kasi osili *kokúfá*.

¹⁸⁵ Pe, yango, ata moko te na bileko ya lingomba mosusu, wana te, eleko ya lingomba ya Filadelfia pe te, ezuaki lisusu Nkombo yango. Ezuaki Nkombo yango ata moke te, mpo elimwaki na ntango yango. Sikawa, oh, tokoki mpenza kotánga yango lokola moko na malakisi ya lokuta ya ntango wana, kotalisa bino ete lingomba Katoliko ezali mama, mama ya nyonso wana, ndenge azali “mama, libombami, Babilone”. Pe ezali, bótala, eleko ya lingomba oyo, ntango ebandaki, ezalaki na pole moke, na sima pole yango ekómaki kokita, kokita, pen a suka, ekomaki ebongiseli, awa, na mibu nkóto moko na nkama mitano wana. Na sima, amonanaki lisusu, lokola Lingomba ya Nkolo Yesu Klisto te, kasi lokola lingomba Katoliko. Luther akómaki nini? Lingomba ya Luther. Ba-Baptiste bakómaki nini? Lingomba Baptiste. Nkombo na Ye te, Nkombo na Ye te; nkombo mosusu, “ozali na nkombo”. “Mpo nkombo mosusu ezali te, oyo epesami na nse na Lola, oyo bokoki kobikisama na yango, bobele Nkombo na Yesu Klisto.” “Ozali na nkombo ete ozali na bomoi, kasi osili kokúfá,” ezali mpo na ebongiseli wana.

¹⁸⁶ “Oh, nazali mo-Presbiterien”, pe osili kokúfá! “Oh, nazali mo-Baptiste”, pe mokúfi! Ozali na bomoi bobele soki ozui Bomoi kati na Klisto Yesu. Ya solo. Ba-libatisi na bino ya lokuta, libatisi ya lokuta na mai; komwangisa, kosopa, esika ya kozindisa na mai; kosalela “Tata, Mwana pe Molimo Mosantu”, esika ya Nkombo na Nkolo Yesu Klisto. Makambo nyonso wana ya lokuta ezali kokoba, na ntango Biblia ezali koloba, koloba makasi mpenza, likolo na kozindisa na mai. Kasi awa tozali kotika makambo bongo, mpo na kosepelisa bango: “Ee, na lingomba na biso bandimaka Yango *boye*.” Kasi Biblia elobi *Boye*. Bomoni? Makambo ya boye te. Makambo ya boye ezalaka te.

¹⁸⁷ Esika ata moko te na Biblia bato babimisaki lolémo na libanda mpo na kolia Ukarístia esantu, bongo sángo amelaki vinyo pe abengi yango Molimo Mosantu. Esika moko te na Biblia, bapesanaki mbote ya loboko mpo na kopesana loboko símbísí, pe kobenga yango Molimo Mosantu. Ata mokolo moko te moto moko atelemaki pe alobaki: “Sikawa nakómi mondimi,” pe azui Molimo Mosantu. Soki ezalaki bongo, tolingaki kotánga Misala 2 boye: “Ntango Mokolo ya Pantekote ekokaki, sángo moko ya Roma ayaki na kíngo ya elamba na ye sima na mokongo. Abelemaki pe alobaki: ‘Bino nyonso bóbimisa lolémo sikawa mpo na kolia Ukarístia esantu, komúnio ya yambo.’” Elingaki kozala lolenge ya kotánga Misala 2, boye te?

¹⁸⁸ Ee, bino ba-Protestant, bozali mabe lokola bango. Bozonga kuna pe boloba: “Sikawa, tokoya epai na bino ba-Methodiste; tokokotisa bango na nzela ya mbote ya loboko, tokopesa bango loboko símbísí, pe tokomeka bango sanza motoba.” Botánga yango wapi na Misala 2? Bomoni? Bozua yango wapi? Bomoni?

¹⁸⁹ Elobami: “Bango nyonso bayanganaki esika moko, na motema moko!” Episkopo moko te ayaki kosala *boye*, pe sango moko te ayaki kosala *boye*. “Kasi lokito moko eutaki na Likolo lokola mopepe makasi, pe Etondisaki ndako mobimba epai bafandaki.” Bazuaki Yango nde bongo, iyo, misie, lokola mopepe makasi oyo eutaki na Nkembo. Eutaki na nzela to na ebongiseli moko te.

. . . ozali na *nkombo ete ozali na bomoi*, kasi *okúfá*.

¹⁹⁰ Bomoni, bindimeli ná bibongiseli na bino ekangélá Nzambe ekuke ndenge wana, kino: “Biso tondimaka *boye*, pe tondimaka ete ntango ya bikamwa eleká.” Mosakoli ya lokuta nde alobaka bongo. Mosakoli ya lokuta nde alobaka na yo: “Okoki kopesa mbote ya loboko mpo na kozua Molimo Mosantu.” Mosakoli ya lokuta nde alobaka na yo: “Ozui Molimo Mosantu ntango ondimi.” Mosakoli ya lokuta nde alobaka na yo: “Basengeli kosopela yo mai pe komwangisela yo mai esika ya libatisi.” Mosakoli ya lokuta nde alobaka na yo ete “zua libatisi na nkombo ya Tata, Mwana pe Molimo Mosantu”, ntango oyo ezali na Likomi ata moko te kati na Biblia oyo elobeli yango. Ya solo. Ezali na Likomi ata moko te na Biblia oyo elobi na bino mpo na kobatisama, esika moto moko azuaki libatisi, libanda na Nkombo na Yesu Klisto. Bobele bayekoli ya Yoane; pe basengelaki koya kozua lisusu libatisi, na Nkombo na Nkolo Yesu Klisto, mpo na kozua Molimo Mosantu. Ya solo. Sikawa, ezali malakisi ya ba-Jesus Seul te. Nayebi malakisi ya ba-Jesus Seul. Ezali yango te. Ezali bobele Malakisi ya Biblia. Ya solo.

¹⁹¹ Yango mpenza. Bosalaka na yango nini? Mama na bino ye wana. Mama ya bindimeli yango ye wana.

¹⁹² Sikawa, bótala lisusu na Biblia pe bólakisa ngai esika oyo bamwangiselaki moto mai. Ba-Methodiste, ba-Presbiterien, ba-Katoliko, bólakisa ngai esika oyo bamwangiselaki ata moto moko mai, na Biblia. Bólakisa ngai esika basopelaki ata moto moko mai, na Biblia, mpo na bolimbisi ya masumu. Bólakisa yango. Bokoki komona yango? Soki bomoni yango, bóya komona ngai, pe ngai nakotámbole na balabala oyo, likomí na mokongo na ngai, koloba: “Mosakoli ya lokuta! Nasalaki libunga.” To, bóluka esika bobele moko na Biblia mobimba, epai moto moko azuaki libatisi na nkombo ya Tata, Mwana pe Molimo Mosantu, ndenge bato ntuku mwambe likolo na mokámá kati na bino babátisámá. Bólukela ngai Likomi bobele moko epai moto moko abatisamaki ndenge wana, pe ngai nakotia likomí na mokongo na ngai: “mosakoli ya lokuta”, pe nakotámbole na yango na nzela *boye*. Pe bólakisa ngai epai moto moko abatisámá, na Lingomba ya sika, oyo asengelaki te koya kobatisama lisusu, na . . . bobele na nkombo na “Yesu” te, kasi na Nkombo ya Nkolo na biso Yesu Klisto. Ya solo. Bótala soki ezali ya solo te.

¹⁹³ Pe, awa, likambo ezali nini? Azalaki mama ya basi ya pité. Eloko nini ekómisaki ye mwasi ya pité? Eloko nini ekómisaki ye mwasi ya ndumba? Malakisi na ye! Eloko nini ekómisaki bango basi ya ndumba? Malakisi na ye!

¹⁹⁴ Yango wana biso tondimaka bibongiseli na bango pe biyambweli na bango te. Totikali peto ná Biblia oyo. Nayebi te lolenge nini obikelaka Yango, kasi ata bongo, basili koteya yo Yango. Ya solo. Ezali likambo na yo. Nakoki kobikisela yo Yango te. Nakoki bobele koyebisa yo Solo. Yango wana tozali ebongiseli te. Nakolinga te—nakolinga te ete tómiyeisa mbindo na komikotisa na eloko ya ndenge wana, kondima lolenge moko ya biyambweli. Malamu mpo na ngai kotámbola elongo na batiolami moke ya Nkolo. Malamu mpo na ngai kotikala peto pe kozánga mbindo liboso na Liloba pe liboso na Nzambe, kozala wana pe koloba: “Makila ya moto moko te ezali na elamba na ngai.” Yango wana totikáli na Branham Tabernacle. Yango wana tozali ba-Assemblée te. Yango wana tozali ba-Unitaire te. Yango wana tozali ba-Jesus Seul te. Yango wana tozali ba-Methodiste te. Yango wana tozali ba-Baptiste te. Oyo ezali bobele mongombo moke. Tozali na ebongiseli ata moko te. Tozali na bonsomi, kati na Klisto. Yango wana totikáli ndenge tozali. Pe Nzambe apambóli biso, Nzambe azali kosunga biso.

¹⁹⁵ Sikawa, tokoki koyebisa bino mpo na nini toliaka elambo, koyebisa bino mpo na nini tosukolaka makolo, mpo na nini totikaka te ete bandimi bália yango soki toyebi bazali kati na masumu. Yango wana, na mpóso mibale to misato oyo eleki, nazalaki kokende epai na mondimi moko na moko, nakendeki pe kotala baoyo bazalaki na mwa kowelana kati na bino. Nakendeki kuna, moko azalaki lisusu kolobisa moninga te, pe na nzela, bakómaki kolekana wana babwaki elongi epai mosusu. Nsóni na bino, baoyo bomelaki kopo ya bulee ya Nzambe, liboso na etumbelo oyo, pe bozali komibénga bandeko mibali pe bandeko basi, na sima, bozui telephone mpo na kotóngana kati na bino. Ntango bozali na bizaleli ya ndenge wana, bolongobani te kobengama Baklisto. Ya solo. Bózala mosika na ba-telephone yango; soki bokoki koloba bolamu ya moninga te, boloba pe eloko moko te. Bomikanisela, bozali na mokumba ya kozongisa maloba liboso na Nzambe. Ntango nyonso oyo molimo yango ezali kati na yo, oyebi ete olongobani te liboso na Nzambe. Soki omiyoki te. . .

¹⁹⁶ Soki moto moko azali na libunga, kende epai na ye mpo na kozongisa bondeko. Soki bokoki kozongisa bondeko te, memá moto moko elongo na yo. Yango nde ntina Nzambe akoki kosémbola Lingomba na Ye te, ezali mpo bobongisaka makambo malamumu te. Esika ya kozua telephone mpo na koloba mabe ya moto moko, na makambo esalemaki, pe kosala bitonga mike-mike pe makambo ya ndenge wana. Esika ya kosala bongo, mpo na nini bosalaka makambo te ndenge Biblia elobi? Soki ndeko

moko azuami na libunga, kende epai na ye pe tala soki okoki kozonga na bondeko ná ye te. “Ee, tala, ye nde asali ngai mabe!” Ata asalaki nini, kende epai na ye, ata bongo! Elobami te ete ye áya epai na yo. Yo moto osengeli kokende epai na ye, soki azali na libunga. Olobi: “Ee, ye nde asalaki libunga. Ye moto asengeli koya epai na ngai.” Biblia elobi bongo te. Biblia elobi ete yo nde osengeli kokende epai na ye. Soki azali na libunga, yo kende epai na ye.

¹⁹⁷ Na sima, soki aboyi koyoka yo, na ntango wana, memá moto moko elongo na yo, lokola motatoli.

¹⁹⁸ Na sima, soki aboyi kokutana na motatoli wana, na bongo, lobá: “Sikawa, nakoyebisa yango na mokengeli na yo.” Na sima, okoyebisa ye, okoloba: “Nakoyebisa yango na lingomba, pe na mikolo ntuku misato, bandá lelo, soki boyokani te, bandeko. . . Ndeko oyo azali koluka kozonga na bondeko. Yo olingi te. Soki boyokani te, na mikolo ntuku misato, boye, eloko nini ekosalema? Okozala lisusu moko kati na biso te.”

¹⁹⁹ Biblia elobi: “Soki aboyi koyoka lingomba, na bongo, mpo na bino, ákóma lokola mopakano pe mokongoli mpako.” Bomoni, na ntango nyonso oyo ndeko azali na nse na kobatelama ya lingomba, Makila ya Klisto ezali kobatela ye. Yango wana tozali kokoka kokamba losambo na lolenge esengeli te. Sikawa, malamú, *Oyo* nde Malakisi ya ba-Ba- . . . ya lingomba Baptiste, to, ya Branham Tabernacle awa, soki bokosalela yango. Bomoni, mpo na nini te . . .

²⁰⁰ Bozali awa, tóloba, ndakisa, na bato mibale, tóloba Leo ná ngai. Bokotinda ngai. . . Pe nakoloba: “Ee, ye—ye moto asalelaki ngai mabe.” Ekozala na bokeseni te. Ngai nde nasengeli kokende epai na ye. Ee, azali mondimi ya lingomba oyo. A—akómá Moklisto. Toliaka na ye elambo awa, liboso na etumbelo. Tozuá libatizi na Nkombo na Nkolo Yesu. Totámbolaki malamú, lokola bandeko, moko liboso na mosusu, na sima, likambo moko esalemi.

²⁰¹ Ezali ye te. Na makambo ntuku libwa likolo na mokáma, Zabolo nde akotaka katikati ya bato. Ezali bango te. Ezali Zabolo. Pe ntango nyonso bokopesa Zabolo nzela ya kosala bongo, bozali kosalela ndeko na bino mabe. Ya solo.

²⁰² Ee, soki eloko moko ezali kotambola te kati na ngai ná Leo; tókende kobongisa yango. Pe soki yo omoni ete likambo moko ezali, ozali na mokumba ya koya epai na biso, pe koloba: “Bandeko, bino mibale bóya awa pe bókutana. Tokobongisa likambo yango.” Na bongo, soki akómi wana, pe esika wana, ekomonana ete tokutani. Nakoloba: “Ee, likambo ya liboso, soki to—toyokani te, na bongo, likambo yango ekokóma na lingomba.”

²⁰³ Sikawa, na—na ntango nyonso oyo yo osali eloko moko te mpo na yango, Makila ya Yesu Klisto ezali kobatela biso mibale.

Bomoni? Kasi, na ntango wana, kansére oyo ya kala ekobota kansére mosusu, pe kansére wana ekobota kansére mosusu, pe bokono ekokota na nzoto mobimba, na lingomba mobimba. Bongo, bokokoma esika moko oyo bokokota na losambo, malili ekozala makasi mingi, kino ekosengela na sinzili koya kobuka mabanga ya malili, liboso bandimi bákoka kokota. Boyebi malamumu ete ezali solo. Malili mpenza! Moto akofanda wana, boyebi, pe akoloba liloba moko te. “Ee, tozaláká bato ya molimo mpenza.” Kasi, eloko nini esálemáki? Ya solo, bozaláká kopota mbangu malamumu, likambo yango nini? Bomoni, lisumu na bino ekaboli bino. Ezali mokumba na bino pe bokozongisa monoko liboso na Nzambe, bandeko. Sikawa, nakobongisa likambo yango.

²⁰⁴ Mabe ezali ngámbo na ngai te, ezali pe ngámbo ya Leo te; ezali nde Zabolo oyo akoti kati na biso. Ya solo. Bóbongisa likambo yango. Kende epai na ye. Bongo, soki aboyi koyoka, to ngai naboyi koyoka, moko to mosusu, na bongo, bóloba yango na lingomba. Soki ayei kozongisa bondeko ná lingomba wana te na mikolo ntuku misato, na bongo, akozala lisusu na nse ya kobatelama na Yesu te. Tokokangola ye. Ezali mpenza ya solo. Na sima, bótala malamumu likambo nini ekosalema. Bótika sikawa Nzambe ásémbola ye. Bosukola maboko. Bosali nyonso bokokaki kosala. Na ntango wana, bótika Nzambe kotala likambo na ye na ntango moke; Akobwaka ye na maboko ya Zabolo. Akozonga na ntango wana. Soki azongi te, bomoi na ye ekoumela te.

²⁰⁵ Bomikaniseli, na Biblia, esika ndeko moko aboyaki kobongisa likambo na ye ná Nzambe? Bato boni bamikaniseli na likambo yango? Atambolaki ná mama mobokoli na ye, pe bazalaki kokoka kosembola ye te. Polo alobaki: “Bóbwaka ye na maboko ya Zabolo, mpo na kobebisama.” Bokomona, na Bakolinti ya Mibale, ete asembolamaki.

²⁰⁶ Nazali na ndeko moko, moninga malamumu, nasepeli kotánga nkombo na ye, ndeko motei. Ndeko motei yango, nkombo na ye Ndeko Rasmussen. Mingi kati na bino, batei oyo bozali awa na mpokwa oyo, nkombo na ye ebimá na bazulunále na bino. Aponaka ebongiseli te, azalaka na Chicago. Pe bótala. Azalaki na mwana mobali moko, ye motei, pe akendeki kobala mwana mwasi mo-Katoliko, pe abandaki kotangwa ndenge wana. Balingaki kosala makambo *boye* na *boye* to *boye*, pe—pe nyonso wana; akómaki na mindondo. Pe papa na ye akendeki epai na ye, alobaki: “Sikawa yoka, mwana na ngai, ondimi kozonga na bondeko?”

Alobaki: “Papa . . .”

Abéngaki lingomba na bango etonga ya batúntuki, papa na ye. Alobaki: “Sikawa, yoka, okobongisa likambo yango na lingomba?”

207 Alobaki: “Papa, yoka, ozali papa na ngai, pe naboyi kozala na likambo ná yo.” Malamu.

208 Akendeki kozua mosungi moko pe bakendeki na ndako na ye. Alobaki—alobaki: “Wesley, nalingi kosolola na yo.” Alobaki: “Okobongisa likambo yango na lingomba?” Kasi ye akatelaki ye eyano ya mokuse ndenge wana. Alobaki: “Kobosana te, Wesley, ete ngai nazali mokengeli ya lingomba wana. Nazali papa na yo, kasi nakosala oyo Nzambe alobi ete tósala. Napesi yo mikolo ntuku misato mpo na kobongisa likambo yango na lingomba, soki te, tokobengana yo libanda na Bozali ya Nzambe. Ozali mwana na ngai moko; Ye azali Mobikisi na ngai.” Alobaki: “Nalingi yo. Pe oyebi ete nalingi yo, Wesley. Nakoki ata kokufa sikawa mpo na yo. Kasi osengeli koya komitia na molongo na Liloba na Nzambe. Bomoni?” Alobaki: “Ngai nde mokengeli. Nazali mobateli ya bampate wana. Ata ozali mwana na ngai, to moto nani, osengeli komitia na molongo na Liloba na Nzambe. Soki osali yango te, na bongo, ngai nalongobani kozala mobateli ya bampate na Ye te.”

209 Oh, wana nde mokengeli. Wana nde moto. Bomoni bongo te? Wana nde moto. Ayebisaki mwana na ye yango, “Pe esalaki ye mpasi”, alobaki bongo. Alobaki: “Nini? Olingi koyokisa nani mpasi: moto, to koyokisa Mobikisi na yo mpasi? Na bongo,” alobaki, “na sima, tokobaki.” Pe alobaki: “Aboyaki kosala yango. Pe to . . . nayebisaki lingomba.”

210 Alobaki: “Mwana na ngai moko, Wesley, aboyi koyoka ngai na likambo oyo. Aboyi koyoka mosungi. Pe yo ozali motatoli na yango, Ndeko *Songolo*?”

“Iyo, ezali bongo.”

“Malamu. Na ngonga ya mwambe ya mpokwa, na mokolo ya lomongo ekoya, mpóso minei kobanda lelo, soki abongisi yango ná lingomba oyo te, tokopesa Wesley, mwana na ngai, na maboko ya Zabolo, mpo na kobebisama ya nzoto na ye. Makila na Ye, Makila ya . . . ya Yesu Klisto, ná lingomba oyo, ekobatela ye lisusu te.”

211 Mpokwa yango pe ekómaki. Atelemaki na eteyelo, alobaki: “Atikali na miniti mibale.” Ngonga ekokaki. Alobaki: “Sikawa, mpo na makambo mwana na ngai, Wesley Rasmussen, alobaki likolo na eyanganelo oyo, mpo na Yo, Nzambe na Nguya nyonso. Tosali nyonso oyo tokokaki kosala, kokokana na Liloba na Yo pe na mitindo oyo Mwana na Yo—na Yo, Mobikisi na biso, atikéla biso. Bisó sikawa, nabwaki mwana na ngai, ná lingomba oyo elongo na ngai, na kobeb- . . . na maboko ya Zabolo, mpo na kobebisama ya nzoto na ye, mpo molimo na ye ébikisama.” Yango nde nyonso oyo elobamaki. Eloko moko te esalemaki, kati ya mpóso moko to mibale, ntango mosusu sanza mobimba to mibale.

212 Na butu moko, Wesley abandi kobela. Ntango abandaki kobela, bokono na ye ezalaki bobele kokóma makasi. Abengaki monganga. Monganga ayaki pe asalaki ye ba-examen. Móto ya nzoto na ye ezalaki ntuku minei na ndambo. Azalaki koyeba esika ezalaki kouta te. Bokono ezalaki bobele kokóma makasi. Monganga alobaki: “Mwana, nayebi te likambo oyo ekómeli yo.” Ayebaki eloko ya kosala te. Alobaki: “Tokobenga specialiste.” Babengaki specialiste, pe specialiste ayaki. Bamemaki ye na lopitalo, basalaki ye ba-examen, pe nyonso wana. Pe alobaki: “Nayebi te. Mwana oyo akómi mpenza—mpenza lokola ebembe.” Mwasi na ye azalaki wana, azalaki kolela, pe nyonso wana. Bana na ye pe bazalaki zonga-zonga na mbeto ndenge wana. Alobaki: “Azali kokende. Esilí.” Alobaki: “Mbangu ya motema pe kopéma na ye ezali kokoba kokita.”

213 Alobaki: “Benga papa.” Oh, iyo. Yango nde lolenge ya kosala yango. Yango mpenza. “Benga papa.” Pe papa na ye ayaki na lopitalo, na lombangu mpenza, mpo na kotala ye. Alobaki: “Papa, nakoki kosala yango sikawa te, kasi Nzambe azali koyoka maloba na ngai. Nakobongisa makambo nyonso. Nakobongisa yango. Iyo, nakosala yango.” Oh, iyo, ndeko. Na mbala moko kopéma na ye ebandaki kozonga malamú.

214 Pe na mokolo ya lomingo oyo elandaki, atelemaki liboso na lingomba. Alobaki: “Nasalaki lisumu liboso na Nzambe, na miso ya lingomba oyo. Naboyaki koyoka maloba ya mokengeli. Na—naboyaki koyokela mosungi oyo.” Pe alobaki: “Nasengi na losambo oyo ete bólimbisa ngai mpo na mabe nasalaki na bizaleli ya ndenge wana.” Alobaki: “Nzambe abateli bomoi na ngai.” Bóyoka, amitiaki na molongo na ndenge esengeli. Iyo. Yango de bosengeli kosala, bomoni. Bomoni? Bino, soki bokoki kosala yango na lolenge ya Nzambe! Bomoni?

215 Sikawa, bomoni, biso tosalaka boye, toyanganaka na likita, pe tolobaka: “Ee, sikawa, tosengeli kobatela...” Nalobeli losambo oyo te, kasi nalingi koloba biso ba-Protestant. Toyanganaka na likita, pe: “Bolobi boni mpo na Jones? Bokanisi ete tosengeli kosala nini mpo na ye? Ngai namoni ete akozala mondimi ya malamú epai na ba-Methodiste koleka epai na biso.” Ndenge wana mpenza. Oyo wana, ezali libunga. Yango wana biso totindami kolanda mimesano na bango te; pe tosengeli kobengisa episkopo moko, mondimi ya . . . Mokonzi ya etúka, na lingomba Pantekotiste, babengaka ye nani? Mokengeli ya etúka, bakobengisa ye mpo na komona ezaleli ya moto wana.

216 Biblia eyebisi biso ndenge tosengeli kosala. Yango wana tobebisaka ntango na biso na bibongiseli na bango te. Totikalaka na bonsomi, mosika na eloko wana. Amen. Bosilíkeli ngai te, boye te? Bósala yango te. Malamú. Ntango mosusu nakoyamba mituna ya malamú mingi lobi na mpokwa. Kasi, ee, ya solo. Bomoni? Bómikanisela. Bóyeba . . .

217 Nalobi boye sikawa. Bino bato oyo bozali awa sikawa, oyo bouti na bibongiseli ya mangomba ndenge na ndenge, ebongiseli na bino, pe, ndeko, nalobi te ete ozali Moklisto te. Nalobi te ete na ebongiseli na bino, Baklisto nkoto na nkoto ya malamumu bazali kuna te. Nazali nde komeka koloba ntina biso tozali ebongiseli te. Mpamba te, nakoki kondima yango ata moke te. Te, misie. Ya solo, nakoki te. Balukaka koyebisa bato ndenge basengeli kosala. Soki Nzambe abéngáki ngai mpo na koteya Nzango Malamumu, na bongo nakoteya Yango ndenge Nzambe akoyebisa ngai koteya yango. Ya solo mpenza, ndenge ekomami awa na Biblia oyo. Soki elongobani na Oyo te, na bongo, ezali. . . Nzambe akosambisa ngai mpo na yango. Kasi soki na—soki na—soki namoni mbwa ya zamba koya, to monguna koya, soki nakebisi bato te, Nzambe akotuna ngai. Kasi soki nakebisi bino, na ntango wana, ezali likambo na bino. Bomoni?

218 Bómikanisela, “Na mikolo ya suka, ntango ya mpasi ekoya, bato bakokóma balingi na bango mpenza, bato na lolendo, bato na ngambo, batúki”. Bomoni, batúki: “Oh, bazoba wana. Ntango ya bikamwa esilá koleka. Bikamwa ezalaka te.” Azali mosakoli ya lokuta. “Tala, toyebi ete basi na biso bazali na mayele lokola mibali na biso.” Naboi yango ata moke te, kasi Biblia ya Nzambe elobi ete azali na esika na eteyelo te. Yango—yango ekoki mpenza mpo na ngai, bomoni. Ya solo. Malamumu. Bomoni?

Pe balobaka: “Ee, sikawa, na ebongiseli na biso, tozali na bato malamumu ebele lokola bino, kuna na mongombo.” Nalobi bongo ata moke te, kasi Biblia ekweisi bibongiseli. Ya solo. Na bongo, nalobi te ete bozali na bandimi ya malamumu te na lingomba na bino. Ezali malamumu mingi. Bazali bato malamumu mpenza. Bamosusu bazali bato ya malamumu koleka, nakutanaka na bango na mangomba nyonso wana, epai na ba-Katoliko pe bipai nyonso. Na mangomba nyonso, nakutanaka na bandimi ya malamumu.

219 Sikawa, lolenge tokotalisa yango sikawa, baninga, soki Nkolo alingi, na malakisi mibale to misato ekolanda, ntango mosusu. . . nakoyebisa bino lobi na ntongo soki tosengeli kokoba lobi sima na nzanga to te, bomoni, mpo na kotalisa yango na mobimba. Ntina oyo tozali komeka kosala bongo ezali ete, sikawa, nalingi mpenza koloba likambo yango. Sikawa, soki olingi koya na moto, yaka na ye. Kasi bobosana likambo oyo te, bo—bozonga te bobele na koluka komona mabunga. Yaka awa. . . Nazali kolobela lo—losambo na ngai, bomoni. Nateyaka makambo oyo libanda na losambo na ngai oyo te, mpo ezali mosala ya moto mosusu. Ye nde azali mobateli ya etonga wana. Pe—pe ngai nazali. . . [Maloba mazangi na eteni oyo ya bande—N.D.E.]

220 Kozonga kino na Genese, okoki kolandela yango, mpo na koyeba epai yango ezali. Sikawa, tózonga na Genese, komóna mpo na nini mwana makango akokaki kokota na eyanganelo ya

Yawe te kino na mabota zomi na minei. Ete esengeli . . . Ekosala mibu nkama minei mpo lisumu yango élongwa. Ete, tokomona ete mabe ya baboti elandaka bana pe bana ya bana, pe ebandaki na Genese, pe bongo na bongo.

²²¹ Pe bino . . . bongo, ntango tokozonga kino na ebandeli, bokomona ete Nzambe, liboso ya kozalisama ya mokili, liboso atóme moko épasuka, kuna, liboso ata libanga ya pole moko ézalisama, Nzambe ayebaki bikelamu nyonso pe biloko nyonso oyo ekozala na mokili. Moto moko akoki kozala awa . . . Bokokoka kolimbola liloba oyo te, kokabola yango pe koloba nini liloba oyo “kozanga suka” elingi koloba. Ezali lokola kobongisa masíni ya fotó na yo na—na kozanga suka. Ezali mpenza oyo ezali kolanda sima na yango, yango mpenza. Bomoni? Kozanga suka! Pe, na likanisi oyo ezali na suka, tokoki te kososola eloko oyo likanisi ezángá suka ekoki kokanisa. Bomoni, tokoki te. Bino, bokoki te. Bomoni? Kasi soki botali malam, pe botikali na Molimo, bokoki koyoka yango na mosika. Pe—pe, bózonga awa na Makomi nde bokomona yango, bomoni, mosika, liboso mabokó ya mokili ékoka kotiamama.

²²² Sikawa, Biblia elobi ete Yesu Klisto azalaki Mwana Mpate ya Nzambe. Sikawa, bóyoka na bokebi mpenza, bongo, soki bato mosusu kati na bino bakoya te lobi, mpo na koyoka suka na yango. Biblia elobi ete Yesu Klisto azalaki Mwana Mpate ya Nzambe, oyo abomamaki longwa kozalisama ya mokili. Boye te? Abomamaki ntango nini? Longwa kozalisama. Yango nde mokili, soki esalemaki na biteni ya ba—atóme oyo ekabwanaki pe elongwaki na moi, kuna, liboso na kokóma boye. Na bongo, liboso atóme ya liboso ékabwana kati na moi, soki oyo ezalaki libanga oyo ekabwanaki na moi, elingi koloba, eleki mibu nkama na nkama ya bakiása na kiása na kiása, liboso libanga moko ya pole ékoka ata kozala, Klisto asilaki kobomama. Ntango likanisi monene ya Nzambe ekáni eloko moko, eloko yango esili kosalema. Soki Nzambe alobi: “Eloko boye ézala,” esili kosalema. Ata eleki mibu kiása nkama liboso ya kokokisama, esili kosalema, bobele ntango Alobaki yango. “Pe ntango Mwana Mpate abomamaki longwa na kozalisama ya mokili”, Biblia yango moko, Molimo yango moko ekomaki pe elobaki, “nkombo na biso ekomamaki na Buku na Bomoi ya Mwana Mpate liboso ya kozalisama ya mokili”.

²²³ Boye, moto oyo akomaki loyembo oyo “Ezali na Nkombo Ya Sika oyo Ekomámi Na Nkembo”, ezalaki na makanisi malam, kasi azalaki libanda na Makomi. Bomoni? Nkombo yango ekomamaki na Nkembo ntango mokili . . . liboso mokili ézalisama. Ntango Mwana Mpate abomamaki, nkombo na biso ekomamaki na Buku na Bomoi ya Mwana Mpate.

²²⁴ Na—nakopesa bino bobele eteni moke ya Makomi. Bokoki kozela mwa moke? Ezali koyela ngai na likanisi sikawa. Nabanzi nakoki kozua yango noki. Nayebi te. Sikawa, bólimbisa ngai

ndenge naúmisi bino boye, kasi nalobaki na bino ekozala na minuít; ekomi naino mpenza te. Kasi na—nasepeli mpenza ko—kozua yango, Likomi moko mpo na yango.

Sikawa, tókende elongo na Buku ya Baroma, pe nalingi ete bótánga yango elongo na ngai. Sikawa, tótala, Baroma, soki nakoki komona yango, ezali pembeni awa. Sikawa, tózua Baroma 8, pe—pe tóbanda na molongo ya 28 na mokapo ya 8 ya Baroma. Pe nalingi ete bótánga yango na molimo ya libondeli elongo na ngai sikawa. Bóyoka sikawa likambo Nzambe alobi awa:

Sikawa toyebi ete makambo nyonso esalaka elongo mpo na bolamu ya baoyo balingi Nzambe, baoyo . . . babengami kokokana na mokano na ye.

Mpo baoyo ayebaki liboso, . . .

225 Yango epesi bino . . . Bokoki kotánga elongo na ngai? “Mpo ye . . .”

Mpo baoyo ayebaki liboso, aponaki pe bango liboso (malamu) ete bákokana na elilingi ya Mwana na ye, mpo ázala mwana ya liboso kati na bandeko ebele.

Lisusu, baoyo aponaki liboso, abengaki pe bango; pe baoyo abengaki, alongisaki pe bango; pe baoyo alongisaki, apesaki pe bango nkembo.

226 Longwa na kozalisama ya mokili! Ntango Nzambe akitisaki miso . . . Sikawa, Nzambe akambaka misala na Ye te na koloba: “Ee, sikawa, Nako . . . Oh, tokosala nini sikawa?” Bomoni? Eloko moko te . . .

227 Bómikanisela, kozanga boyengebene, lisumu, ezali boyengebene oyo ebebisami. Zabolo akoki kokela te. Moto nyonso, bato nyonso bazali kososola yango? Ezali moko na Malakisi ya losambo oyo. Zabolo akoki kokela te. Akoki kobebisa eloko Nzambe asili kokela. Sikawa, kobebisa ezali nini? Tala, emonani lokola bino nyonso bozali mikóló, mingi kati na bino. Bóyoka likambo oyo. Tozali bato oyo babálá. Bino mibali babálá ná bino basi babálá bokoki kobika elongo lokola mwasi ná mobali, bongo basi yango bazali ndenge moko lokola basálá naino te . . . Azali mongondo ntango nyonso oyo ofandi ná mobali na yo. Ya solo. Sikawa, ekokani na mobeko pe elongobani na yango, pe ezali malamumu. Nzambe moto abongísá ete tósalaka bongo. Mwasi mosusu akoki kosala likambo yango moko ya mwasi na yo; moko na likambo yango, ozali moyengebene na miso na Nzambe; pe likambo yango moko na mwasi mosusu, okweisami na kufa liboso na Nzambe. Ezali nini? Boyengebene ebebisami, bomoni, boyengebene ebebisami. Sikawa, Zabolo akoki kokela te, kasi abebisaka oyo Nzambe asila kokela.

228 Lokuta ezali nini? Ezali solo oyo ebebisami. Moto moko alobaki: “Oh, tala, ezalaki na mokolo ya póso na mpokwa, na

ngonga ya libwa, iyo, Bill Branham azalaki na Jeffersonville,” ya solo. “Na ekalá ya Antz, alángwé,” lokuta. Ezalaki nini? Nazalaki na Jeffersonville. Ya solo. Ezalaki boyengebene oyo ebongwani lokuta. Bomoni likambo nalingi koloba? Bomoni, lokuta ebebisi solo. Ezali likambo elobaki esika ngai nazalaki. Sikawa, soki balobaki: “Na losambo, azali koteya,” ezali ya solo. Yango nde boyengebene. Alobaki solo. “Esika ya masanga, azali komela,” lokuta. Ebebisami; bomoni, solo oyo ebebisami. Bomoni likambo nalingi koloba? Kozanga boyengebene nyonso ezali boyengebene oyo ebebisami.

²²⁹ Kufa, ezali nini? Bomoï, ebebisami. Bokono? Bokólongonu, ebebisami. Osengeli kozala na nzoto makasi mpenza. Malamu. Soki obelaka mingi, ezali nini? Bokólongonu na yo ebebisami. Bomoni? Nyonso yango wana. Ezali nini? Bozaláká bilenge basi kitoko, pe mibali kitoko pe makasi. Sikawa, bokómi na nzoloko na loposo, bokómi konuna. Ezali nini? Bomoï, ebebisami, bomoni, ekozonga lisusu. Bomoni? Pe esengeli kozonga. Nkombo na Nkolo épambolama! Nzambe alakaki ete akozongisa yango. Pe ezali mpenza solo—ezali mpenza solo (toyebi ezali awa), na bongo, lokola ezali mpenzasolo, Nzambe akozongisa yango. Alakaki yango pe Alápaki ndai ete akosala yango. Yango nde epesaka yango.

²³⁰ Sikawa, lolenge nini, bato ya lolenge nini tosengelaki kozala? Sikawa, bótala ndenge makambo yango esalemaka. Sikawa, baoyo Ayebáki bango liboso, Abengaki bango; baoyo Abengáki, Alongisaki bango. Ntango nini? Liboso mokili ézalisama, liboso mokili ékoka kobanda. Sikawa, soki tokoki kozua Likomi yango mpo na kotalisa yango mpenza polele, tokozua ngonga mingi mpo na yango, kasi to—toboyi kosala bongo. Kasi kozanga boyengebene nyonso oyo, ezali boyengebene ebebisami pe ekomi kozanga boyengebene. Yango nde Zabolo asalaka.

Sikawa, soki okómi na mibu ya kososola makambo, pe oyebi mabe ná malamumu, osengeli kopesa mokongo na mabe na yo. Mpo ete obótámi na lisumu, osalémi na lisumu na nkó, oyei na mokili na lokuta na monoko. Bongo, o—obótámi mpenza na mposa ya nzoto, na bongo osengeli kobotama mbala ya mibale, mpo na kozua Mbótama ya sika, mpo na kokota na Lola. Mpamba te, lolenge ya kobótama ozali na yango awa . . .

²³¹ Bomoni ndenge Batatoli ya Yaweh bazali na libunga monene na likambo yango, kokanisa ete Mbótama ya sika ezali lisekwa ya nzoto? Bomoni, ekoki kosalema te. Bomoni? Esengeli kozala eloko moko . . .

²³² Bino, bozali na kati ya ntango. Pe eloko ya Seko ezali bobele oyo ezali na ebandeli te pe na suka te. Eloko nyonso oyo ezali ya Seko ezali na ebandeli te pe ekozala na suka te. Bomoni? Na bongo, soki ozali eteni ya Nzambe, Molimo oyo ezali kati na yo ezali na ebandeli te pe ekozala na suka te, pe ozali moto

ya Seko, elongo na Molimo oyo ezali kati na yo. Bomoni? Ezali lokola bo—bo—bolingo Agapao, bolingo *phileo* ezali na nse na yango, pe bolingo ya nzoto ezali na nse mpenza. Ezali kokoba kokita, kokita, pe ezali kokoba kobeba, kino ekotikala bobele lisangana ya bosoto. Ee, nzela bobele moko, Yesu akitaki na ebuteli yango moko, awa na nse, pe Amataki lisusu kino na lolenge ya likolo koleka, longwa na lolenge ya nse koleka; longwa na kufa kino na Bomoi, longwa na bokono kino na bokólóngonu, longwa na kozanga boyengebene kino na boyengebene. Bomoni? Autaki longwa na Likolo koleka kino na nse koleka, mpo Ákoka komema na Likolo koleka, moto oyo azalaki na nse koleka. Akómaki ngai, mpo ngai, na ngolu na Ye, nákoka kokóma Ye, mosangoli ya Ngwende, kati na Nkembo. Bomoni likambo nalingi koloba? Makambo wana.

Sikawa, bótala. Eleki ntango molai mpenza, liboso mokili oyo ébanda kosalema na ba—atóme wana na kala, ntango Nzambe amonaki makambo elingaki kosalema, na ntango yango nde Amonaki bino, Amonaki ngai, Amonaki nsili moko na moko, nzinzi moko na moko, ligbólolo moko na moko, nzinzi moke moko na moko. Nyonso oyo elingaki kozala na mokili, Amonaki yango, na ntango wana. Ya solo Mpenza.

²³³ Sikawa, Alobaki te: “Nakotinda Mwana na Ngai na nse mpo na kotika Ye kokufa, bongo, ntango mosusu moto moko akoyokela Ye mawa. Pe ekozala likambo ya mawa mingi, ntango mosusu moto moko akoki kobikisama.”

²³⁴ Ayebaki liboso baoyo bakobikisama! Iyo, misie. Alobaki: “Nayiní Esau, pe Nalingi Yakobo,” liboso moko na bango mibale ákoka kozua makoki ya kotalisa ezaleli na ye, mpo Ayebaki oyo bango bazalaki. Ayebaki. Ayebi makambo nyonso. Ayebaki makambo bokosala, liboso na kobótama na bino, to ntango mokili ebandaki.

²³⁵ Sikawa, bótala. Ndenge boyebi, na—na—nayebe kobeta bondóki. Na—nalingaka mandóki. Pe mwasi moko na Texas, nabanzi ezalaki na Texas, amemelaki ngai bondóki moko ya Swift, Swift ya nkama mibale na ntuku mibale. Nazaláká ntango nyonso na mposa na yango. Nalingaki koyekola yango. Ezali bondóki ya moke pe ya nguya koleka. Ezali lisasi ya mbuma ntuku mibale na mibale, lisasi ya mbuma ntuku minei na mwambe. Pe okoki kotóndisa yango na maboko. Kasi, kompani oyo esalaka yango elobi: “Bósala bongo te; ezali na likama monene.” Kasi okoki kotóndisa lisasi yango na maboko, mpo ézua mbangu ya métre nkóto moko na nkama mitano na sekónde moko, pe etikali bobele na nzela na yango. Métre nkóto moko na nkama mitano na sekónde moko, elingi koloba kilométre moko na ndambo na sekónde moko. Na elobeli mosusu, soki nzéngó moko azali na ntaka ya métre nkama mibale. Soki obeti nzéngó yango masasi, okomona nsala kopumbwa liboso ya koyóka ndenge bondóki ezongi sima. Bomoni? Ezali bongo,

kasi soki ozindisi eteni ya suka ya mbanzi ya míno na balúti, pe obakisi bobele mwa ndambo *wana* ya balúti, bobele mwa ndambo ya moke oyo efandi likolo na mbanzi ya míno; pe obeti simbiliki oyo azali na suka ya ndako oyo, akozala kaka wana pe azali kotala yo. Ezali nini? Lisasi epanzani, mpo mbangu na yango eleki mingi. Pe—pe okoki kotia elamba ya pembe katikati na awa ná kuna, kasi okomona ata eteni na yango ya moke ekwei likolo na elamba yango te. Ezongi; na—na putulú te, na putulú ya volcan te, kasi ezongi mosika, koleka yango. Ezongi na ba-acide ya ebandeli, oyo epesaka cuivre ná plomb oyo ezalaka kati na yango. Ezongi na lolenge oyo yango ezalaki eleki mibu kiása nkama. Sikawa, lisasi ya moke yango oyo, lisasi ya mbuma ntuku minei na mwambe, oyo nasimbi na loboko na ngai, pe sima na sekónde moko, ezongi na lolenge yango ezalaki eleki mibu milió mokáma. Pe, ntango mosusu, soki mokili ekobi kozala sima na mibu milió mokáma, ekobóngwana lisusu lisasi, bakoki kopesa yango lisusu lolenge yango, mpo na ntango wana ekokóma cuivre.

²³⁶ Sikawa, bótala ndenge Nzambe asalaki, bongo, bokolinga Ye. Na sima, bokozonga na ba-ndako, pe na ntongo bokolala ntango molai. Pe—pe boko—bokolinga Ye mingi koleka liboso. Sikawa, Nzambe azali Motongi ndako. Bato boni bayebi yango? Azali Motongi ndako. Malamu. Bóyoka malamú mpenza. Boye Nzambe, kala mpenza, to, bato balobaka. . . Sikawa, tokoluka koyeba likanisi ya bato oyo bayekolaka ntango ya makambo eleká. Nzambe, eleki mibu nkiása mokáma, ntango Alingaki kosala mokili, ee, Abandaki kaka. Sikawa, Azalaki. . . Azalaki na likanisi moko na motó na Ye.

²³⁷ Sikawa bokoloba: “Ndeko Branham, soki Azali monene ndenge wana, mpo na nini Atikaki Zabolo kosala lisumu?” Ee, Ayebaki, ata liboso ya kokela Zabolo, ete akozala Zabolo. Nkembo! Sikawa, namiyoki mosambeli. Oh! la la! Ayebaki, liboso ya kokela Zabolo, ete akozala Zabolo. Sikawa bokotuna: “Ndenge nini?” Bolobi: “Mpo na nini Atikaki ye kozala Zabolo?” Mpo na kotalisa polele ete Azali Nzambe. Yango wana Asalaki bongo. “Mpo na nini mabe eyaki? Mpo na nini?”

²³⁸ Nani azalaki liboso: Mobikisi to mosumuki? Nani azalaki liboso? Mobikisi. Nani azalaki liboso: mobikisi na bokono to moto na bokono? Mpo na nini esalemaki ete mosumuki ázala? Mpo misala na Ye ezali kozala Mobikisi. Soki mosumuki azalaka te, Alingaki koyebana lokola Mobikisi te. Aleluya! Azali na makoki ya kotámbwisa makambo nyonso mpo na nkembo na Ye. “Mosali na mbeki akoki koloba na . . . To, mbeki ekoki koloba na mosali mbeki: ‘Osali ngai boye?’” Nani abalolaka masíni? Nani azali na potopóto? Ezali na maboko ya nani? Polo alobaki: “E elémá, Alobaki te ete Atelemisaki Falo na ntina oyo mpenza?” Ya solo. Ayebaki yango. Liboso ya kozalisa mokili, Ayebaki eloko nini ekozala eloko nini. Pe Atikaki ete lisumu ézala, mpo Ákoka

kozala Mobikisi. Atikaki ete bokono ézala, mpo Ákoka kozala Mobikisi na nzoto. Atikaki ete koyina ézala, mpo Ákoka kozala Bolingo. Ya solo, Ayebaki. Azali Nzambe, pe yango nde misala na Ye. Pe esengeli ete eloko moko ézala mpo na kopesa Ye nzela ya kotalisa misala na Ye.

²³⁹ Bolingaki koyeba ndenge nini ete butu ezalaka, bolingaki koyeba ndenge nini ete ezalaka? Soki ezalaki bobele pole ya moi, bolingaki koyeba ndenge nini ete butu ezalaka? Butu ezali, mpo na kotalisa ete pole ya moi ezali. Ya solo. Amen. Bomoni ndenge Asalaki?

²⁴⁰ Kasi ntango azalaki kuna mosika, liboso mokili ézalisama, liboso na Ye kozua moi oyo pe liboso na Ye kobalola yango zongazonga na monzóto oyo tozali kobika likolo na yango, mabelé oyo, oyo Apesaki lolenge awa na moi, pe Atiaki yango pembeni na moi. Tóloba, moi yango *oyo*. Bongo, Apesaki yango lolenge na ngámbo *oyo*, pe Atelemisaki yango wana, na mibu kiása mokáma. Azalaki kosala nini? Ba-gaz. Abalukaki na ngámbo *oyo*, Asalaki eloko mosusu. Azalaki kosala nini kuna? Potáse. Abalukaki na ngámbo *oyo*, bongo Azalaki kosala nini awa? Azalaki kosala calcium. Azalaki kosala nini? Azalaki kosala ngai ná yo. Azalaki kosala nini? Lokola motongi oyo azali na mabaya na ye nyonso ya kotongela, ya mibale likolo na minei, ya mibale likolo na mwambe, mabaya na ye ya minene, biloko na ye mpo na bitutu ya libanda, ayebaki mpenza motángo ya ndako oyo alingaki kotonga. Tosalémá na biloko zomi na motoba ya mabelé, pe Azalaki kosala biso nyonso, kotia biso wana, liboso mokili ékelama. Pe A. . . Na ntango wana, ezalaki ntango mosusu moke pe molai; nayebi ndenge ezalaki te. Ntina nini Azalaki kosala wólo, cuivre, motáko, mai ná biloko nyonso wana? Azali Motongi. Azali na. . . Motongi, Azalaki koléngela biloko nyonso, kuna, nyonso esilaki kokatama pe kopesama lolenge. Ntango Asilisaki kosala nyonso wana, ezalaki bobele kolamuka ya volcan monene. Atikaki biloko wana ya volcan kobima kati na mibu milió mokáma, mpo na kosala calcium. Ezali nini? Ezali na banzoto na bino.

²⁴¹ Bongo, liboso bomoi ya moke mpenza ézala na mokili, banzoto na biso ezalaki awa. Aleluya! Liboso litangá ya liboso ya mai éya na mokili, biso tozalaki awa. Ntango Adama azalaki kotambola na Elanga ya Edene, nazalaki awa. Amen. Iyo, misie. Oh, nkembo! Ntango Bakelúba, minzoto ya ntongo ezalaki koyemba elongo pe bana na Nzambe bazalaki kogánga na esengo, nazalaki awa, nazalaki bobele kozela péma ya bomoi. Nazalaki awa. Asiláki kosala ngai, awa, kotia nzoto na ngai awa. Iyo, misie. Soki te, boye, eútaki wapi? Hein? Ekómaki awa ndenge nini? Nzambe moto atiaki yango awa. Nzambe moto asaláki yango. Tosalémá na biloko zomi na motoba: petróle, potáse, pole ya minzoto, pe nyonso wana. Bomoni, tozaláká awa.

242 Bongo, likambo nini esalemaki? Na sima, Nzambe alobaki na Molimo Mosantu, tokotalisa yango na bilembo: “Sikawa, yo kende kotalisa bolingo na mokili. Lokola Ngai nazali Bolingo, pe Yo outi epai na Ngai, na bongo, kende sikawa kotalisa bolingo na Yo na mokili.” Pe tómkánisela Molimo Mosantu monene akei kuna; sikawa, ezali bobele lolenge ya kotalisa likambo. Esalemaki bongo te. Na ntembe te, Molimo Mosantu ná Nzambe, ezali bobele mwango yango moko, mwango yango moko, Moto moko. Bólimbisa ngai. Pe tóloba, Azipaki mabelé na mapapu na Ye, Abandaki kofandela yango. Kofandela, ezali nini? Ezali lokola mama soso ná bana na ye, azali kosala mwa makelele, kotalisa bolingo na ye: “Ke, ke, ke,” Oh!

243 “E bomoi, yaka!” Agángaki. Atalaki zongazonga na Ye. “Nalingi kitoko ézala na mokili oyo. Pole, yaka!” Molimo Mosantu azali kosala mosala. Pe ntango Asalaki bongo, natali; namoni lokola etímá moko ya mai ezali kotiola, kokita longwa na ngomba, calcium ezali kosopana, kosangana ná potáse. Esangani mpo na kopesa nini? “Bomoi, yaka!” Pe felele moke ya Pasika ebimisaki motó longwa na nse ya libanga. “Yaka awa, Tata, tala yango.”

244 “Ezali kitoko. Koba bobele kofandela yango.” Abimisaki bafelele. Abimisaki ba-nzete nyonso. Abimisaki bomoi ya banyama. Bändeke ebimaki na putulú pe epumbwaki. Na ntango moko, mobali ná mwasi bayaki; mobali moko ayaki, pe mobali yango azalaki mbala moko mobali pe mwasi. Kasi azalaki mwasi-mobali te. Ezali bobele ete na kati na ye, azalaki na molimo ya mwasi.

245 Soki ozui mobali oyo azali mpenza lokola mwasi, akoki na ye kozala malamú, kotongama malamú, kasi eloko moko ezali kotambola malamú te. Pe soki ozui mwasi oyo alingaka kokata suki na ye pe kolataka ba-salopéte, kokende koloba: “Nzambe ápambolama, bóyoka!” Eloko moko ezali kotambola malamú te. Mwasi azalaka na molimo ya mwasi, pe mobali azali mobali. Toyebi yango. Pe boyebi yango. Bomonaka malamú mpo na mwasi koluka kozala pe kosala makambo lokola mobali?

246 Ee, mokolo moko, nafandaki, nazalaki mobateli ya zamba, awa, pe nafandaki na bísi, nazalaki kokende kuna, pe nazalaki kobeta lokolo ya mwasi wana, na loboko na ngai, wana nazalaki kosolola na ye, nayebaki te ete azalaki mwasi. Alataki ekoti ya ba-soudeur ná matalatala ya mosala, ya minene *boye*, ngai nafandaki wana, pe azalaki kobeta lisolo ya likambo moko eutaki kosalema. Alobaki: “Oyebi,” pe alobaki, “pe lobi na mpokwa,” azalaki lokola moto ya makasi mpenza, pe azalaki komela likaya. Alobaki: “Lobi na mpokwa, yoka, elenge mobali wana aselumukaki, likolo na eloko wana. Mobali yango alobaki: ‘Oh!’ Aselumukaki pe abambanaki na nse.” Alobaki: “Naseká naino ndenge wana te na bomoi na ngai.”

247 Ngai pe nazalaki koseka, boyebi, ndenge wana. [Ndeko Branham asali lokola babetani maboko.—N.D.E.] Nalobaki: “Moninga, lisolo kitoko, boye te?” Tofandaki wana pe tozalaki kobeta masolo ndenge wana. Pe soki álongolaka eloko wana te pe soki áningisaka motó na ye te, namonaki na nzela na suki na ye oyo asanolaki malamú te ete azalaki mwasi. Namiyoka naino moke ndenge wana te na bomoi na ngai. Na—nalobaki: “Ozali nde mwasi?”

Alobaki: “Iyo kó!”

248 Nalobaki: “Limbisa ngai.” Namóná naino likambo ya ndenge wana te. Sikawa, ezali ya solo.

249 Namonaki etánda moko, mokolo mosusu, esepelisaki ngai mingi mpenza. Etánda ya monene ezalaki wana, bakomaki: “Bilamba ya basi, osombi olati.” Namilobelaki: “Nkembo na Nzambe mpo na yango.” Bomoni? Kasi, nasosolaki na sima, ete ezalaki bobele lolenge moko ya bilamba oyo basilaki kotonga, boyebi. Na—nakanisaki ete bakolata mpenza bilamba. Nakanisaki mpenza bongo. Bakomaki: “Bilamba ya basi, osombi olati.” Nalobaki: “Nkembo na Nzambe mpo na bango. Ezali malamú. Natondi mpenza Nkolo mpo na yango.” Kasi, bomoni, ezalaki bobele bilamba moko, basilaki kotonga, eloko moko ya ndenge wana. Esengelaki kozala likambo ya kokamwa, na ekólo oyo, boye te? Malamú.

250 Bongo, ntango Adama ayaki. Pe, emonanaki lokola Adama azalaki ye moko, bongo Azuaki mokúwa moko na mopanzi na ye, pe asalelaki ye Eva, autaki na ye. Asalaki . . . Alongolaki molimo ya mwasi na Adama, pe Atiaki yango kati na mwasi: molimo ya bolingo, bomwasi, bolamu, bopolo. Pe Atikaki molimo ya mobali na Adama. Boye, soki eloko mosusu ezali, libanda na yango, libebi ekoti esika moko. Kasi, bango mibale bazalaki bobele moko.

251 Sikawa, tótalisa likambo moko awa lokola lisolo, liboso ya kosilisa. Tala . . . Sikawa, Adama asimbi Eva na loboko, pe bazali kotambola. Nalingaka lisolo yango mingi. Pe bazali kotambola, boyebi. Eva alobi: “Oh, molingami, yo mpenza moto osalaki bongo?”

“Iyo, ngai moto napesaki yango nkombo.”

“Kasi opesaki yango nkombo nini?”

“Nkombo na yango mpunda. Iyo.”

“Oyo wana nde nini?”

“Oyo wana ezali ngombe. Iyo.”

“Yo moto opesaki yango nkombo wana?”

“Iyo. Iyo.”

252 “Oyo kuna opesaki yango nkombo nini, bango mibale oyo bafandi kuna, oyo mitó na bango ekutani?”

“Bazali batshakú oyo bakabwanaka te.”

253 “Oh, namoni. Namoni.” Pe bakobi ndenge wana. “Bongo oyo nde nani?”

“Oyo napesaki ye nkombo *boye*, ná oyo pe.”

254 Pe: “Oh, namoni. Iyo. Kitoko mpenza.” Pe nkosi angulúmi. “Oyo wana opesaki ye nkombo nini?”

“Oyo wana ezali nkosi.”

“*Oyo* nani?”

“Tígre.”

255 Pe, oh, lokola . . . “Oh, namoni.” Lokola bana ya nyáwu, boyebi, oyo bazali kotambola pe kolela.

256 Bongo, sima na mwa ntango, mwasi atali pembeni. Alobi: “Molingami, tala kuna, moi ezali kolala. Ntango ya kokende losambo ekoki.”

Boyebi, ntango moi elalaka, ezalaka ndenge mosusu, okoyoka mposa ya kokúmbamela. Soki ezali mokolo ya losambo te na mpokwa wana, okolinga kokota na esika ya nkukú, mpo na kotánga Biblia. Bato boni balingaka kosala bongo, kokota esika ya nkukú? Bomoni? Kosala bongo, esalemaka kati na moto yango moko. Bosengeli kosala bongo.

“Ntango ya kokende losambo ekoki.”

257 Sikawa, balobaki te: “Eh, zela naino mwa moke, Jones asambelaka na ba-Assemblée, biso tosambelaka na . . .” Te, ezalaki bongo ata moke te na eleko wana, bongo, bakendeki na bango kuna. Losambo na bango ezalaki na bisika ya kofanda ya malamú ndenge wana te. Bakendeki bobele na nse ya cathedrale monene ya banzete, pe bafukamaki.

258 Pe Libúngutulú ya pole wana etelemaki wana, likolo na banzete ya mike. Bomoni? Nakoki koyoka Mongongo moko, longwa na likolo, koloba: “Lelo, bana na Ngai bosepeli na mokili oyo Yawe, Nzambe na bino, apesi bino?”

259 “Iyo, Yawe, tosepeli mpenza lelo.” “Boye te, molingami?”

260 “Iyo. Iyo, molingami, ya solo.” “Yawe, tosepelaka na Yo mingi mpenza. Sikawa namitandi mpo na kolala.” Bomoni? Mobali asemboli loboko na ye ya monene, pe mwasi alali, atii motó likolo na loboko ya mobali na ye, alalisi tigre, ná nkosi pe banyama mosusu nyonso; nyonso ezali na kimia.

261 Bongo, Nzambe akiti pe Ayei na, oh, etonga ya Banje, Gabriel, bikelamu na Ye ya Likolo. Bongo, bakiti pe bakoti na eteni ya kolala na sóngé ya misapi, bomoni, pe batali pembeni. Gabriel alobi: “Yaka awa, Tata. Yaka awa. Tala awa. Ye oyo. Tala, bana na Yo, balali awa.”

262 Bato boni basílá kokende na motó ya mbeto, bamosusu kati na bino bamama, yo elongo na papa, mpo na kotala mwana

na bino ya mobali to ya mwasi, pe bozali kosolola moko na moninga: “O—omoni te ete azali lokola yo, alandá yo na eloko *boye na boye*?” Bosilá kosala yango? Ee, ngai nasalaka yango mbala mingi, pe nalobaka na Meda, mpo na Joseph. Akoloba: “Bill, elongi na ye ezali molai lokola ya yo.”

²⁶³ “Iyo. Kasi, Meda, azali na miso minene, lokola yo.” Mpo na nini? Azali eteni ya mbum-. . . Azali mbuma ya—ya libala na biso.

²⁶⁴ Bongo, Tata alobi, Akoki koloba boye mpo na yango. Alobi: “Oyebi. . .” Gabriel alobi: “Oyebi, azali mpenza lokola Yo.” Nzambe azali ndenge wana: mitala naino. Nzambe azali ndenge wana. Azali lokola bino. Bozali bana na Ye. Bato boni bayebi yango? Bomoni?

²⁶⁵ Sikawa, bótala. Lolenge nini ya bomoi ezali ya nse koleka? Ligbólolo. Lolenge nini ya bomoi ezali ya likolo koleka? Moto. Ya solo. Pe lolenge nini ezali ya likolo koleka? Kobanda na lolenge ya nse koleka, ezali kokoba komata, longwa na ligbólolo kino na *oyo*, pe na *oyo* mosusu, pe na ndeke, bongo na bongo, kino na ndenge ya bomoi oyo ezali kokoba komata, kino na lolenge oyo eleki likolo mpenza, bongo, ekómaki na elilingi ya Nzambe. Yango mpenza. Mwasi asalémá na elilingi ya Nzambe te, kasi na elilingi ya mobali. Bomoni?

Bongo, sikawa, bango wana. Nzambe atali bango, alobaki: “Iyo, bazali—bazali kitoko.”

²⁶⁶ Ezalaki nini, ndeko? Basengelaki kokufa ata moke te. Oyo wana ezalaki bobele eteni moke mpenza ya calcium ya liboso, ya potáse ya liboso, nyonso ebandaki ndenge wana. Kitoko, boye te? Kasi lisumu eyaki kobebisa makambo. Sikawa, Nzambe. . . Nzambe atikaki yango mpo na kosala nini? Mpo na nini Nzambe atikaki makambo yango kozala ndenge touti kolobela? Atikaki yango mpo Ákoka kotalisa ete Azali Mobikisi. Asalaki yango. Atikaki ete bokono koya, mpo Ákoka kotalisa ete Azali Mobikisi na nzoto. Atikaki kufa koya, mpo na kotalisa ete Azali Bomoi. Bomoni? Atikaki makambo mabe nyonso wana koya, mpo na kotalisa ete Azali malamu, oyo Ye azalaki. Toko. . .

²⁶⁷ Mpo na koyemba lisolo ya lisiko! Oh, ndeko, ntango Yesu akoya, li—Lingomba oyo ekozala kuna, na suka ya mabelé oyo, mpo na koyemba masolo ya lisiko, wana Banje bagúmbi mító, mpo bayebi te likambo oyo tozali kolobela. Ee, bango babúngá te. Bayebi makambo oyo biso toleki na yango te. Bisó toyebi eloko nini kozuama sima na kobúnga. Oh, tokoki kosanzola Ye na mongongo makasi! Azali Mobikisi mpo na bango te. Bazali na ntina ya lisiko te. Azali Mosikoli mpo na bango te. Te. Nkembo! [Ndeko Branham abeti maboko mbala mitano—N.D.E.] Azali—Azali Bomoi mpo na bango te. Ata moke te. Bango bakúfá ata moke te, na lisumu pe na mabe. Bisó tokufaki, pe topesameli bomoi. Bisó baoyo. Tokoloba nini, sima na kolongola mítóle

na biso: “Oh, yo nde Mo-elememia *Songolo*”? Te, te, te, te, te. Nkembo nyonso ekozonga na Ye! Ezali bongo. Yango mpenza. Bongo, tokobeta lisolo ndenge tolongi. Sima na ntango moke, tokosola yango malamumu.

²⁶⁸ Bongo, na ntango wana, likambo nini esalemaki? Bongo, Nzambe alobaki bobele: “Ee, ekozala malamumu ete Nabebisa bobele potáse pe calcium na Ngai nyonso. Makambo nyonso ebebi”? Te, te. Ayebaki ete ekosalema bongo.

Sikawa, sikawa, soki Molimo Mosantu akómisi ngai ndenge nazali, pe naliaka bilei, naleisaka nzoto na ngai mpo ékóla, mpo nákóma ndenge nazali sikawa. Kasi, nasalémá na lolenge moko. Bilingi nyonso oyo Nzambe amonáká liboso na kozalisama ya mokili, ekoméli, ezali kokokisama. Bomoni? Eutaki na mwasi, ndenge Alobáká yango; mbala ya sima, ekouta na Nzambe. Na mbala wana, eutaki na mwasi; na mbala oyo, eyei na nzela na Mobali. Bomoni? Na mbala wana, eyaki na nzela ya mposa na nzoto; na mbala oyo, ekoya na nzela ya Liloba lilobami ya Nzambe. Bomoni?

²⁶⁹ Ee, sikawa, eloko nini ekoki kosala ngai mabe? Te, misie. Eloko moko te ekoki kosala biso mabe. Polo alobaki: “Makambo ya lelo te, makambo oyo ekoya te, bokono te, kufa te; eloko moko te ekoki kokabola biso na bolingo na Nzambe, oyo ezali na Klisto.” Eloko ata moko te ekoki kokabola biso na yango.

²⁷⁰ Lokola mwa lisolo nabetaka. Naticali bobele na suki soko mitano liboso libandi étonda na motó mobimba. Pe eleki mwa ntango, nazalaki kosanola mwa suki yango, mwasi na ngai alobaki: “Billy, etikali moke libandi étonda na motó mobimba.”

Nalobaki: “Kasi nabungisi ata suki moko te.”

Alobaki: “Ezali wapi?”

²⁷¹ Nalobaki: “Ezalaki wapi liboso na ngai kozua yango? Omoni? Ezali epai ezalaki liboso na ngai kozua yango.”

Sikawa, na ntango moko, eleki mibu mokáma, suki yango ezalaki awa ata moke te, kasi ezalaki awa na putulú. Boye te? Bongo, eleki mibu pene na ntuku mitano, ebandaki kobima na motó na ngai. Eutaki wapi? Na putulú. Pe sikawa ezali kozonga epai yango eutaki. Boye te? Ezalaki te, na sima, ezalaki, sikawa ezali lisusu te. Ezali nini? Nani asalaki ete ézala ndenge ezali? Nzambe! Ye wana. Ayemaki liyemi moko, Alobaki: “Nalingi ete ázala ndenge wana.”

²⁷² “E kufa, wapi esweli na yo? Nkunda, wapi elonga na yo?” Bokoki kokunda ngai moko na mikolo oyo awa. Nayebi te. Kasi, ndeko, nakozala mokufi te. Nakoyebisa bino yango. Te, misie. Oh!

Tokosekwa! Aleluya! Tokosekwa!
 Na ntongo wana ya lisekwa, ntango bibende ya
 kufa ekobukana,
 Tokosekwa! Aleluya! Tokosekwa!

Eloko moko te ekopekisa ngai kosekwa. Milimo mabe nyonso ya lifelo ezali na makoki moko te ya kopekisa ngai kosekwa. Eloko ata moko te ezali, esika moko, mpo na kopekisa ngai kosekwa. Nazali na elaka ya Nzambe. Nazali na Molimo Mosantu. Nazali na Zoe, Bomoi na Seko ya Nzambe, efandi na kati awa. Mobange ya nzoto oyo eútáki kuna, Nzambe afandelaki yango mpo na kobimisa ngai. Pe soki Ye Oyo afandelaki mabelé mpo na kobimisa ngai na mabele. . .

²⁷³ Ntango nakómaki na mibu ya koyeba mabe ná malamú, sikawa, mbala nyonso nazalaki koyoka ngonga ya losambo kobeta, Eloko moko ezalaki kolobela ngai, nazalaki mwana moke mpenza. Mwanje moko alobelaki ngai, na nzete ya moke, alobaki: “Komela masanga te pe komela makaya te. Nabombeli yo mosala okosala. Koyeisa nzoto na yo mbindo te, na kobima na basi pe nyonso wana. Yo, Nabombeli yo mosala ya kosala ntango okokóma mokolo.”

“Yo nani? Yo nani?”

²⁷⁴ “Okoyeba likambo yango malamú sima.” Sima na mwa ntango, Ayaki. Atelemi wana na ntango ya kobatisa. Amilakisi. Amitalisi. Ayanoli. Namoni Ye ndenge ateleme wana, bisika nyonso, na ngámbo nyonso.

²⁷⁵ Okosala yango ndenge nini, soki Ye akómisaki ngai ndenge nazali, kozanga kopona. . .? Ngai te moto nakendeki koloba: “Sikawa, Charlie Branham, bálana na Ella Harvey pe bóta ngai na mokili.” Te, misie. Ngai moto naponaki yango te. Nzambe nde asalaki yango.

Pe soki Akómisa ngai ndenge nazali, kozanga kopona na ngai; koleka boni, ntango Molimo Mosantu abandi kofandela ngai, pe ngai nalobi: “Iyo, Nkolo, Ozali Mokeli na ngai. Nalingi Yo, pe nayambi Yo lokola Mobikisi na ngai!” Okokanga ngai na putulú ndenge nini? Okokoka ata moke te, ndeko. Okokoka ata moke te.

²⁷⁶ Nzambe asalaki eteni moko ya calcium oyo te, ya potáse oyo to ya eloko mosusu te, mpo é—ébúnga mokolo moko. “Baoyo nyonso Tata apésá Ngai liboso na kozalisama ya mokili, bakoya epai na Ngai.” Fiuu! Nayoki mposa ya kogánga; ya solo mpenza. “Baoyo nyonso Tata apésá Ngai bakoya epai na Ngai, pe ata moko te kati na bango akobunga, kasi Nakosekwi bango na mokolo ya lisekwa.” Nayokaki ndenge Azalaki kobenga, pe nayaki epai na Ye. Ndenge nini bakoki kokanga ngai na putulú ya mabelé? Ba-kompani ya kokunda bibembe ekokoka te na mokili, ata babambi ngai páwu na elongi, bakokoka ata moke te kokanga ngai na putulú ya mabelé. Mokolo moko nakosekwa,

pe nakokóma lokola Ye, nasukolámá na Makila na Ye, nabótámi na Molimo na Ye! Aleluya! Bózua na bino bibongiseli nyonso oyo bolingi; ngai naponi Yesu. Amen!

²⁷⁷ Moto moko oyo asalaka na kompani ya assurance ayaki epai na ngai. Wilmer Snyder, moko na baninga na ngai ya malamumu. Alobaki: “Billy, nakosepela kotekela yo lokasa ya assurance.”

²⁷⁸ Nalobaki: “Nazalaka na yango bandá kala.” (Mwasi na ngai atalaki ngai, lokola moto alingi koloba: “Ozali kokosa mpo na nini, yo?”)

Alobaki: “Ozali na assurance?”

Nalobaki: “Iyo, misie.”

Alobaki: “Ezali ya kompani nini? Oyo wapi?”

²⁷⁹ Nalobaki: “Assurance epambolámá, Yesu azali ya ngai, oh, oyo nde ndangá ya nkembo ya Nzambe! Mosangoli ya lobiko oyo Nzambe azuaki, nabótámá na Molimo na Ye, nasukolámá na Makila na Ye.”

²⁸⁰ Alobaki: “Ezali malamumu, Billy, kasi ekokotisa yo na nkunda te.”

²⁸¹ Nalobaki: “Ekobimisa ngai.” Aleluya! Namitungisaka te mpo na kokota kuna; likambo ezali nde ya kobima.

²⁸² Na bongo, nazali na assurance oyo elobi na ngai: “Nakosekwa. Baoyo nyonso Tata apésá Ngai bazali ya Ngai.” Ata papa na ngai asalaki nini, to mama na ngai asalaki nini, to likambo nini. “Baoyo nyonso Tata apesi Ngai bakoya epai na Ngai, pe moko te akoki koya soki Tata na Ngai abendi ye te.” Aleluya! Abendaki bango mpo na nini? “Nayebaki bango liboso, liboso na kozalisama ya mokili. Ntango Nabomaki Mwana Mpate, Nabomaki ye elongo na Ye.” Amen. “Nabongisaki Lingomba liboso.” Kobongisama liboso ezali ya nani? Ya Lingomba. Bakotaka na Lingomba ndenge nini? “Biso nyonso tobátísámá kati na Molimo moko, mpo na kotonga Nzoto moko.” Ayebaki, liboso na kozalisama ya mokili, ete tokozala kuna. Pe baoyo Ayebaki bango liboso, Abengaki bango. Baoyo Abengaki bango, Alongisaki bango. Baoyo Alongisaki bango, Apesaki bango nkembo.

²⁸³ Na ba-Buku ya Nzambe, Asílá koloba ete Akokutana na ngai kuna. Milimo mabe nyonso ya lifelo ekoki kokanga bango epai mosusu te, ekoki kopekisa bango kozala na esika yango te, mpo Nzambe asílá koloba yango, pe likambo esílá nye. Soki . . . Mibu kiása mokáma liboso mokili ésalema, minzoto ya ntongo ezalaki koyemba elongo pe bana na Nzambe bazalaki kogánga na esengo, liboso na kozalisama ya mokili. Bomoni? Liboso na kozalis- . . . Ná Banje, ná nyonso, bazalaki kosepela, bazalaki kogánga mpo na yango, liboso na kozalisama ya mokili. Sikawa, ndenge nini Zabolo akoki kokanga ngai na putulú ya mabelé? Akokoka te. Bolóngi.

284 Sikawa, tótala. Awa, nazali na ngonga ya ba-democrate. Tokómi na ngonga ya zomi na miníti ntuku minei, ya butu. Elingi koloba tokómi bobele na ngonga ya libwa na miníti ntuku minei. Boye te, Ndeko Wood? Ya solo, ngonga ya libwa na miníti ntuku minei. Moto nyonso azali kosepela?

Oh, motema na ngai esili kokóma kuna,
Motema na ngai esili kokóma kuna;
Ndako na ngai ya Lola ezali kitoko mingi,
Pe motema na ngai esili kokóma kuna.

Oh, motema na ngai esili kokóma kuna,
Motema na ngai esili kokóma kuna;
Ndako na ngai ya Lola ezali kitoko mingi,
Pe motema na ngai esili kokóma kuna.

285 Bolingaka ba-nzembo ya kala lokola oyo wana? Tozaláká koyemba loyembo moko, oyo elobi: “Ngolu pe mawa ezuaki ngai. Kuna Monzoto ya Ntongo engengaki.” Ezali loyembo nini, Ndeko mwasi Gertie? Tótala naino. Ndenge nini. . . Ezali loyembo nini, Ndeko Neville? Bomoni, ezali lokola: “Ngolu pe mawa ezuaki ngai. Monzoto Mokongengaka na Ntongo engengisi oyo ya Ye. . . ? . . . zonga-zonga na ngai.” Ah. Iyo. “Na Ekulusu.” Tindela biso yango, ndeko mwasi, *Pene Na Ekulusu*. Belema awa, Ndeko Neville. Oh, nalingaka ba-nzembo oyo. Bato boni balingaka ba-nzembo ya kala, oyo epemelámá? Bózua na bino makambo ya kopumbwa-pumbwa pe ba-boogie-woogie nyonso oyo bolingi. Bópesa ngai oyo: “Tala esika ngolu pe mawa ezuaki ngai.” Ezali yango. Malamu, sikawa, na bopolo.

Yesu, batela ngai pene na ekulusu,
Kuna liziba kitoko,
Ofelé mpo na moto nyonso, mai ya lobiko,
Ezali kotiola longwa na ngomba ya Kalvari.

Na ekulusu, na ekulusu,
Zala nkembo na ngai mpo na libela;
Kino ntango molimo na ngai ekonetolama pe
ekozua
Kimia na ngámbo ya ebale.

286 [Ndeko Branham abandi koyemba na nse ya mongongo *Pene Na Ekulusu*—N.D.E.] Oh, kitoko mpenza! Bókanisa naino! Bongo soki Mobikisi azalaki te? Bongo soki tozalaki na Liloba oyo te? Bongo soki Abengaki bino te? Bongo soki Ayebaki bino liboso te, pe soki bozalaki kuna, elongo na bato mosusu wana ya mokili na mpokwa oyo? Bolingi Ye? Oh! la la! Sikawa, bóbosana liyangani ya lobi na ntongo te, na ngonga ya libwa na ndambo.

Na ekulusu, na ekulusu,
Zala nkembo na ngai mpo na libela;
Kino ntango molimo na ngai ekonetolama pe
ekozua
Kimia na ngámbo ya ebale.

287 Sikawa tindela biso loyembo oyo *Esika Ezali Na Liziba*. Loyembo kitoko oyo, ya kala: “Esika ezali na Liziba.” Bato boni bayebi yango? “Esika, esika, iyo, esika ezali, esika na Liziba.” Sikawa, wana bozali koyemba yango, baluka malembe pe pesa mbote ya loboko na ndeko oyo azali pembeni na yo. Boyebi, esika ezali sikawa mpo na ba-Methodiste nyonso. Esika ezali mpo na ba-Baptiste. Esika ezali mpo na ba-Pantekotiste. Esika ezali mpo na biso nyonso sikawa, na Liziba. Bato boni bayebi loyembo yango ya kala? Oh, na ntembe te, boyebi yango. Bamosusu kati na bino, bato ya kala, ezali loyembo kitoko ya kala na Kentucky.

Esika, esika, (bópesana mbote ya loboko), iyo,
esika ezali,

Esika ezali na Liziba mpo na yo;
Esika, esika, iyo, esika ezali,
Esika ezali na Liziba mpo na yo.

Oh, esika, esika, esika ezali monene,
Esika ezali na Liziba mpo na yo;
Oh, esika, esika, iyo, esika ezali,
Esika ezali na Liziba mpo na yo.

288 Sikawa, nabombelaki bino likambo ya malamumu. Mateya nyonso ya suka, ná ba-buku pe nyonso wana, ekotekama na ngámbo mosusu ya losambo, na mpóso ekoya, ntango tokozala na mayangani; ba-bande ná biloko mosusu, ná mikanda ya malamumu. Mesa moko ekozala kuna, na kati ya biro moko kuna na suka. Pe mikanda yango, mateya ya suka, ná makomi mosusu ya malamumu oyo esilá kobima, na lolenge ya ba-buku ya sika, oyo babimisi lisusu, tokozala na nyonso wana, na—na suka ya ndako, mokolo ya misato oyo ekoya, na mpokwa.

Pe tozali kolikia ete tokolekisa nta—ntango ya malamumu kati na Nkolo. Boye, bóya na molimo ya mabondeli. Sikawa, bóbenga bato na bino ya bokono pe ya mawa, bókomela bango mikanda. Bóya na bango awa. Toko . . . Nzambe akosala na nguya mpenza. Pe toyebi ete Akosala yango.

289 Sikawa, nakendeki epai na bato nyonso oyo nayebaki ete bazalaki na mwa mindondo. Sikawa, soki likambo moko ezali, oyo elongobani te, bóbosana te, nayebisaki bino yango banda kala, ete tokosembola nyonso wana. Pe nayebi ete bondimisami ete molimo moko ya ndenge mosusu ezali awa, oyo ekeseni na oyo ezalaka awa. Bomoni? Bomoni? Bomoni? Ya solo. Sikawa, bótika yango ékende lisusu te. Nalobeli bino polele liboso na Yesu Klisto, bótika yango ékende te. Bóbatela yango ntango nyonso awa, bomoni, bóbatela nyonso malamumu pe bókoba kokende liboso. Bozali bandeko. Ezali ndeko na yo ya mobali to ya mwasi nde asalaka makambo ya mabe te; molimo wana ya Zabolo nde emikotisaka wana. Bomoni, atambolaka. Yokela ndeko yango mawa, ázala mobali to mwasi, pe yeba ete Satana nde ayei kokota na katikati na bino. Soki oyoki mwa koyina mpo na

yango, bimisa yango nokinoki, bomoni, mpo ekolia yo moke moke. Iyo, ya solo. Na bongo, bwaka yango mosika na yo. Kobosana likambo oyo te.

Esika ezali, esika, esika monene,

Esika ezali mpo na ba-Methodiste, esika mpo na ba-Baptiste, esika mpo na ba-Presbiterien. Esika ezali mpo na bato nyonso.

Esika, esika, iyo, esika ezali,
Esika ezali na Liziba mpo na yo.

²⁹⁰ Bato boni bayebi lisusu loyembo tozaláká koyemba wana tozali kokabwana?

Mema Nkombo na Yesu,
Mwana na mawa pe bolozi;
Ekopesa yo esengo pe libondisi;
Mema Yango bisika nyonso okokende.

Nasepeli ete bótíkala elongo na biso, Ndeko Jeffreys, yo ná Ndeko mwasi Jeffreys, ná bana na bino nyonso ya mibali.

Na bongo tokogúmbama liboso na Nkombo na
Yesu,
Tokofukana na makolo na Ye; (Oh! la la!)
Tokolatisa Ye motóle ya Mokonzi na bakonzi na
Lola,
Na suka ya mobembo na biso.

Mema Nkombo na Yesu,
Mema yango lokola Nguba lelo;
Oh, wana masenginia mazingi yo,
Loba Nkombo Mosantu wana na libondeli.

Oh, nalingaka yango. Ná bino? Nkombo kitoko wana ya Yesu! Sikawa, tótelema, wana tozali koyemba. Malamu.

Mema Nkombo na Yesu,
Mwana na mawa pe bolozi;
Eko . . .
[Ndeko Branham asololi ná Ndeko Neville—
N.D.E.]

O ya boboto!
Elikia ya mokili pe esengo ya Lola;
Nkombo kitoko (O Nkombo kitoko), O ya
boboto!
Elikia ya mokili pe esengo ya Lola.

²⁹¹ Sikawa oyo, ekeseni mwa moke. Na bongo, tógúmba mitó na biso sikawa, pe, na kimia mpenza, tótombola loboko moko. Tóloba:

Tokogúmbama liboso na Nkombo na Yesu,
 Tokofukana na makolo na Ye,
 Tokolatisa Ye motóle ya Mokonzi na bakonzi na
 Lola,

Na suka ya mobembo na biso.

Nkombo kitoko, O ya boboto!

Elikia ya mokili pe esengo ya Lola;

Iyo, Nkombo kitoko, O ya boboto!

Elikia ya mokili pe esengo ya Lola.

²⁹² Wana tokobi kogúmba mitó na biso, tolobi...[Ndeko
 Branham abandi koyemba *Mema Nkombo Na Yesu* na nse ya
 mongongo—N.D.E.]



MPO NA NINI BISO TOZALI EBONGISELI TE? LIN58-0927
(Why Are We Not A Denomination?)

Liteya oyo ya Ndeko William Marrion Branham, eteyamaki liboso na Ngelesa na mokolo mwa mpóso na mpokwa, mokolo mwa 27, sanza ya libwa, na mobu 1958, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org